


কর্গাজ্জুন

অপরেশচন্দ্র মুখোপাধ্যায়

BIR CHANDRA PUBLIC LIBRARY



Class No... 891-442

Book No... M-953

Accn. No... 44821

Date... 14-6-66 ...

A(16)

TGPA—27-8-65—20,000

କର୍ମାଞ୍ଜୁନ


ପୌରାଣିକ ଦୃଶ୍ୟକାବ୍ୟ

This book is returnable on or before
the date last stamped.

2 52 - 1957

ଅପରୋକ୍ତ ଉପାଧ୍ୟାୟ

ଆର୍ଟ୍ ଥିଏଟର କର୍ତ୍ତୃକ ଷ୍ଟାର ରଞ୍ଜମଞ୍ଚେ ଅଭିନୀତ
ପ୍ରଥମ ଅଭିନୟ ରଞ୍ଜନୀ—ଶନିବାବ ୧୭ଇ ଆଷାଢ଼, ୧୯୭୦



ଓଡ଼ିଆ ଉପାଧ୍ୟାୟ ଏଓ ଜଣ
୧୦୭.୧.୧ ବିଧାନ ସଭା ନିକଟରେ କଲିକତା-୬

তিন টাকা

সপ্তদ্বিংশ মুদ্রণ
আশ্বিন — ১৩৩০

উৎসর্গ

নাট্যবিজ্ঞানভারতী

শ্রীযুক্ত নির্মলশিব বন্দ্যোপাধ্যায় কবিভূষণ

মহাশয়ের

কল্পকমলে

নাট্যোন্মিখিত ব্যক্তিগণ

পুরুষগণ

শ্রীকৃষ্ণ, বলরাম, মহাদেব, ইন্দ্র, সূর্য্য, জামদগ্ন্য, ভীষ্ম, দ্রোণ, রুপ, ধৃতরাষ্ট্র, দুর্য্যোধন, দুঃশাসন, বিকর্ণ, যুধিষ্ঠির, ভীম, অর্জুন, নকুল, সহদেব, অধিরথ, কর্ণ, বৃষকেতু, বিহুর, শকুনি, সঞ্জয়, বিচিত্রসেন, ধৃষ্টদ্যুম্ন, শল্য, জবাসন্ধ, অগ্নিহোত্র, ঋষি, ব্রাহ্মণগণ, মন্ত্রী, স্মৃতিহারী, দূত, বালকগণ, দৌবারিকগণ, বন্দিগণ ইত্যাদি

স্ত্রীগণ

পাণ্ডবী, কুন্তী, দ্রোপদী, স্নকেতু, পদ্মাবতী, নিয়তি, ভৈরবী, বন্দিনীগণ ইত্যাদি

କର୍ମାଞ୍ଜୁନ

ପ୍ରଥମ ଅଙ୍କ

ପ୍ରଥମ ଦୃଶ୍ୟ

ନଦୀତୀର

କାଳ—ପ୍ରତାପ

କର୍ମ

ବନ୍ଦି-ବନ୍ଦିନୀଗଣେର ଗୀତ

ନମୋ ନମ ଋଷି ଛବି ଗଗନ-ବିହାରୀ ।

ଉଜ୍ଜ୍ୱଳ ତପନ, ଭୁବନ-ନୟନ

ସକଳ ତିମିର ଅପହାରୀ ॥

ଜୟ ଶ୍ରୀକୃଷ୍ଣ, ଚିର-ରୁଚିର ଦିବ୍ୟ କଳେବର,

ସ୍ଫୁରିତ ବ୍ରହ୍ମଜ୍ୟୋତିଃ—ପାପ ତାପ ହର,

ଜବା-କୁସୁମ ବରଣ, ଅମଳ ଅରୁଣ,

ବିମଳ କନକ କିରୀଟଧାରୀ ।

ଅହାନ

କର୍ମ ।

ଅପୂର୍ବ ଆଲୋକଛଟା ଉଦୟ ଅଚଳେ,

ଅପୂର୍ବ ପୁଲକ ଜାଗେ ହୃଦୟ-କମଳେ ।

ବୁଝିତେ ନା ପାରି

କି ଅଜ୍ଞାତ ଆକର୍ଷଣେ

ଉଦ୍ଘେଳିତ ହୃଦୟ ଆମାର !

କହ ବିଭାବହୁ,

କି ସନ୍ଧ୍ୟା ତୋମାୟ ଆମାୟ ?

কেন এই উচ্চ উদ্দীপনা ?
 নীচ-কুলোদ্ভব রাধার নন্দন আমি
 সূত-পুত্র অধিরথ-সূত ;
 কিন্তু যবে প্রণমি তোমায় দেব,
 আনন্দে অধীর—
 শুনি যেন অশরীরী বাণী
 ধীরে পশে কর্ণে মোর—
 দিবাকর আকর আমার,
 স্বর্ণ-সূত্রে সম্বন্ধ স্থাপিত
 অভিমানে স্ফুরে এ অন্তর !
 দিন দিন দিনকর সনে
 কত আশা—কত সাধ
 কত বিচিত্র কল্পনা ।
 রেথায় রেথায় ফোটে অন্তরে আমার ।
 বৃষ্টিতে না পারি
 কিবা মোহিনী-মায়ায়
 সমাচ্ছন্ন প্রাণ !

‘অগ্নিহোত্র ও জনৈক শূত্রের প্রবেশ

অগ্নি । অপবিত্র সূতপুরীতে বেটা চণ্ডালের স্পর্শা দেখ ! গুরুদেবের
 জন্ম যজ্ঞের হবি সংগ্রহ ক’রে নিয়ে যাচ্ছিলেম, বেটা, সংস্পর্শ-দোষে
 সব মাটি করলে ! এ হবিত্তে কি আর হোম হবে ? চল্ বেটা রাজার
 কাছে, আজ তোর শূলের ব্যবস্থা ক’রে তবে পূজা-অর্চনা ।

শূত্র । রক্ষে কর বাবা, রক্ষে কর । আমি ইচ্ছে ক’রে তোমায় ছুঁই নি ।
 (কর্ণকে দেখিয়া) রক্ষে কর, বাবা, নইলে রাজার কাছে নিয়ে গেলে
 আমার আর প্রাণ থাকবে না ।

কর্ণ । কেন ব্রাহ্মণ, আপনি এ নিরীহকে পীড়ন কচ্ছেন ? এ আপনার কি ক'রেছে ?

অগ্নি । কি ক'রেছে ! সকাল বেলা গঙ্গাস্নান ক'রে শুদ্ধদেহে যজ্ঞের হবি নিয়ে যাচ্ছিলেম, বেটা চণ্ডাল ছুঁয়ে দিয়ে আমার এক কলসী ঘৃত ভস্মসাৎ ক'রলে ! এতে কি আর হোম হবে, না পূজা হবে ?

শূদ্র । দেখুন তো কর্তা, আপনিই বিচার করুন । ঠুঁরাও যেমন আমাদের ছোঁনা, আমরাও তেমনি ইচ্ছে করে ঠুঁদের ছুঁই না । হঠাৎ আমার ছায়া মাড়িয়েছেন ব'লে আমায় রাজার কাছে নিয়ে যাচ্ছেন দণ্ড দিতে ; সেখানে গেলে কি আমি বাঁচব ? দোহাই কর্তা, আপনি আমায় বাঁচান । আপনাকে ছুঁতে আছে কি না জানি না, নইলে আপনার পা দুটো জড়িয়ে ধরতুম ।

কর্ণ । ভয় নেই, তুমি আশ্বস্ত হও । ব্রাহ্মণ, দীনের প্রণাম গ্রহণ করুন । প্রভু, আপনার যা ক্ষতি হ'য়েছে, তার দশগুণ হবি আমি দেব, এ হতভাগাকে কিছু বলবেন না ।

অগ্নি । ঘি তো তুমি দেবে, কিন্তু এ যে পাপ ক'লে, এর শাস্তি বিধান না করলে, দেশ যে ক্রমশঃ অরাজক হ'য়ে উঠবে ; অস্পৃশ্য জাতি কি আর ব্রাহ্মণকে মানবে ?

কর্ণ । দেব ! এ ব্যক্তি তো ইচ্ছাপূর্বক আপনাকে স্পর্শ করে নি ; আর যদি ইচ্ছা ক'রে স্পর্শ ক'রত তা হ'লে এমন কি মহাপাপ হ'ত ? এও মানুষ—আপনিও মানুষ ।

অগ্নি । বটে ? আমি দ্বিজ, বর্ণশ্রেষ্ঠ, আর এ ব্যক্তি অস্পৃশ্য চণ্ডাল— এতে আমাতে সম-পর্যায় ? তুমি কে বট হে, এমন অজ্ঞানের মত কথা ব'লছ । শাস্ত্রাচার জান না ? কোন্ কুলোদ্ভব তুমি ?

কর্ণ । অধীন সূত-পুত্র ।

অগ্নি । ও ! ক্ষত্রিয়ের ঔরসে বৈশ্যানীর গর্ভে যে সংস্কার-বর্জিত

সর্ষজাতি সূত, সেই কুল কঙ্কল তুমি ? তুমি আর শাস্ত্রাচার জানবে কি ক'রে ? বেদিক ! (শূদ্রের প্রতি) চল, চল্ বেটা চল্ —আজ তোর মুণ্ডপাত ক'রে তবে আমার কাজ ।

শূদ্র । তবে কি আমায় সতি সতি শূলে ধেতে হবে ?

কর্ণ । কিছুতেই না । আমি তোমায় আশ্রয় দিয়েছি, যদি প্রয়োজন হয় আমি তোমার জগ্ন দণ্ডভোগ করব । তুমি সর্ষজাতির অস্পৃশ্য হ'লেও আমার অস্পৃশ্য নও । তুমি আমার শরণাগত, আমার ভাই । এইদেহ, মাংসপেশী, শোণিত আর এর অন্তরালে যে প্রাণ—তা ব্রাহ্মণ শূদ্রের ভেদশূন্য । তুমি চণ্ডাল হ'লেও—তোমাতে আর পৃথিবীর সর্ষ-মানবে কোন পার্থক্য নেই । ব্রাহ্মণ ! আপনার চরণে বারবার প্রণাম ক'রে ভিক্ষা চাচ্ছি, একে পরিত্যাগ করুন, আপনাব ক্ষতি আমি পূরণ করব ।

অগ্নি । (স্বগত) বেটা বলবান, অধিক বিতণ্ডার প্রয়োজন নাই । (প্রকাশ্যে) যা যা বেটা চণ্ডাল, বেঁচে গেলি । অনন্যোপায় হ'য়ে তোকে ক্ষমা কল্লেম, যা ! সূত-প্রদত্ত হ'বিত্তে হোম হবে কি না, কে জানে ? পুনরায় গঙ্গাস্নান ক'রে যাই, দেখি গুরুদেব কি বলেন ।

প্রস্থান

শূদ্র । ওঃ ! বাঘের মুখ থেকে তুমি আমায় রক্ষা ক'রেছ । তুমি যেই হও, আমার কাছে তুমি দেবতা—তোমার জয় জয়কার হ'ক ।

প্রস্থান

কর্ণ । এ শাস্ত্রের বিধান, না দুর্কলের প্রতি প্রবলের অত্যাচার ! কেন এ পার্থক্য ? আমি মংস্কার বর্জিত সূত-পুত্র, হীন কুলে জন্ম ব'লে কি উচ্চ অধিকার আমার নেই ! আমি চিরদিনই কি হীন হ'য়ে থাকব ?

অধিরথের প্রবেশ

অধি । পুত্র, তুমি কিশোর বয়স অতিক্রম ক'রে যৌবনে পদার্পণ করেছ ; কিন্তু তোমাকে আমি দিন দিন চিন্তিত দেখি কেন ? আমি তোমার

পিতা, আমার কাছে মনোভাব গোপন ক'রো না। বল, তুমি কি
চাও? কিসে তুমি সুখী হও?

কর্ণ।

পিতা!

সূচীবিদ্ধ অন্তর আমার নিয়ত কাতর—

তিল নহে স্থির কভু।

উচ্চ আশা

বহি-শিখা সম

প্রজলিত হৃদয়-কন্দরে।

সাধ—নিজ কৰ্মবলে,

উচ্চগতি করিব অর্জন।

শাস্ত্র যদি নিষিদ্ধ সূত্রেব—

গুনিয়াছি

ক্ষত্রিয়ের সম

শস্ত্রে আছে অধিকার মোব,

তাই নিবেদন চরণে তোমার

দেহ আজ্ঞা, যাব হস্তিনায়।

গুনিয়াছি দ্রোণাচার্য্য আচার্য্য-প্রধান

মতিমান্ কৌরবেব গুরু—

শিষ্যত্ব তাঁহার করিয়া গ্রহণ

করিব হে সফল জীবন!

বাহুবলে সূতবংশ-খ্যাতি

চিরদিন

ভারতের ইতিহাসে রহিবে অঙ্কিত।

অধি। বৎস। এই তোমার মনোবেদনার কারণ। এ কথা আমায়
এতদিন বল নি কেন! কৌরবেশ্বর ধৃতরাষ্ট্র আমার পরিচিত, আমি

- তোমাকে পত্র দিচ্ছি, তুমি তাঁর নিকট গমন কর, তোমার বাণী সহজেই পূর্ণ হবে। তুমি সহজেই আচার্য্য দ্রোণাচার্য্যের আশীর্বাদ লাভ ক'রবে।

কর্ণ। পিতা, সর্বতীর্থের কল্যাণ তোমার চরণ রেণুতে, তোমার পদে প্রণাম ক'রে আমি অভীষ্টলাভে যাত্রা করি! আশীর্বাদ কর, বিদ্যালাভ ক'রে যখন ফিরে আসুব, তখন যেন অধিরথ-সুত কর্ণের যশঃ সৌরভে পৃথিবী আমোদিত হয়।

অধি। বৎস, সর্বাস্তঃকরণে আশীর্বাদ করি, তুমি সফলকাম হও।

কর্ণের প্রশ্ন

অধি। সিংহশিশু শৃগালের গহ্বরে পালিত হ'লেও সে সিংহেরই শিশু— শৃগালের নয়। এই গঙ্গাগর্ভে তাম্রপাত্রে সযত্নে রক্ষিত দিব্যকান্তি সহজাত কবচকুণ্ডলধারী তোমাকে যে দিন লাভ করি, সেই দিন দৈববাণী হয়েছিল, “অধিরথ! এই শিশুর নামকরণ কোরো ‘কর্ণ’ আর একে জগতে তোমার পুত্র ব'লেই প্রচার কোরো।” কে এ লোক, কোন্ মহাকূলে এর জন্ম, দেবতা কি গন্ধর্ষ কিছই জানি না। পুত্রস্নেহে তোমায় লালন-পালন করেছি—তুমি যেই হও—এখন আমারই পুত্র।

প্রস্থান

দ্বিতীয় দৃশ্য

হস্তিনা—প্রাসাদ

শকুনি

শকুনি। বীজ বপন করেছি—ক্ষেত্রও উর্বর—কত দিনে অঙ্কুর তরুতে পরিণত হবে, তরু ফল প্রসব করবে—কে জানে! গান্ধারি! স্বামী-পুত্রের মায়ায় তুমি ভুলেছ, কিন্তু আমি তো ভুলতে পারি নি। কারাগারে পিতৃহত্যা ভ্রাতৃহত্যা—আমি শকুনি এখনও জীবিত—তুধু প্রতিশোধ নেব ব'লে। বিপক্ষে অস্ত্র ধ'রে নয়—দুর্যোধন, তোমাকে দিয়েই তোমার বংশ ধ্বংস ক'রব, তাই তোমার সংসারে অন্নদাস হ'য়ে আত্ম-অভিলাষ গোপন ক'রে আছি।

দুর্যোধন ও দুঃশাসনের প্রবেশ

দুর্যোধন। ক্রমশঃ অসহ্য হ'য়ে উঠছে। অর্জুন—অর্জুন! আচার্যের কেবল শয়নে স্বপনে অর্জুন! শ্রেষ্ঠ অস্ত্রবিদ্যা যা, তা অর্জুনকেই দান করেন, আমাদের বলেন, 'তোমরা অধিকারী নও'। কেন?

শকুনি। একদর্শিতা—বুঝলে বাবাজী—একদর্শিতা!

দুঃশা। আমার প্রতিদ্বন্দ্বী—ভীমসেন; কিন্তু, মল্লযুদ্ধে আচার্য্য প্রশংসা করেন তারই অধিক, আমাকে কাছেই ঘেঁসতে দেন না।

শকুনি। অকৃতজ্ঞতা—অকৃতজ্ঞতা! খেতে পেতেন না, দেশে দেশে ভিক্ষে ক'রে কপনি জুটত না, ছেলে দুধ খাব বলে বায়না নিলে, পিটুলি গুলে খাওয়াতেন, মহারাজ ধৃতরাষ্ট্র আশ্রয় দিলেন, আচার্য্য ক'রে দিলেন—আর তাঁর ছেলেরাই হ'ল দ্রোণের চক্ষুশূল।

দুর্যোধন। আর পাণ্ডবেরা হ'ল তাঁর প্রিয়! কি অবিচার!

শকুনি। ষত অনিষ্টের মূল আমাদের মহারাজ ধৃতরাষ্ট্র। ছিল শতশৃঙ্গ পর্কতে, পাণ্ডু আর মাদ্রীর মৃতদেহ নিয়ে কতকগুলি ঋষি একদিন

সকালবেলা উপস্থিত—সঙ্গে সঙ্গে পাণ্ডব আর কুন্তী, সেই সময় মহারাজ যদি অশ্বীকার করতেন, তা'হলে কি আ ! ওরা এখানে স্থান পেত ? দুর্ঘো। মহারাজ অশ্বীকার করেন কি ক'রে ? দেখেছিলেন তো ? পিতামহ ভীষ্ম, পিতৃব্য বিহর, এ'রাই তো সমাদর ক'রে নিয়ে এলেন। আর আচার্য্য দ্রোণ, কৃপ, এঁদেরই বা যত্ন কত ?

শকুনি। আনবেন না কেন ? ভীষ্ম রাজ্যের মমতা কি বুঝবে ? অপদার্থ ! পুরুষ হ'য়ে বিয়ে ক'লে না। দ্রোণ, কৃপ ? জন্মরহস্য অদ্ভুত, একজন জন্মালেন কলসীর ভিতর, আর দু'জন নিরাশ্রয়—বনে পড়েছিল—রাজর্ষি শাস্ত্র মুগয়া করতে গিয়ে কৃপা ক'রে আশ্রয় দিলেন—তাই একজনের নাম হ'ল “কৃপ” আর বোন্টার নাম হ'ল “কৃপী”—দ্রোণাচার্য্যের স্ত্রী। আর বিহর ? ওটা তো বেদব্যাসের ফাউ, দাসীপুত্র, উপজীবিকা—ভিক্ষা ! এরা রাজ্যের মমতা কি বুঝবে বল। জ্ঞাতি-শক্রকে এনে স্থাপন করলেন ; যতদিন না এদের উচ্ছেদ হয়, ততদিনই ভুগতে হবে।

দুর্ঘো। এই যে দুই আচার্য্যই আসছেন।

দ্রোণাচার্য্য ও কৃপাচার্য্যের প্রবেশ

দ্রোণ। এ কি বংস, তোমরা শিক্ষাগার থেকে চ'লে এলে কেন ?

দুর্ঘো। দেখলেম, আপনি ভীষ্মার্জুনের শিক্ষাদানেই ব্যস্ত, সেই জন্তু আপনাকে বিরক্ত না ক'রে এইখানেই এসে বিশ্রাম করছি।

দ্রোণ। বিশ্রাম সেইখানেই করা উচিত ছিল ; কেন না অর্জুনের ক্ষিপ্রকারিতা, বাণত্যাগের কৌশল মনঃসংযোগে দেখলেও উপকার হ'ত। যখন একজনকে শিক্ষা দিই, মনে ক'রো না, যে কেবল তাকেই শিক্ষা দিচ্ছি, একজনকে লক্ষ্য ক'রে সকলকে শিক্ষাদানই আমার উদ্দেশ্য।

দুর্যো। কিন্তু গুরুদেব, মার্জ্জনা করবেন, আপনি ত দেখি আমাদের
সকলের অপেক্ষা অর্জুনকেই বিশেষ যত্নে শিক্ষা দিয়ে থাকেন।
দ্রোণ। (ঈষৎ হাসিয়া) না বৎস, এ তোমাদের ভ্রম। আমি সকলকেই
সম্মানভাবেই শিক্ষা দান করি, তবে অর্জুনের প্রতিভা অধিক, সে যা
গ্রহণ করতে সমর্থ হয়, তোমরা তা পার না।

বিद्या—বিমল জাহ্নবী-বারি --
বেদ গিরিশৃঙ্গ হ'তে
তুকুল ভাসায়ে চলে ;
শিষ্যহৃদি উষর বা উর্কর কোথাও,
তাই কোথা নয়ন আনন্দ
ফলেফুলে হয় সুশোভিত ;
কোথা মরুভূমি সম
প'ড়ে রহে বিদগ্ধ প্রাস্তর !
ভাগ্য যার যেরা
ফললাভ সেই মত ;
ইথে বৎস ক্ষোভ নাহি কর !
আমি প্রাণপণে বিद्या করি দান,
শিষ্য গোর পুত্রাধিক সকলে সমান,
ঈর্ষা পরিহরি' কর বিद्याমৃত পান,
তৃপ্ত হবে প্রাণ—
বিद्याদান সফল হইবে মম ।

শকুনি। সফল হবে বৈ কি। ব্রাহ্মণ আপনি—আপনি যখন অস্ত্র
ধ'রেছেন—সফল হবে না ? তবে দুর্যোধনাদি বালক, বুঝতে পারে
না, মনে করে আপনি অর্জুনকেই অধিক ভালবাসেন।
দ্রোণ। ওঃ, অর্জুনের শ্রেষ্ঠত্ব স্বয়ংক্রমে তোমাদের কোন সন্দেহ আছে ?

শকুনি । তা সত্য কথা বলতে কি, ছেলেদের মধ্যে একটু আধটু আছে বৈ কি ।

দ্রোণ । বেশ, সন্দেহের কোন প্রয়োজন নাই, সকলের সমানভাবে পরীক্ষা নাও । আমার শিষ্যগণের মধ্যে কে শ্রেষ্ঠ, তা নিরূপিত হ'ক । আমি সত্বরেই অস্ত্র-পরীক্ষার আয়োজন করব । তা'হলে তো আর কোন আক্ষেপ থাকবে না ?

শকুনি । না, নিরপেক্ষ বিচার ।

দুর্যো । আমিও তো তাই চাই । আচার্য্যের কৃপায় আমিই শ্রেষ্ঠত্ব অর্জন করব নিশ্চয় ।

দ্রোণ । আশীর্বাদ করি তাই হ'ক ।

দুর্যো । আচার্য্য কি এখন অস্ত্রাগারে যাবেন ?

দ্রোণ । তোমরা চল, আমি যাচ্ছি ।

দুর্যোধন প্রভৃতির প্রস্থান

কৃপ । পাণ্ডবদের প্রতি দুর্যোধনের ঈর্ষা দেখছি ক্রমশঃ বাড়ছে ।

দ্রোণ । প্রকৃতি সহজাত, উপায় কি । দুর্যোধন শুধু ঈর্ষাপরায়ণ নয়—মহাদান্তিক, নীচচেতা ।

কৃপ । আর দুর্ভাগ্যক্রমে আমরাই এই কৌরবের আচার্য্য ।

দ্রোণ । বেতনভোগী অন্নদাস ! তুমি তো জানো, একমুষ্টি অন্নের জগু স্ত্রী পুত্র নিয়ে দ্বারে দ্বারে ভিক্ষা করেছি । এই ভারতের কত রাজা কত মহারাজা আমার দারিদ্র্যকে উপহাস ক'রেছে, কেউ আশ্রয় দেয় নি । সহপাঠী দ্রুপদ—তার সিংহাসন মলিন হবার ভয়ে—প্রার্থী আমি—নিকটে যেতে দেয় নি ! দ্বারপ্রান্তে দণ্ডায়মান আমাকে দেখে অবজ্ঞার হাসি হেসে ব'লেছে, “ভিখারী ব্রাহ্মণ কখনও রাজার সহপাঠী হ'তে পারে না ।” সেই অপমানের শেল বুকে নিয়ে, যখন আমি অনাহারে মৃতপ্রায়, সেই সময়ে আমার জীবন রক্ষা ক'রেছেন

এই কোরবের রাজা ধৃতরাষ্ট্র। অন্নের জন্ম—মার্যাদার জন্ম—জীবন
বিক্রয় ক'রতে হ'য়েছে এই দুর্ঘ্যোধনের কাছে।

কৃপ। এর কি কোন প্রায়শ্চিত্ত নাই ?

দ্রোণ। আছে।

কৃপ। কি ?

দ্রোণ। অবিচারিত-চিত্তে অন্নদাতা প্রভুর আজ্ঞাপালন।

কৃপ। এ যে তুষানল অপেক্ষাও ভয়ানক !

দ্রোণ। ভয়ানক হ'লেও দাসত্বের এই শাস্তি।

কৃপ। এই কি শাস্ত্রের বিধি ?

দ্রোণ। এই শাস্ত্রের বিধি। ব্রাহ্মণেব দাসত্বেই কলির সূচনা—কে জানে
এর পরিণাম কোথায়।

উত্তরের প্রস্থান

শকুনি। দুর্ঘ্যোধন ! তোমাব ঈর্ষার অগ্নিতে ইন্ধন দেবার ভার
আমার।

প্রস্থান

তৃতীয় দৃশ্য

মহেন্দ্র পর্বত

জামদগ্ন্য রামের আশ্রম

কর্ণের উৎসঙ্গ-প্রদেশে মন্তুক রাখিয়া জামদগ্ন্য রাম নিয়িত

কর্ণ। দ্রোণাচার্য্য! বড় আশা করে তোমার কাছে অস্ত্রশিক্ষা ক'রতে
গিয়েছিলেম, তুমি আমাকে সূত-পুত্র বলে অবজ্ঞায় প্রত্যাখ্যান
করেছিলে। শেলের মত সে প্রত্যাখ্যান-বিষের জালা এখনও এ হৃদয়
ত্যাগ করে নি। তাই তোমার সম্মুখে প্রতিজ্ঞা ক'রে এসেছিলেম,
তোমার প্রিয়শিষ্য অর্জুনের অপেক্ষাও যদি শস্ত্রবিদ্যায় পারদর্শী না

হই তো এ জীবন ত্যাগ ক'রুব। তুমি প্রত্যাখ্যান করেছিলে, তাই আজ
জগতের মধ্যে শ্রেষ্ঠ ধনুর্ধর নরদেহে ভগবান্ জামদগ্ন্য আমার গুরু।

নিয়তির প্রবেশ ও গীত

আমি কখন ভাঙ্গি কখন গড়ি নাইক ঠিকানা
ধাকি সাথে সাথে, পথে কি বিপথে চিরদল অচেনা অজানা।
ললাট পটে কালের রেখা, অদেখা আঁখির রহি গো লেখা
বাহি নাম ধাম চলি অবিরাম, পড়ে যহে পাছে স্মৃতির নিশানা !

প্রস্থান

কর্ণ। এ কি ! আমার উৎসঙ্গ-প্রদেশে কাঁট প্রবেশ কলে কি করে ? এ
যে চর্ম, মাংস, অস্থি, মেদ ভেদ কচে ! উঃ অসহ ! যন্ত্রণা যে অসহ !
কিন্তু কি করি ! যদি চঞ্চল হই, যদি নিবারণ করতে যাই, গুরুদেবের
যে নিদ্রাভঙ্গ হবে। ব্রাহ্মণ উপবাসে পরিশ্রান্ত — অঘোরে নিদ্রা যাচ্ছেন।
না, না, ম'রে গেলেও ত এঁর নিদ্রাভঙ্গ করতে পারুব না।

জাম। (উঠিয়া) এ কি ! আমার কর্ণমূল সিক্ত হ'ল কি ক'রে ? বারি
এল কোথা হ'তে ? না না, এ তো বারি নয়—এ যে শোণিত !
তোমার উরুদেশ ভেদ করে উঠেছে ! কি সর্বনাশ ! এ কি হ'ল !
বৎস, তুমি আমায় জাগরিত কর নি কেন ? ওঠ, ওঠ, তোমায়
কিসে দংশন ক'লে !

কর্ণ। প্রভু !

জাম। এ কি ! অষ্টপদ, তীক্ষ্ণদংষ্ট্রা,
স্থূলচর্ম, সূচীসম লোম,
শূকর-আকার
কর্কশ অলক এই
মাংস অস্থি ত্বক্ মেদ করিয়াছে ভেদ,
অকুণ্ঠিত তুমি নিঃসন্দ নির্বাক

অকাতরে সহিয়াছ যন্ত্রণা ভীষণ—

তবু জাগরিত করনি আমারে ?

কর্ণ। প্রভু ! উপবাস-ক্লিষ্ট শরিশ্রান্ত আপনি, পাছে আপনার নিদ্রাভঙ্গ

হয়, এই ভয়ে আমি আপনাকে জাগরিত করতে সাহস করি নি।

জাম। অমানবদনে এই কষ্ট সহ করেছ ?

কর্ণ। মৃত্যু পর্যন্ত এর অপেক্ষাও অধিক যন্ত্রণা সহ করতেম, তবু

আপনার বিশ্রামের ব্যাঘাত করতেম না।

জাম। এ কি অদ্ভুত সহিষ্ণুতা ! এ কি অমানুষী ধৈর্য ! এ কি

অলৌকিক গুরুভক্তি !

ব্রাহ্মণ ?—ব্রাহ্মণ

শুদ্ধসত্ত্বগুণে দেহের গঠন যার,

বংশগত তপস্চার ফলে

সুকুমার কলেবর,

দিব্যকাস্তি,

হোম হবি সম কোমল হৃদয়,

সেই দ্বিজ-কূলে জনম তোমার ?

এও কি সম্ভব ?

বুঝিতে না পারি,

কোন্ দৈব মায়্যা-বলে

ব্রাহ্মণত্ব আজ

করিয়াছে তার সীমা অতিক্রম !

সত্য কহ,

সংশয়ে না রাখ আর,

কহ সত্য—

কোন্ শক্তি সহিয়াছে

দুর্বার ষড়্গা এই,
ইন্দ্র যাহা সহিতে অক্ষয় ?

কর্ণ।

প্রভু !
জড়িত রসনা মোর, কি দিব উত্তর,
আমি নহি দ্বিজ !


জাম।

নহ দ্বিজ !
কোন্ জাতি ?
কোন্ কুলে জন্ম তব ?
এ কি ! কম্পান্বিত কেন কলেবর ?
যদি ভার্গবের রোষ-বহ্নি হ'তে
বাঁচিবার থাকে সাধ—

বল্ দুরাচার,
কোন্ বংশে আকর রে তোর ?
নিঃসংশয়ে ব্রহ্ম-অস্ত্র করিয়াছি দান
ব্রাহ্মণ জানিয়া তোরে,
প্রয়োগ সংহার যার,
একমাত্র জ্ঞাতব্য দ্বিজের ,
ব্রহ্মবিদ্ বেদ-পরায়ণ
বংশগত অধিকারী যার,
অকপটে সেই সিদ্ধ-মন্ত্র
করিয়াছি দান
ব্রাহ্মণ জানিয়া তোরে ।

যদি বাঁচিবার থাকে সাধ—

বল্ প্রতারক,
সত্য কেবা তুই



পরিচয়-রহস্য কি তোর ?
 নহে তোরে ভ্রমপিণ্ডে পরিণত করিব এখনি ।
 কর্ণ । দেব ! সম্বর এ ক্রোধ,
 শিষ্য বলি'
 একবার পদাশ্রয় দিয়েছ দাসেরে,
 নিফল কোর না প্রভু, করুণা তোমার ।
 অকপটে কহি সত্য ভাষ,
 আভাষে বুঝহ যদি মনোব্যথা মোর,
 নহি দ্বিজ=নহি গো ক্ষত্রিয়,
 উচ্চ জাতি হ'তে
 নহেক উদ্ভব মোর ।
 নৌচ আমি,
 জন্ম মম অতি হীনকূলে—
 দীন রাধার নন্দন
 অধিরথ-সূত,
 স্তুতিপাঠ পিতৃবৃত্তি মোর,
 সংস্কার-বর্জিত জাতি ।
 উচ্চ—অতি উচ্চ আশার তাড়নে
 হিতাহিত জ্ঞানশূন্য আমি,
 শুধু আত্মবলে প্রতিষ্ঠার আশে
 সাজিয়াছি প্রতারক ।
 সূত বলি' দ্রোণাচার্য্য ঠেলিল চরণে,
 অভিমানে আত্মহারা,
 শুধু বিঘালাভ আশে,
 করিয়াছি মিথ্যা ব্যবহার

গুরু
 ধরি চরণে তোমার,
 পুত্র বলি'—শিষ্য বলি' ক্ষমা কর মোরে
 জাম । স্মৃতপুত্র তুই
 লভি' জন্ম হীন স্মৃতকুলে
 দেবতা-বাহিত উচ্চ আশা তোর ?
 না—না,
 তাও তো সম্ভব নয় !
 তবে এ আশ্রমে প্রবেশের কালে—
 ভৃগু-বংশধর বলি'
 কেন দিলি পরিচয় ?
 কর্ণ । নিজ বিধি কেন বিধি হও বিস্মরণ ?
 তুমি দ্বিজ করিয়াছ শাস্ত্রের বিধান,
 বেদ বিদ্যাদাতা যেই গুরু
 তাঁর বংশে পরিচয় দিতে
 আছে দেব শিষ্যের এ অধিকার ,
 তেঁই, হে ভার্গব,
 মনে মনে বরি' গুরুরূপে তোমা,
 ভৃগু-বংশধর বলি'
 পরিচিত করিয়াছি মোরে !
 জাম । বুঝিয়াছি সব ।
 কিন্তু শোনু মুখ ।
 বিদ্যা যাহা, তাহা চির সত্য ;
 সত্যের আকর দেব মহেশ্বর
 পুরুষ সুন্দর,

শিব আখ্যা যাঁর,
 বিদ্যা—তঁার স্বরূপ প্রকাশ :
 সত্য ব্রহ্ম,
 বিদ্যা জ্যোতি তঁার ;
 সেই বিদ্যা কিনেছি স্ মিথ্যা বিনিময়ে ।
 শোন মুখ' !
 মেঘাবৃত সূর্য্য সম
 আসন্ন সময়ে তোর
 সমকক্ষ যোদ্ধাসনে দ্বৈরথ-সমরে,
 এই বিদ্যা বিশ্বতির আবরণে রহিবে আচ্ছন্ন !
 কিন্তু তবু চমকিত হেরি' আমি গুরুভক্তি তোর !
 শাপ দিই তোর,
 তবু করি আশীর্বাদ
 এই অপকীর্ত্তি-সনে
 গুরুভক্তি তোর
 ধরা-মাঝে চিরদিন রহিবে প্রচার ।

কর্ণ ।

দেব !
 আশীর্বাদ তব
 শাপক্লিষ্ট জীবনের
 একমাত্র সাধনা আমার ।

জাম ।

যাও অমৃতভাষিণ,
 ব্রহ্মবিদ তাপসের সত্যের আশ্রম
 নহে যোগ্যস্থান তব !
 ব্রহ্ম-অস্ত্র করিয়াছ লাভ,
 রামদত্ত ধনু আজি শোভে স্মৃত-করে,

তবু মম বরে,
 বীৰ্য্যবান্ ক্ষত্রিয়-কুমার
 সমকক্ষ তব কেহ নাহি রবে ভবে ।
 মিথ্যাবাদী সহবাসে অপবিত্র দেহ,
 প্রয়োজন শুচির বিধান ।

উত্তরের প্রহান

চতুর্থ দৃশ্য

উদ্যানমধ্যস্থ শিবমন্দির

পূর্ণা নিরতা পদ্মাবতী

পদ্মা ।

হে মহেশ !
 নিত্য আসি নিত্য পূজি চরণ তোমাব,
 নিত্য নিরুত্তর তুমি ।
 বৃষ্ণিতে না পারি,
 কতদিনে হবে মোর সিদ্ধ মনস্কাম,
 তব বরে
 মনোমত পতিলাভ হইবে আমার ।
 পিতার আদেশে
 স্বয়ম্বর আয়োজন পুরে ;
 অবলা কুমারী—
 বৃষ্ণিতে না পারি
 কার গলে বর-মালা করিব অর্পণ ?
 কেবা সেই জন,
 জীবন যৌবন, দিব ডালি চরণে যাঁহার ?

কহ আশুতোষ,
ধরা-মাঝে কেবা মোর স্বামী ?

দশ্য পরিবর্তন

শ্রুতির বিগ্রহ পরিবর্তিত হইয়া অষ্টনায়িকার প্রকাশ—
উর্ধ্বে হর-গৌরী আসীনা

নায়িকাগণ—

গীত

রক্তগিরি অঙ্গে
হেমহার গৌরী আমার সোহাগে চলিছে রজে ।
ত্রিনয়নে হাসে ভোলা
উগা ত্রিনয়নে চার ।
হাসির লহর, রসের সাগর উজান বয়ে যার ;
যে পূজে গৌরী হর
যনের মত পার সে বর
পদতলে লুটায় রতি মদনমোহন ক্রভঞ্জে ।

মহা ।

তুষ্ট আমি পূজায় রে তোর,
মম বরে শ্রেষ্ঠ বর লভিবি ধরায় ।
সহজাত কবচকুণ্ডল অঙ্গে শোভে যার,
রবিকর ঠিকরে নয়নে,
স্বর্গকর খেলে কলেবরে,
নর-মাঝে নর-শ্রেষ্ঠ পুরুষ প্রবর—
জেনো সতি সেই পতি তোর ।
কর অন্বেষণ,
হ'লে পূর্ণ কাল দেখা পাবি তার ।

• পদ্মা ।

জয় গিরীশবন্দিত সুরনর-নন্দিত
 মণ্ডিত গলে কত ফণি-কণা-মাল ।
 দেব দিগম্বর শঙ্কর স্মরহর
 গৌরীশ্বর লটপট জটা-জাল,
 জাহ্নবী-বারি, শিরসি-বিহারী
 কলুষ হারী—
 শশলাঙ্কিত আধচন্দ্র ভাল ।
 রাধিত-ভূতদল, কণ্ঠে হলাহল
 নিবিড় নীল জ্বিনি তমাল তাল ।
 বৃষবর-বাহন, গজ-চর্মাসন,
 শমন সূশাসন
 নাদিত বাদিত ডম্বর-গাল ।
 দেবেশ মহেশ, যোগেশ উমেশ,
 অশেষ বিশেষ
 নম নম দেব, হর মহাকাল ।

স্তবাস্তে পূর্ব দৃশ্য

পদ্মা । এ কি ! এ কি দেব ! দেখা দিয়ে কোথায় লুকালে ?

স্বকেতুর প্রবেশ

স্বকেতু । এই যে মা পদ্মা ! তোর পূজা শেষ হ'ল ? মহারাজ যে
 তোকেই খুঁজছেন ?

পদ্মা । কেন মা ?

স্বকেতু । পুরোহিতের সঙ্গে পরামর্শ ক'রে তোর স্বয়ম্বরের দিন স্থির
 ক'রবেন !

পদ্মা । মা, আর স্বয়ম্বরের প্রয়োজন নাই ।

সুকেতু। সে কি ! এ তুই কি বল্ছিস্ ?

পদ্মা। মা ! সার্থক তোমার গর্ভে জন্মগ্রহণ ক'রেছিলাম । নিত্য শিবপূজা করি, আজ হর-গৌরী প্রত্যক্ষ হ'য়ে আদেশ ক'রেছেন কে আমার পতি । স্বয়ম্বরের প্রয়োজন নাই ; দেবাদিদেবের নির্দেশে আমিই পতি অশ্বেষণে যাব ।

সুকেতু। পদ্মা, এ তুই কি বল্ছিস্ ? তুই রাজার ঝিয়ারী ; রাজকুলের প্রথামত তোর স্বয়ম্বর হবে, তুই পতি-অশ্বেষণে যাবি কি ?

পদ্মা। কেন মা, এ বিধি তো নূতন নয় । সতীকুলরাণী সাবিত্রীও তো ঋষির আদেশে স্বেচ্ছাকৃত স্বামীর গলে বরমালা দিয়েছিলেন । তিনিও তো মা রাজার ঝিয়ারী ছিলেন । তিনিও তো মা জগতে নারীকুলের আদর্শ । আমি তাঁর চরণোদ্দেশে প্রণাম ক'রে দেবদেব মহাদেবের আদেশে পতি-অশ্বেষণে যাব, এতে বিস্মিত হ'চ্ছ কেন মা ? তুমি মহারাজকে ব'লে সুব্যবস্থা ক'রে দাও । কুল-পুরোহিত আমার সঙ্গে যাবেন, রাজরক্ষী সহচরীগণ আমার রক্ষণাবেক্ষণ করবে, আমি পতি-অশ্বেষণে যাব ।

সুকেতু। সে কি ? কোথায় যাবি ? তুই সোমন্ত মেয়ে—তাকে ছেড়ে দিয়ে আমিই বা নিশ্চিত থাকব কি করে ? আর তুই সে কষ্ট সহ্য করতে পারবি কেন ?

পদ্মা। সহ্যের কথা কি বল্ছ মা ? পুরাণে কি পড়নি—হিমালয়-নন্দিনী জগজ্জননী উমা হরবর লাভের জন্ত কর্কশ পর্বতবাসে নিরশু উপবাসে পঞ্চতপা করেছিলেন । শুষ্কপর্ণ পর্যন্ত আহার করেন নি ব'লে তাঁর আর এক নাম “অপর্ণা” । তিনি এই দুঃসহ কষ্ট সহ্য ক'রেছিলেন কি বৃথা ? তাঁর শিক্ষা কি নিফল ? তবে আমার জন্ত কাতর হ'চ্ছ কেন মা ?

সুকেতু। হাঁরে !—উমা—তিনি হ'লেন মহাদেবী ! তাঁর সঙ্গে আমাদের তুলনা ? আর সাবিত্রী—তিনিও কি আমাদের মত মানবী ছিলেন ?

দেবী-অংশে তাঁর জন্ম, নইলে ঘমের মূখ থেকে কেউ মৃত স্বামী ফিরিয়ে আনতে পারে ?

পদ্মা । সত্য মা ! একজন মহাদেবী আর একজন দেবী-অংশে মহাসতী । তাঁদের সঙ্গে কার তুলনা ? তবে মা, আমরাও তো তাঁদের দাসী ; তাঁদের আদর্শ যদি না গ্রহণ করি, তাঁদের জীবনী কি শুধু পুরাণে পাঠ করবার জন্ম ! মা ! মহাদেবের আদেশ—তুমি অমত ক'রো না, তুমি মহারাজকে ব'লে তাঁর অনুমতি ক'রে দাও ।

বিচিত্রসেনের প্রবেশ

বিচিত্র । অনুমতি আমি দিচ্ছি মা । আমি তোমার কথা শুনেছি, শুনে বুঝেছি, তোমায় যে সুশিক্ষা দিয়েছিলাম তা বৃথা হয় নি । যে মহা আদর্শ লক্ষ্য রেখে তুমি স্বয়ম্বরা হতে যাচ্ছ, আশীর্বাদ করি—সেই আদর্শের অনুরূপ তুমিও জগতে আদর্শ-সতী ব'লে বরণীয়া হও । পুত্র কুলপাবন, কিন্তু স্কন্ধাও কুলকে পুত্রের গায়ই উজ্জ্বল করে । আমি তোমার এই আকাঙ্ক্ষিত স্বয়ম্বরের আয়োজন ক'রে দিচ্ছি ; এস মা, যেন তোমার জন্ম আমার পিতৃ-গৌরব পূর্ণ হয় ।

স্বকেতু । বাঃ, যেমন বাপ তার তেমনি মেয়ে ! আমি যেন কেউ নয় ।

সকলের প্রস্থান

পঞ্চম দৃশ্য

বন

কর্ণ

কর্ণ । বিধি বিড়ম্বনা !
শিখিলাম দিব্য অস্ত্র ষত
দেব নরে অসম্ভব ;
কিন্তু গুরু অভিশাপে
বিদ্যা মৃত্যুকালে নাহি হবে ফলবতী ।
দ্বৈরথ সমরে
কার করে মৃত্যুবাণ রহিবে আমার ,
জানেন অন্তরযামী ।

নিঃসৃত প্রবেশ

নিয়তি । হাঁ গা, তুমি অমন বিষন্ন হ'য়ে আছ কেন ? কি ভাবছ ?

কর্ণ । কে তুমি ললনে ? গুরুদত্ত অভিশাপ লাভের পূর্বে মনে হ'চ্ছে
তোমাকেই যেন আশ্রমের নিকট দেখেছিলেম, কে তুমি ?

নিয়তি । কে আমি ? আগে আমার কথার উত্তর দাও, বলতে পার,
হরিণ কখন সোনার হয় ?

কর্ণ । স্বর্ণমৃগ ! কৈ, কখনও দেখি নি ।

নিয়তি । অথচ পূর্ণব্রহ্ম রামচন্দ্র, যাঁর অজানা এ সংসারে কিছুই নেই,
তিনিই—জানকীর কথায় ধনুষ্কাণ হাতে সোনার হরিণ মারতে
ছুটলেন, মজা দেখেছ ?

কর্ণ । নিয়তি ।

নিয়তি । নিয়তি ! তারই ফলে—সীতাহরণ আর সবংশে রাবণ বধ ।

কর্ণ । সে স্বর্ণমুগ তো মায়া ।

নিয়তি । মায়া । তুমি মায়া, আমি মায়া, এ সংসার মায়ার তারে গাঁথা
বিচিত্র হার ! গ্রন্থির পর গ্রন্থি—খোলবার যে নেই । এক চুল এদিক
ওদিক নড়াবার যো নেই ! ষেটির পর ষেটি—থরে থরে সাজানো
ঘটনা, ভাবলে কি হবে । উপায় নেই, উপায় নেই !

প্রহান

কর্ণ । কে এ উন্মাদিনী ? বোধ হয় কোন জ্ঞানহীনা তাপস-কন্যা !
এ কি ! ঐ অদূরে একটি মুগ বিচরণ করছে না ? হাঁ, মুগই তো ।
তবে গুরুর নিকট হ'তে প্রাপ্ত আমার অব্যর্থ শর-সঙ্কানের প্রথম লক্ষ্য
হ'ক ঐ মুগ ।

নেপথ্যাভিমুখে শরনিষ্ক্ষেপ

নেপথ্যে ঋষি । কে রে দুর্ভক্ত, আমার হোমধেতু-বৎসের প্রতি শর-সঙ্কান
কল্লি ? কে রে হতভাগ্য গো-হত্যাকারী !

কর্ণ । এ কি, কি সর্বনাশ ক'ল্লেম ! মুগভমে গো-হত্যা ক'ল্লেম !

নিয়তির পুনঃ প্রবেশ

নিয়তি । হাঃ ! হাঃ ! মজা দেখছ ? মজা দেখ ? রাগচন্দ্ৰের ভুল
হয়েছিল—জগতের ঈশ্বর, সর্বনিয়ন্তা—তিনিও এড়িয়ে যান নি, তুমি
আমি কোন্ ছার ।

প্রহান

জনৈক ঋষি : প্রবেশ

ঋষি । এই যে কাশ্মুকধারী প্রমত্ত, নিজের বীর্ষ্যবস্তায় এতই উদ্ভ্রান্ত,
আমার হোমধেতু-বৎস বধ করলি । আরে ছুরাচার যজ্ঞ বিঘ্নকারী
নরপাণ্ডুল, আমি তোকে অভিশাপ প্রদান করছি—তুই যাকে তোর
প্রতিদ্বন্দ্বী মনে ক'রে যুদ্ধে আহ্বান করবি—সেই যোদ্ধার সহিত
প্রতিদ্বন্দ্বি চরমকালে মেদিনী তোর বধচক্র গ্রাস করবে !

কর্ণ। এ কি ব্রাহ্মণ, আমার এই অজ্ঞানকৃত অপরাধের
 জন্য আমাকে এ কি দারুণ অভিশাপ দিলেন? প্রভু! দয়া
 করুন, ক্ষমা করুন—মৃগভ্রমে আপনার গো-হত্যা করেছি,
 একটির পরিবর্তে আমি আপনাকে সহস্র সবৎসা গাভী দেব
 প্রতিজ্ঞা করছি, অভিশাপ প্রত্যাহার করুন, আমার জীবন-ভিক্ষা
 দিন্।

ঋষি।

কে তুমি?

কর্ণ।

কেবা আমি?

পরিচয় কিবা দিব!

অতি হীন-কূলে জন্ম মম।

দীন স্মৃতির নন্দন—

কিন্তু ততোধিক হীন অদৃষ্ট আমার!

মহামুনি ভৃগু,

তার বংশধর

রাম অবতার জামদগ্ন্য রাম—

শিক্ষা তার হয়েছে নিষ্ফল।

মন্দ ভাগ্য

ধরি কীটের আকার

ছিন্নদল করিয়াছে জীবন-কুসুম মোর।

হে ব্রাহ্মণ,

তুমি আর তাহে নাহি হান শেল।

বাক্য তব কর প্রত্যাহার

কুবের জিনিয়া দিব রত্নের সম্ভার,

বাহুবলে জিনি, সসাগরা ধরা,

উপহার দিব চরণে তোমার;

মতিমান !

শাপগ্রস্ত আর কোরো না আমারে ।

ঋষি । বৎস, তোমার কাতরতা দেখে আমি যত্ন হ'চ্ছি । বুঝতে পাচ্ছি, অজ্ঞানবশতঃ মৃগভ্রমে তুমি আমার হোমধেহু-বৎস বধ ক'রেছ । কিন্তু যখন তোমায় একবার অভিশাপ দিয়েছি, সে বাক্য তো আর কিছুতেই প্রত্যাহার করতে পারব না ।

কর্ণ । পৃথিবীর বিনিময়েও নয় ?

ঋষি । পৃথিবী কি বলহু ? ইন্দ্র বা বৈকুণ্ঠের বিনিময়েও নয় । তুমি ব্রাহ্মণকে চেন না, তাই তাকে পৃথিবীর প্রলোভন দেখাচ্ছ ! সত্যই ব্রাহ্মণের একমাত্র আশ্রয়, সত্যই তার জীবন, তার তপস্যা । সত্যব্রষ্ট হ'লে প্রজাক্ষয় হয়, প্রজাক্ষয়ে পৃথিবীর ধ্বংস । তাই, যে সত্যাশ্রয়ী নয়, যে মিথ্যাবাদী—সে ব্রাহ্মণকূলে জন্মগ্রহণ ক'লেও চণ্ডালের গায় হয়, অম্পৃশু, অধম ! আমি কি ক'রে এমন বাক্য প্রত্যাহার করি ?

কর্ণ । আর যদি কেহ হীন-কূলে জন্মগ্রহণ ক'রে এই ব্রাহ্মণের মত সত্যাশ্রয়ী হয়, তা হ'লে সে কি তখনও হীন ব'লে পরিগণিত হবে ?

ঋষি । কখনই না । সত্যাশ্রয়ী যে, যে কূলেই তার জন্ম হ'ক, সে ব্রাহ্মণেরই মত সৰ্ব্বপূজ্য, সৰ্ব্বমাণ্য ।

কর্ণ । বেশ । বাক্য যদি প্রত্যাহার না করেন, তা হলে প্রভু বলুন আমার এই গো-বধের প্রায়শ্চিত্ত কি ?

ঋষি । প্রায়শ্চিত্ত—দান । তুমি যে আমায় গো-দান, পৃথিবী-দান করতে চেয়েছ, এতেই তোমার গো-বধ জনিত মহাপাপের প্রায়শ্চিত্ত হ'য়েছে ।

কর্ণ । দানের এত মাহাত্ম্য ? এ ব্রত পালনে কি জাতি ভেদ আছে ?

ঋষি । না । পৃথিবীর মধ্যে শ্রেষ্ঠ ব্রত—দান, আর শ্রেষ্ঠ ধর্ম—সত্যা-পালন । এ ধর্ম পালনে, এ ব্রত আচরণে সকলের সমান অধিকার ।

কর্ণ ।

বুঝিলাম—কেন দ্বিজ শ্রেষ্ঠ সকলের,
 কেন গুরু দিল অভিশাপ ।
 সত্য যদি উচ্চতা জ্ঞাপক,
 সত্য যদি একমাত্র জগৎ-কারণ,
 আয়ুঃ সত্য—প্রজাক্ষয় মিথ্যা ব্যবহারে,
 তবে হে ব্রাহ্মণ,
 করি পণ তোমার সাক্ষাতে—
 আজি হ'তে এই সত্য
 হ'ক একমাত্র আশ্রয় আমার ।
 জন্ম যদি হীন কুলে,
 অতি উচ্চ ব্রত-দান
 আজি হ'তে হ'ক মম সম্বল জীবনে ।
 আজি হ'তে প্রতিজ্ঞা আমার—
 প্রার্থী যাহা করিবে প্রার্থনা,
 সাধ্যায়ত্ত্ব যদি,
 বিমুখ না করিব তাহারে ।
 কক্ষফলে উচ্চতা অর্জন,
 জীবনের পণ মম !
 হে ব্রাহ্মণ,
 দেহ পদধূলি, কর আশীর্বাদ,
 যেন ব্রতভঙ্গ নাহি হয় কভু ।
 বৎস, করি আশীর্বাদ,
 মনোগাধ পূর্ণ হ'ক তব ।

অর্জু

ষষ্ঠ দৃশ্য

মল্লভূমি

ভীম, দ্রোণ প্রভৃতি সকলে সমাসীন

পঞ্চপাণ্ডব ও দুর্য়োধন প্রভৃতি কৌরবগণ দণ্ডায়মান

দূরে বৃক্ষশাখায় একটি পক্ষীর চক্ষু শরবিদ্ধ

ভীম । সাধু ! সাধু ! আচার্য্য ! আপনার শিক্ষাদান সফল । অর্জুন,
অপূর্ব তোমার সন্ধান !

অর্জুন । (দ্রোণাচার্য্য ও ভীমকে প্রণাম করিয়া) দেব, এ আপনাদেবই
আশীর্বাদ ।

দ্রোণ । দুর্য়োধন, দুঃশাসন, তোমরা দেখলে, আমি বৃথা কখনো অর্জুনের
প্রশংসা করি নি । আমার শিষ্যদের মধ্যে আর কেউ এ লক্ষ্যবেধে
সমর্থ হ'লো না, কিন্তু অর্জুন অবলীলাক্রমে লক্ষ্যবেধ করলে । এখন
বুঝতে পারছ কেন অর্জুন তোমাদের মধ্যে ধনুর্কোঁদে শ্রেষ্ঠ ?

যুধি । আচার্য্য ! এ তো আমাদেরই গৌরব ।

দুর্য়ো । (স্বগত) এ অপমান অসহ ।

ভীম । ধনু অর্জুন, ধনু ।

শকুনি । হাঁ হাঁ ধনু !—বলতেই হবে ধনু ! অর্জুনের মত বীর্ষ্যবান্
ছেলেদের মধ্যে আর কে আছে ? সত্যই তো, একরূপ শরসন্ধান করতে
কে পারে ?

কর্ণের প্রবেশ

কর্ণ । আমি পারি ।

শকুনি । (স্বগত) কে এ ? বীরের মত আকৃতি বটে । (প্রকাশে)
কে তুমি ? তোমায় ত কখনো দেখি নি ।

ভীম । তেজঃপুঞ্জ কায়,

রবিহ্রাস্তি খেলে কলেবরে
 ভার্গব কাশ্মুকধারী—
 কে প্রবেশে রঙ্গস্থলে !
 কি নাম তোমার ?
 কহ, কার শিষ্য ?
 রামধনু করায়ত্ত কেমনে রে তোর ?

কর্ণ ।

কর্ণ নাম,
 অঙ্গদেশে বাস,
 পরিচয়—
 ভুবন-বিখ্যাত বীর ।
 হে আচার্য্য ! প্রণাম চরণে ,
 তুমি হেতু—
 যাহে রাম শিষ্য আজি আমি !
 গর্ভ তব—তুমি গুরু অর্জুনের ;
 অস্ত্র পরীক্ষায়
 শ্রেষ্ঠত্ব তাহার হইয়াছে পরীক্ষিত ;
 কিন্তু লক্ষ্যবেধ কালে
 কর্ণ রঙ্গভূমে করেনি প্রবেশ ।
 দেহ আজ্ঞা—
 একচক্ষু বিধিয়াছে পাণ্ডব ফাল্গুনী,
 এ স্ত্রীক্ষ সায়কে
 ঐ পক্ষীর দ্বিতীয় নয়ন করি উৎপাটিত ।

শকুনি । সাধু ! সাধু ! এই যুবকের সংসাহসের প্রশংসা করতেই
 হবে । কি বলেন আচার্য্যামণায়, এর আঁধ না করবায় উদায় নাই ।
 এ পারলেও পারতে পারে ।

দুর্যোধন । (স্বগত) বীর্যবান হয় অহুমান ।

তৃপ্ত হয় প্রাণ

যদি সমকক্ষ হয় অর্জুনের !

কর্ণ । হে আচার্য্য ! নীরব কেন ? অহুমতি করুন ।

কৃপ । নীরবতার কোন কারণ নাই, তবে তোমার পরীক্ষা-গ্রহণের পূর্বে

একটি কথা আমাদের জিজ্ঞাস্য আছে ।

কর্ণ । কি বলুন ?

কৃপ । রাজা বা রাজপুত্র ভিন্ন রাজকুমারের সঙ্গে প্রতিদ্বন্দ্বিতায় পরীক্ষা

দানে আর কারও অধিকার নাই । তুমি কোন্ কুলোদ্ভব, তোমার

পিতা কোন্ দেশের রাজা, এ পরিচয় না জানলে তোমায় তো এ

পরীক্ষায় অহুমতি দিতে পারি না ।

কর্ণ । (স্বগত) হে তপন !

মেঘাবৃত হ'ক কিরণ তোমার,

ঘোর তমঃ ঘেহুক মেদিনী,

প্রলয় ঝঞ্জায় রেণু রেণু করি মোরে,

লুপ্ত কর অস্তিত্ব আমার ।

জন্মগত অপমান বংশ-পরিচয়

যদি চিরদিন দীন করি' রাখে,

কিবা প্রয়োজন এ জীবনের তবে •

কৃপ । বুঝক, এবার তুমি নীরব কেন ? আত্মপরিচয় দিয়ে পরীক্ষায়

অগ্রসর হও । বল, তুমি কে ? কোন্ ভাগ্যবান কৃত্রিম রাজা

তোমার পিতা ?

কর্ণ । নহি কৃত্রিম আমি,

নহি রাজপুত্র ।

কৃপ । তবে কি ব্রাহ্মণ ?

- কর্ণ । না,
 সে ভাগ্যেও নহি ভাগ্যবান্ ।
- কৃপ । তবে তুমি কে ?
- কর্ণ । বৈশ্য আমি স্মৃতবংশধর ।
- কৃপ । তুমি সামান্য স্মৃতবংশে জন্মগ্রহণ করে, ভরতবংশধর এই অর্জুনের
 মঞ্চে প্রতিদ্বন্দ্বিতায় অগ্রসর হ'য়েছ ? হীন-কুলোদ্ভব, তোমার এ
 অসম-সাহস অমার্জনীয় ।
- কর্ণ । অমার্জনীয় ! কেন ব্রাহ্মণ ?
 জন্ম ?
 সে তো চির দৈবের অধীন,
 নহে তাহা ইচ্ছালব্ধ মানবের ।
 স্মৃত কিংবা স্মৃত-পুত্র যে হই সে হই,
 দৈবায়ত্ত কুলে জন্ম,
 কিন্তু পুরুষত্ব করায়ত্ত মোর ।
 আমি কর্ণ, রামদত্ত ধনু অধিকারী
 বীৰ্য্যবলে অর্জুন কি ছার,
 দেব নাগ নর অসুর রাক্ষস
 অবহেলে পারি জিনিবারে ।
 বীরত্ব আমার শ্রেষ্ঠ পরিচয়,
 সেই পরিচয়ে আমি
 পরীক্ষার যোগ্য অধিকারী !
- শকুনি । এ কথাটা বড় মিথ্যা নয় ; যুক্তি আছে বটে ! নিজেদের ইচ্ছেয়
 কেউ তো আর জন্মায় না ; ওটা নিতান্তই দৈব ।
- ভীষ্ম । বীৰ্য্যবান্ হ'লেও যে আত্মপ্ৰাণাকারী, সে হীনচেতা ।
- কৃপ । (কর্ণের প্রতি) স্মৃতপুত্র হ'লেও ক্ষতি ছিল না, রাজা হ'লেও তুমি

প্রতিদ্বন্দ্বিতায় অগ্রসর হ'তে পারতে—এই যুদ্ধশাস্ত্রের বিধি। এ
বিধি লঙ্ঘন ক'রবার সামর্থ্য কারও নাট।

কর্ণ। বেশ, তা হ'লে কোন্ রাজত্ব জয় ক'রে এসে আপনার সঙ্গে
সাক্ষাৎ করব বলুন ?

দুর্যো। তার প্রয়োজন নাই। সকলে তো শুন্লেন অঙ্গদেশে এঁর বাস।
অঙ্গদেশ আমার অধিকারে ; এই মুহূর্তে আমি অঙ্গদেশের সিংহাসন
এঁকে অর্পণ ক'রলেম। ইনি আজ হ'তে অঙ্গাধিপতি কর্ণ—আমার
সখা—মিত্র। এই রাজমুকুট ধারণই এঁর অভিষেকের কার্য সম্পন্ন
করুক।

শকুনি। সাধু, দুর্যোধন, সাধু! সাধু!

কর্ণ। দুর্যোধন! কুরুশ্রেষ্ঠ! তুমি এত মহৎ? অপরিচিত আমি,
আমাকে তুমি সিংহাসন দান করলে? মিত্র ব'লে সম্বোধন করলে?
আজ হ'তে আমারও প্রতিজ্ঞা—আমি বণক্ষেত্রে তোমার শত্রু হার
করব, উৎসবে ব্যসনে বিচার পরিশূণ্য হ'য়ে তোমার মাতা পালন
করব। জীবনের অপেক্ষাও শ্রেষ্ঠ—মর্যাদা; এই স.া-স্থলে সেই
মর্যাদা দান ক'রে তুমি আমার জীবনকে ধন্য ক'রেছ; আমি আজ
হ'তে এ জীবন তোমাকে উৎসর্গ ক'রলাম!

অর্জুন। (স্বগত) হ'ল ভাল,

এত দিনে সমকক্ষ বীর মিলিল আমার।

দুর্যো। আচার্য্য! কর্ণের পরীক্ষা-দানে আর তো কোন প্রতিবন্ধক নেই।

কর্ণ। না। কর্ণ এবার তুমি পরীক্ষা-দানে অগ্রসর হ'তে পার।

ধনুর্কোণহস্তে কর্ণের অগ্রসর হওন

প্রতিহারীর প্রবেশ

প্রতি। দেব! কুন্তী দেবী অসুস্থ হয়েছেন।

ভীষ্ম। বটে? এ অবস্থায় তা হ'লে আর পরীক্ষা গ্রহণ হ'তে পারে না।

মাতা অসুস্থ, আজ এইখানেই সভা ভঙ্গ হ'ক । (স্বগত) দুর্ঘোষনের
সহিত আমার গুরু জামদগ্নোর শিষ্য এই কর্ণের মিলন—এ অগ্নির
সঙ্গে বায়ুসংযোগের গ্যায় ভৌষণ হ'ল !

কর্ণ । (স্বগত) এখানেও ব্যর্থতা । এ জীবনেই ধিক !

দুর্ঘোষ । (কর্ণের প্রতি) চল সখা, সখার আতিথা গ্রহণ ক'রবে চল ।

সকলের প্রস্থান

অলিন্দের উপরে কুস্তীর প্রবেশ

কুস্তী ।

ঐ চ'লে গেল—

অরুণ-ভাস্কর সম কাস্তি মনোহর,

অক্ষয়কবচধারী,

মণিময় কুণ্ডল শোভিত গণ্ড,

সেই সন্তঃপ্রসূ সন্তান আমার,

চাঁদমুখে সেই মৃত হাসি—

লোকলজ্জা ভয়ে খারে,

তাম্রটাটে সিলে ভাসিয়ে দিছি—

জ্ঞানহীনা পাষণী জননী !

আজি, কত বর্ষ পরে—

অনন্তের সুপ্ত স্মৃতি নিমেষে জাগায়,

ঐ চ'লে যায়—মাতৃসত্তে মাতৃহারা —

স্মৃত-আখ্যা-ধারী

অভাগা নন্দন মোর,

অপমান শেল ল'য়ে বুকে ।

জানে না অজ্ঞান,

কি বজ্র হানিয়া গেল অন্তরে আমার ।

পঞ্চ কেশরীর মাতা আমি,
ষষ্ঠ চলে ষুধশ্রেষ্ঠ জ্যেষ্ঠ সবাকার—
পরিচয়হীন, অভাগিনী কুস্তীর নন্দন
নারায়ণ !

সংজ্ঞাহীন ক'রে
কেন পুনঃ জ্ঞান ফিরে দিলে ?
কিবা কৃতি হ'ত
কুস্তী যদি না জাগিত আর ।

দ্বিতীয় অঙ্ক

প্রথম দৃশ্য

হস্তিনা -প্রাসাদ

বিহুর

গীত

কে আর আছে তোমা বিনে

দীনর ব্যথা তুমিই বোধ, তাই ড'ক্‌চি সদা নিশিদিনে।

ভাঙ্গা আমার জীর্ণ তরী, আশা তোমার চরণ হরি,

খেলাব ঘোর তুফানে ভুল না এ হীনের হীন।

আমার বত পার কর দীন, (‘শুধু’) মনে রেখ চরম দিন,

আমি চাই না খ্যাতি চাই না মান, (কেবল) কাঙ্ক্ষাল বলে রেখ চিন।

ভীষ্মের প্রবেশ

ভীষ্ম। দুর্যোধনের আনন্দ দেখেছ বিহুর? হতভাগ্য বুঝলে না, এই

ঈর্ষাই তার মৃত্যুর কারণ হবে; কিন্তু সত্য সংবাদ পেয়েছ তো?

পাণ্ডবেরা সত্যই জতুগৃহ হ'তে পলায়ন ক'রতে সমর্থ হয়েছে?

বিহুর। হাঁ দেব, সংবাদ সত্য। আমি পূর্বে হ'তেই দুর্যোধনের

দুরভিসন্ধি জানতে পেরে, যুধিষ্ঠিরের নিকট গোপনে লোক

পাঠিয়েছিলেম। গোপনে সূড়ঙ্গ-পথ নির্মিত হয়। ভগবানের কৃপায়,

সেই সূড়ঙ্গ-পথ দিয়ে পঞ্চপাণ্ডব, মাত্ৰা কুন্তীব সাহিত সকলের

অলক্ষ্যে পলায়ন করেছে।

ভীষ্ম। তবে যে শুন্‌লেম ছয়টি মৃতদেহ পাওয়া গিয়েছে?

বিহুর। আমিও প্রথমে তাই শুনেছিলেম; পরে অন্তঃস্থানে জেনেছি

পাঁচটি চণ্ডাল তাদের বৃদ্ধা জননীর সঙ্গে জুতুগৃহে পাণ্ডবদের আশ্রয় নিয়েছিল। জুতুগৃহ-দাহে এই ছ'জনেই প্রাণ দিয়েছে।

ভীষ্ম। বল কি বিহুর? আমি যে আর চক্ষে জল রোধ করতে পারছি না। পাণ্ডবদের কল্যাণের জন্তু দুর্ঘোষনের ঈর্ষানলে জীবন আহুতি দিলে ছয়টি চণ্ডাল? বিহুর, আমি যদি কখনো কোন সং কার্যে পুণ্য সঞ্চয় ক'রে থাকি—এই নিরীহ চণ্ডাল কয়টির আত্মার উদ্দেশে আমি তা উৎসর্গ করলেম—তাদের অক্ষয় স্বর্গ হ'ক। পাণ্ডবদের জন্তে আর আমার চিন্তা নাই। পাণ্ডব যে শ্রীকৃষ্ণ-রক্ষিত, এই জুতুগৃহই তার প্রমাণ।

বিহুর। দেব, আশীর্বাদ করুন, যেন পাণ্ডবদের মত আমিও শ্রীকৃষ্ণের কৃপালাভে সমর্থ হই।

উভয়ের প্রস্থান

শকুনির প্রবেশ

শকুনি। এও কি সম্ভব? জুতুগৃহে পাণ্ডবেরা পুড়ে মরেছে? শ্রীকৃষ্ণ-রক্ষিত পাণ্ডব, তাদের অপঘাত—এও কি সম্ভব—দুর্ঘোষন, তুমি এত ভাগ্যবান? আর আমি—আমার ব্রত কি তবে নিষ্ফল হবে? একটি নয়, দু'টি নয়—পঞ্চ দৌপ শিখা, পঞ্চ বাড়ব-অনল, পঞ্চ-ভাই পাণ্ডুর তনয়; সে আগুনে পুড়ে কুরুবংশ ভস্মাভূত হবে, আমি আনন্দে করতালি দিয়ে নাচব—আমার সে আশা পূর্ণ হবে না? এও কি সম্ভব? হৃদয়! স্থির হও। পাণ্ডবেরা মরেছে, একথা পৃথিবীর সকলে বিশ্বাস করুক, তুমি কোরো না।

দুর্ঘোষনের প্রবেশ

দুর্ঘোষা। মাতুল! এতদিনে আমি নিশ্চিন্ত।

শকুনি। কিন্তু আমি তো এখনো নিশ্চিন্ত হ'তে পারছি নি দুর্ঘোষন।

দুর্যো। কেন ?

শকুনি। কেন ? কেন ? দুর্যোধন, মতাই কি পাণ্ডবেরা মরেছে ?

দুর্যো। তোমার এখনো সন্দেহ ? বারণাবত থেকে দূত সংবাদ দিয়ে গেল, সেখানকার নগরবাসীরা হায় হায় ক'রছে, তারা সকলে স্বচক্ষে দেখেছে পাঁচটি দক্ষাবশিষ্ট নরদেহ একসঙ্গে পাশাপাশি শুয়ে আছে, শিয়রে অর্দ্ধদক্ষা কুন্তী—তবু সন্দেহ ?

শকুনি। স্বার্থ এমনি বিশ্বাসী—হাঁ তবু সন্দেহ !

দুর্যো। তবে তোমার সন্দেহ নিয়ে তুমি থাক। ওঃ কি কৌশলই ক'রেছিলেম। কেউ জানত না, জ্ঞাতিবিরোধ নিবারণের জন্য পিতা পাণ্ডবদের বারণাবতে পাঠালেন, আমিহ গোপনে ষবন মন্ত্রী পুরোচনের সঙ্গে পরামর্শ করে জড়গৃহের ব্যবস্থা করলেম। অস্ত্র-পরীক্ষায় অপমান, শিবপূজা নিয়ে অপমান—এত দিনে তার শোধ। আর আক্ষেপ নেই।

শকুনি। দুর্যোধন। দুর্যোধন।

দুর্যো। কেন মাতুল ?

শকুনি। বাতাসে কি শ্মশান-ধূমের গন্ধ পাচ্চ ? অগ্নিশিখা কি আকাশ স্পর্শ করেছে ? মৃতের আর্তস্বরে কি ধরণীর বক্ষ কেঁপে উঠেছে ?

দুর্যো। কতবার বল্ব ? নেই—নেই। পিতা কাঁদছেন, মা হাহাকার করছেন ; কিন্তু মাতুল, কি আশ্চর্য্য দেখ—যে বিদূর আর ভীষ্ম পাণ্ডবগত-প্রাণ ছিলেন, এ সংবাদে তাঁদের চোখে জল নেই। পিতামহ ভীষ্ম বরং কিঞ্চিৎ স্মিয়মান, কিন্তু বিদূর—শোক ত দূরের কথা—এ সংবাদে মুখ যেন তাঁর প্রফুল্ল ! মনুষ্য-চরিত্র যে একেবারেই দুর্কোথা, তা ঠিক।

শকুনি। বটে ? বটে ? দুর্যোধন ! দুর্যোধন ! এ আনন্দ যে আর আমি চেপে রাখতে পাচ্ছি না। হাঃ হাঃ ! মনুষ্য চরিত্র দুর্কোথাই

বটে ! তুমি দেখতে পাচ্ছ না, আমি দেখতে পাচ্ছি—ঐ আগুনের
শিখা লক্ লক্ ক'রে আকাশ ছেয়ে ফেলে। ঐ আর্তনাদ—ঐ
হাহাকার ! হাঃ হাঃ—শকুনি ! আনন্দ কর—আনন্দ কর ! গাঙ্গারী
কাঁদছে, তোমার মুখের হাসি যেন কখনো না ফুরায় !

প্রহান

দুর্ঘ্যো ! এ কি ! অতি আনন্দে মাতুল জ্ঞান হারালেন না কি ?
মাতুল ! মাতুল !

প্রহান

দ্বিতীয় দৃশ্য

উপবন

পদ্মাবতীর সখীগণের গীত

সইনো কি জানি কেমন !

পেতে বাতাসে কাঁদ, চাঁদ ধরা সাধ দেখি নি এমন।

বুঝি ঘুমের ঘোরে কারে দেপেছে

স্বপ্ন ন বুকে এঁকেছে,

টেনেছে প্রাণের টান, বাঁধন নয় তো যেমন তেমন।

পেয়ে কুলের মত কোমল প্রাণ,

ধনুকে দিচ্ছে টান,

থাকে না নারীর মান, বাণ হেনেছে মকর-বেতন।

নিয়তির প্রবেশ

নিয়তি । হাঁগা, হাঁগা ! তোমরা এখানে কি করছ ?

১য় সখী । আমরা তীর্থ করতে বেরিচ্ছি, আজ এই আশ্রমে আছি ।

২য় সখী । না গো না, আমরা বর খুঁজতে বেরিয়েছি ।

নিয়তি । ঠাট্টা করছ ? বর বুঝি বনে থাকে ?

১ম সখী । আমাদের কি যেমন তেমন বর ? মনগড়া বর—হাওয়ায় ,
থাকে, হাওয়ায় ফেরে । তাই দেখছি বনের ফাঁকা হাওয়ায় যদি পাই ।

নিয়তি । এই বনেই থাকবে, না আর কোথাও যাবে ?

২য় সখী । সেটা আমরা জানি নি, আমরা যাঁর সহচরী তিনি জানেন ।

নিয়তি । তোমরা বুঝি সঙ্গে ঘোর ? ঠিক আমার মত, না ?

১ম সখী । তুমি কে তা তো জানি নি !

নিয়তি । আমারও ঐ ঘোরা-রোগ ; সঙ্গেই থাকি সঙ্গেই ফিরি ।

১ম সখী । কার ?

নিয়তি । কার নয় বল ? সৃষ্টির লোকের সন্সারই ।

১ম সখী । কেন ?

নিয়তি । তা জানি নি !

১ম সখী । তোমার বাড়ী কোথায় ?

নিয়তি । জগৎ জুড়ে আমার ঘর ।

২য় সখী । (তৃতীয়ের প্রতি) বোধ হয় পাগল ।

নিয়তি । কি বলছ ? বলছ, আমি পাগল ? ঠিক পাগল নই, তবে
পাগলের মত ! কখনও হাসি, কখনও কাঁদি । বহুরূপী—তাই
কেউ চিন্তে পারে না । জন্মবার আগে আমি, জন্মদিন থেকে আমি,
মরবার সময়ও আমি ; এক তিল ছাড়া-ছাড়ি নেই—এক সূতোয়
বাঁধা ! চ'লেছে—চ'লেছি । বাড়ী থেকে বেরুলে—আমি সঙ্গে ।
মনের মত বর হবে—আমিই ঘটকী । কিসে নেই ? কখন নেই ?
কেউ গাল দেয়—বলে, 'রাঙ্কসী' । কেউ পূজা করে—বলে, 'লক্ষ্মী' ।
কেউ দূর দূর করে, কেউ শাখ বাজিয়ে ঘরে তোলে । আমার সব
তাতেই সমান ।

প্রাণ-হীনা পুতলী সমান

স্বথ দুঃখ সমজ্ঞান,

উন্মাদিনী ভৈরবী কখনো !
 আদেশে আমার বহে কাল-স্রোত,
 হয় নৃপতি ভিখারী,
 রাজ্যেশ্বর দীন,
 ফুৎকারে সাগরে অনল জলে,
 মরু-বক্ষে স্থধার নিব্বর,
 হয় নগরী শ্মশান—প্রাস্তরে উগ্গান—
 অস্তর পাষণ—
 স্থিরচক্ষে সমভাবে নেহারি সকল ;
 যুগ-যুগান্তের স্মৃতি
 ছায়া সম ফেরে সাথে সাথে—
 নাহি মৃত্যু নাহি ক্ষয়,
 আছি—রব চিরদিন—
 অস্তহীন রহস্য অপার !

১ম সখী । ঐ আমাদের সখী আসছে, তোমার যা বলবার শুকে বল, ও
 অনেক জানে ।

পদ্মাবতীর প্রবেশ

পদ্মা । হাঁ লা, কার সঙ্গে কথা কচ্ছিস্ ?

২য় সখী । একটি নতুন মেয়ে । এই শোন না কি বলে, আমরা তো বাপু
 কিছুই বুঝতে পারি নি ।

পদ্মা । তুমি কে গা ?

নিয়তি । তোমার জন্ম-সঙ্গিনী ; তোমাব সঙ্গে আমার খুব ভাব, কেমন ?

পদ্মা । হাঁ, খুব !

নিয়তি । আবার যখন আড়ি দেব তখন ভাব রাখবে ?

পদ্মা । কেন, আড়ি দেবে কেন ?

নিয়তি । আমি কি দিই ? আমার দেওয়ায় । তুমি তো মনের মত বর
খুঁজছ ? তোমায়ই তো সঙ্গে করে নিয়ে যেতে এসেছি ।

পদ্মা । কোথায় ?

নিয়তি । যেখানে তোমার স্বামী ।

পদ্মা । সে কোথায় ?

নিয়তি । আমি যেখানে নিয়ে যাব ।

পদ্মা । তুমি নিয়ে যাবে কেন ?

নিয়তি । নইলে আর কে নিয়ে যাবে ? এই তো আমার কাজ । সবাই
আমার অধীন ; কিন্তু যে একমনে ভগবানকে ডাকে, আমি কেবল
তার দাসী । তুমি একমনে ভগবানকে ডাকছ, তাই তোমায় নিতে
এসেছি, বুঝলে ?

পদ্মা । তুমি কোথায় যাবে ?

নিয়তি । অনেক দেশ তো বেড়ালে ; চল না, পঞ্চালে যাই, আমি পথ
দেখিয়ে নিয়ে যাব । যাবে ?

পদ্মা । (স্বগত) বোধহয় কোন গরীব অনাধিনী—মাথার ঠিক নেই,
পথে পথে ঘুরে বেড়ায় । অনেক দেশ তো বেড়ালেম, পঞ্চাল তো
দেখা হয় নি । এ সেখানে যেতে বলছে কেন ?

নিয়তি । ভাবছ কেন ? পঞ্চালে গেলেই তোমার স্বামীর দেখা পাবে ।

সহজাত কবচকুণ্ডল অঙ্গের ভূষণ যার, সেই তো তোমার স্বামী ?

পদ্মা । তুমি জানলে কেমন ক'রে—তুমি জানলে কেমন ক'রে ?

নিয়তি । আমি জানি নি ? আমি ছায়ার মত তার সঙ্গে ফিরি । আমি
তোমার সঙ্গে কথা কচ্ছি, আমার প্রাণ প'ড়ে আছে সেখানে ।

পদ্মা । তা হ'লে তুমি তাকে দেখেছ ? তুমি তাকে চেন ?

নিয়তি । কাকে না জানি বল, কাকে না চিনি বল ? কিন্তু আমাকে

কেউ চেনে না, বল্লেও বোঝে না—তাই অন্ধকারে থাকি ! ঐ আধার
—ঐ আমার ঘর !

গীত

আমি আধারে বেঁচেছি ঘর আলোর দেশেও পারে ।

ছায়া দি.য় ঘেরা সে যে মরণ নদীর ধারে ।

নাই ঠিকানা কুল-কিনারা

খুঁজতে গিয়ে দিশেহারা

আঁধার রাতে আমাগোনা পথ কি দেখ ই ঘায়ে তারে ।

প্রস্থান

পদ্মা । (স্বগত) যদি উন্মাদিনী হয়, মনের কথা জানলে কেমন ক'রে !

কে এ ? ব'ল্লে পঞ্চালে যেতে ; ক্ষতি কি ? মহাদেবের আদেশে

যখন বেরিয়েছি, তখন ব্রত কখন নিষ্ফল হবে না । এ বালিকা কি

মহামায়ার সঙ্গিনী ? হতেও পারে ।

~~সমস্যা । হীলা, একে বুঝতে পারিনা~~

পদ্মা । না ; কিন্তু যেই হ'ক, এ আমার মনের কথা জানলে কি ক'রে

সখি, চল, এখানকার বাসা তুলে আমরা পঞ্চালের দিকে যাই ।

সকলের প্রস্থান

তৃতীয় দৃশ্য

পঞ্চাল—স্বয়ম্বর-সভা

রাগস্ববর্গ, ব্রাহ্মণমণ্ডলী, ধৃষ্টদ্যুম্ন

ধৃষ্ট ।

হের ভগ্নি, স্বয়ম্বর সভা

ইন্দ্র-সভা জিনি মনোরম !

ক্ষুদ্র এই পঞ্চাল-নগরী

ধন্য আজি মহাজন-সমাগম হেতু,

হের, ভারত-বিখ্যাত-কীর্তি রাজস্ব সকল

সহ সর্বপূজ্য শ্রেষ্ঠ বলরাম
 ষাটব-ঈশ্বর শ্রীকৃষ্ণ মথুরাপতি;
 দ্রোণ, কুপ, মহারথগণ,
 কোরব-গৌরব মহামানৌ রাজা দুর্ঘোষন,
 সমবীৰ্য্য দুঃশাসন পাশে ;
 জরাসন্ধ, শল্য, অঙ্গ-অধিপতি, নৃপতি-ভূষণ সবে,
 জনে জনে পুরন্দর সম, স্বয়ম্বরে সমাগত হেথা
 হের—ঋষিসঙ্ঘ, ব্রাহ্মণমণ্ডলী,
 কুতুহলী হেরিবারে মৎস্যচক্র বেধ,
 আয়োজন যার
 নহিল, নহিবে কভু ধরণী-মাঝারে !

দ্রোপদী । (স্বগত) নাহি জানি কে করিবে লক্ষ্যবেধ এই
 কার গলে বরমাল্য করিব অর্পণ,
 ভ্রাতৃপণে আজীবন দাসী হ'তে হবে কার ।

শকুনি । বিচিত্র সভা—এ সভা স্বর্গেই সম্ভব । তবে আর বিলম্ব কেন ।
 শুভকার্য্য আরম্ভ হ'ক । ত্রেতায় হরধনু ভঙ্গ হ'য়েছিল, ধনুক
 ভেঙ্গেছিলেন রামচন্দ্র । দ্বাপরের শেষে দ্রোপদীর স্বয়ম্বর । ষড়পতিই
 কি আগে ধনুক ধরবেন ?

শ্রীকৃষ্ণ । রাজা বিশ্বত হচ্ছেন কেন ? আমি যে কৃতদার । আমরা এ
 সভায় দর্শকমাত্র ।

শকুনি । তা বোঝার উপর শাকের আঁটি । বৃন্দাবনে ষোলশ' গোপী,
 মথুরায় কল্পিণী, সত্যভামা প্রভৃতি । সমুদ্রের বারি, এক কলসী
 গেলেই বা কি, বাড়লেই বা কি !

ধৃষ্ট । শুন শুন নৃপতিমণ্ডল,
 শুন সভাজন,

শূন্যপথে অবস্থিত মীন
 নিয়ে ঘোরে চক্র অনিবার —
 স্বচ্ছ নীরে স্ফটিক-আধারে
 হের প্রতিবিম্ব তার ।

করিয়াছি পণ

মম দস্ত এই ধনু ধরি’

চক্র-ছিদ্র-পথে করিয়া সঙ্কান

বাণবিদ্ধ করিবে যে তাহে

তার করে করিব অর্পণ

সর্বস্বলক্ষণা ভগ্নী মম

এই যাজ্ঞসেনী—

যজ্ঞ হ’তে উদ্ভব যাহার ।

হও আশুয়ান

বীর-গর্বে গব্বী মহাশূর,

করি’ লক্ষ্যবেধ

বরমাল্য সনে

জয়লক্ষ্মী করহ গ্রহণ ।

শ্রীকৃষ্ণ । রাজশূর্য্যবর্গ, আপনারা নিজ নিজ সামর্থ্য দেখিয়ে, যদি কেহ
 পারেন এই সুকণ্ঠাকে লাভ করবার চেষ্টা করুন । দুর্ঘোষন !
 অগ্রে তুমিই অগ্রসর হও ।

দুর্ঘোষা । (স্বগত) নাহি জানি লক্ষ্যবেধে
 অলক্ষ্যে কি লেখা আছে অদৃষ্টে আমার !
 সুহাসিনী দ্রোপদীর কর
 কিম্বা উপহাস !

ধৃষ্ট । ভগ্নি, ইনি কোঁরব-ঈশ্বর রাজা দুর্ঘোষন ।

দ্রোপদী । (স্বগত) শুনিয়াছি অতি ক্রুর রাজা দুর্ঘোষন,
কি জানি ষড়পি করে এই লক্ষ্যবেধ !

দুর্ঘোষন অগ্রসর হইলেন এবং অকৃতকাৰ্য্য হইয়া, নিজ আসনে বসিলেন
ধৃষ্ট । হের—দেখ,

চক্রাহত বাণ ঠিকরি' পড়িল দূরে ।

শকুনি । বাণও পড়ল, সঙ্গে সঙ্গে মানও গড়াল । দুর্ঘোষনের অবস্থা
দেখে মনে হচ্ছে সহসা কেউ ধমুকে হাত দিচ্ছেন না ।

শ্রীকৃষ্ণ । এবার কে অগ্রসর হবেন ?

শল্য । আমি একবার চেষ্টা ক'রে দেখি ।

ধৃষ্ট । ভগ্নি, ইনি মদ্র অধিপতি শল্য ।

দ্রোপদী । (স্বগত) হীন মদ্রদেশ,

তার অধিপতি !

শল্য অকৃতকাৰ্য্য হইয়া কিরিয়া আসিলেন

জনৈক ব্রাহ্মণ । মহারাজ দুর্ঘোষনের পর উঠাই উচিত হয় নি ।

শল্য । হয় অনুমান—

চক্র ছিদ্রশূন্য ।

শকুনি । হাঁ, আপনার চরিত্রেরই মত !

ধৃষ্ট । আর কেউ সাহস কচ্ছেন না কেন ? মহারাজ শল্য যে ব'ল্লেন, চক্র
ছিদ্রশূন্য, তা নয় । বীরত্ব পরীক্ষার জন্য এই লক্ষ্যবেধের আয়োজন,
এতে প্রতারণা নাই । যদি কেহ আত্মবিশ্বাসী বীর্যবান্ এই সভামধ্যে
ধাকেন, তিনি আসুন, আমি পুনঃ পুনঃ সকলকে আহ্বান করছি ।

কৈ, কেউ ত অগ্রসর হচ্ছেন না ? তা হ'লে কি বুঝাব ধরণী বীরশূন্য ?

ভীম । (যুধিষ্ঠিরের প্রতি জনান্তিকে) ক্রপদ-পুত্রের এ উক্তি অসহ্য ।

কর্ণ । (সহাস্যে) ধরণী বীরশূন্য কি না এইবার তার পরীক্ষা হবে ।

ধৃষ্ট । ভগ্নি, ইনি অঙ্ক-অধিপতি কর্ণ, মহামুনি জামদগ্ন্যের শিষ্য ।

দ্রৌপদী । (প্রকাশে) আমি সূত-পুত্রকে কখনও বরণ ক'রব না ।

শল্য । ঠিক হ'য়েছে । বড় আশ্চর্যজনক ক'রে ধনুক ধ'রেছিলেন, ঠিক হ'য়েছে ।

দুর্যো । তা কখনই হ'তে পারে না ধৃষ্টদ্যুম্ন ! তুমি জাতি-নির্বিচারে সকল

বীরকেই লক্ষ্যবেধে আহ্বান ক'রেছ ; মহাবীর কর্ণ যদি লক্ষ্যবেধ

ক'রতে পারেন, তোমার প্রতিজ্ঞা অনুসারে দ্রৌপদী এ'র হবেন ।

ধৃষ্ট । ভগ্নি !

দ্রৌপদী । কখন না—আমি প্রাণ থাকতে হীন সূতকুলের বধু হ'ব না ।

দুর্যো । তা হ'লে ধৃষ্টদ্যুম্ন মিথ্যাবাদী !

দ্রৌপদী । আমি ক্ষত্রিয়কুমারী—ক্ষত্রিয় কিংবা ব্রাহ্মণের গলে বরমালা

অর্পণই আমাদের কুলপ্রথা । সকলে শুশুন—ভ্রাতৃপ্রতিজ্ঞা-বশে সূতকে

বরণ করবার পূর্বে আমি অনলে জীবন বিসর্জন দেব ।

কর্ণ । (ক্রণেক নিস্তদ্ধ থাকিয়া পরে ধনুর্কাণ দূরে নিক্ষেপ করিয়া, সামর্থ

হাস্যে) সুন্দরি, তোমার অগ্নিতে জীবন বিসর্জন দেবার প্রয়োজন

হবে না । তোমার কুলগর্ভ অক্ষুণ্ণ থাকুক, এই আমি ধনুর্কাণ ত্যাগের

সঙ্গে এই সভা পরিত্যাগ করলেম !

দুর্যো । কর্ণের এ অপমান আমি কখনও নীরবে সহ্য ক'রব না । দেখি

এই সভাস্থলে কে ক্ষত্রিয় কে ব্রাহ্মণ আছেন, যিনি লক্ষ্যবেধ করতে

পারেন ; তারপর উদ্ধতা দ্রৌপদীর শাস্তি আমিই দিয়ে যাব !

শ্রীকৃষ্ণ । সে পরের কথা পরে ; উপস্থিত ক্ষত্রিয়-সমাজ তো দেখছি নিস্পন্দ ।

যাজ্ঞসেনী বলছেন—শাস্ত্রের বিধান—যদি কেউ শক্তিধর ব্রাহ্মণ

থাকেন, এইবার তিনি লক্ষ্যভেদ ক'রে দ্রৌপদীর পাণিগ্রহণ করুন ।

শকুনি । তা হ'লে তো সর্বাঙ্গে দ্রোণাচার্য্যাকেই উঠতে হয় ।

দ্রোণ । নায়ায়ণ ! নায়ায়ণ ! মহারাজ ক্রপদ আমার সহপাঠী বাল্যসখা ;

তঁার কন্যা আমার কন্যা-স্থানীয়া । আমি দুর্যোধনের সঙ্গে এই

স্বয়ম্বর-সভায় এসেছি বিশ্বয়াবিষ্ট হ'য়ে দেখতে, কোন্ বীরশ্রেষ্ঠ এই লক্ষ্যবেধে সমর্থ হন।

শকুনি। বটে বটে, আপনি তবু এসেছেন, ভীষ্মদেব এসেও সভায় বসলেন না, অন্যান্ত্র অপেক্ষা করছেন। কাশীরাজ-কন্যার স্বয়ম্বরের পর প্রতিজ্ঞা ক'রেছেন, নারী নিয়ে বিবাদ যেখানে সেখানে আর তিনি থাকবেন না।

অর্জুন। (জনাস্তিকে যুধিষ্ঠিরের প্রতি) হে জ্যেষ্ঠ! যদি অনুমতি করেন, মনে মনে শ্রীকৃষ্ণ আচার্য্যকে প্রণাম ক'রে আমি লক্ষ্যবেধে অগ্রসর হই।

যুধি। (জনাস্তিকে) ভীম, কি বল?

ভীম। (জনাস্তিকে) এখনি।

যুধি। (জনাস্তিকে) কিন্তু যদি আত্মপ্রকাশ হয়?

ভীম। (জনাস্তিকে) তা হ'লে এই স্বয়ম্বর-সভায় কোরব-বংশ নির্বংশ হবে।

অর্জুন। (জনাস্তিকে) আমরা মৃত ব'লে প্রচারিত, আত্মপ্রকাশের কোন সম্ভাবনা নাই।

যুধি। (জনাস্তিকে) যা করেন শ্রীকৃষ্ণ! ভাই, আমি অনুমতি দিচ্ছি, তুমি বিজয়ী হও!

ধৃষ্ট। আশ্বন—কে সাহস করেন, আশ্বন।

অর্জুন। আমি প্রস্তুত! (উঠিলেন)

শ্রীকৃষ্ণ। (স্বগত) আমি এরই জন্য ব্যাকুল হ'য়ে অপেক্ষা ক'র্ছিলাম।

ভস্মাচ্ছাদিত বহি! সকলকে প্রতারিত করতে পেরেছ, আমায় পার নি। (প্রকাশে) তা হ'লে ব্রাহ্মণ আশ্বন—আশ্বন—দ্বিধার কোন কারণ নেই! যাজ্ঞসেনী তো ব্রাহ্মণকেও বরণ করতে ইচ্ছুক, পাঞ্চালীর বাণ্ধাই পূর্ণ হ'ক—আশ্বন।

অর্জুন অগ্রসর হইলেন

জনৈক ব্রাহ্মণ । হাঁ হাঁ, কর কি ? কর কি ? এ বাতুল কোথা যায় ?

ধ'রে বসাও হে, ধ'রে বসাও ! ওহে, এখনও তো ব্রাহ্মণ ভোজনের

ডাক পড়ে নি, এর মধ্যে উঠে যাচ্ছ কোথায় ?

অর্জুন । কেন ? ব্রাহ্মণও তো আহুত হ'য়েছে ।

ব্রাহ্মণ । টুকটুকে মেয়েটি দেখেছ, আর বুঝি লোভ সম্বরণ করতে পারনি ?

ওহে, শ্রীকৃষ্ণবাসরে বিদায়ের ঘড়া নয়—স্বয়ম্বরে লক্ষ্যবেধ ! বুঝেছ ?

অর্জুন । বহু পূর্বেই বুঝেছি এবং সেই জন্যই অগ্রসর হ'চ্ছি ।

ব্রাহ্মণ । এই সারুলে রে ! কি বিভ্রাট বাধায় দেখ !

অর্জুন । আপনি আশ্বস্ত হ'ন, চিন্তার কোন কারণ নাই, আমি মুহূর্তেকে

এই লক্ষ্যবেধ ক'রব ।

ব্রাহ্মণ । তোমার মুণ্ড করবে, উন্মাদ কোথাকার ।

দ্রোণ । কেবা এ ব্রাহ্মণ ?

দিব্যমূর্তি,

শাল তরু জিনি' দীর্ঘভুজদ্বয়

আয়ত-লোচন

পার্শ্বসম বীৰ্য্যবান হয় অহুমান !

অর্জুন । (ধৃষ্টদ্যায়ের নিকট আসিয়া)

বীর, দেহ অহুমতি—

লক্ষ্যবেধ করি আমি ।

ধৃষ্ট । আসুন ব্রাহ্মণ—এই ধনু গ্রহণ করুন, যদি লক্ষ্যবেধ করতে

পারেন, পাঞ্চালী আপনার পত্নী ।

দ্রোপদী । (স্বগত) অগ্নি-সম তেজো-দীপ্ত দ্বিজ

অগ্রসর লক্ষ্যবেধে !

কেন হৃদি হইল চঞ্চল ?

অর্জুন । নারায়ণ, গুরু, ব্রাহ্মণ ও অগ্রজের চরণে প্রণাম ক'রে এই আমি

কাম্বুক গ্রহণ ক'ল্লেম । সকলে আশীর্বাদ করুন, যেন আমি
লক্ষ্যবেধে কৃতকার্য্য হই ।

দ্রোপদী । (স্বগত) আমারও মন অনুরূপ প্রার্থনাই করছে ।

অর্জুন কর্তৃক লক্ষ্যবেধ—মৎস্য পড়িষা গেল ।

অর্জুন । হের, শরবিদ্ধ মৎস্য এই পতিত হেথায় !

দ্রোণ । সাধু, সাধু ব্রাহ্মণ ।

ধৃষ্ট । হে বীর-কেশরী, দেহ কোল,

পরাজিত ক্ষত্রিয়-সমাজ,

দ্বিজ হয়ে তুমি মান রক্ষিলে আমার ।

যাজ্ঞসেনি,

দেহ মাল্য এই ভাগ্যধরে, বিজয়ীর রাখহ সম্মান—

পণে মুক্ত কর মোরে ।

দ্রোপদী । সাক্ষী করি' অন্তর্যামী প্রভু ভগবান,

সাক্ষী করি' অন্তরীক্ষে দেবতামণ্ডলী,

সাক্ষী করি' সমাগত ব্রাহ্মণ-সমাজ,

তব গলে জয়মাল্য করিহু অর্পণ ;

আজি হ'তে চির আজ্ঞাধীনা তব আমি ।

অন্তরীক্ষ হইতে পুষ্পবৃক্ষ

হৃষ্যে । এইবার কর্ণের অপমানের প্রতিশোধ ! ব্রাহ্মণ, দৈবক্রমে লক্ষ্য-

বেধ করে দ্রোপদীকে তুমি লাভ ক'রেছ—এইবার তোমাকে বধ

ক'রে এই গর্ষিতা দ্রোপদীর উপযুক্ত শাস্তিবিধান ক'রব ।

অর্জুন । যদি পার ক'রো—কোন আপত্তি নাই ।—ক্ষত্রিয়ের বীৰ্য্যবল

তো দেখ্লেম ।

গণ-ব্রাহ্মণ । আবার যে ঠেকলো হে ? এইবার দিলে কাঁচা মাথাটা উড়িয়ে । বাবা বামুনের কপালে মইবে কেন ?

শল্য । স্পর্ধা এই ব্রাহ্মণের, ক্ষত্রিয়-সমাজকে অপমান করে ? আমরা এই ব্রাহ্মণকে পরাজিত ক'রে দ্রৌপদীকে গ্রহণ ক'রুব !

ভীষ্ম । ব্রাহ্মণের সহায় আমরা ; দেখি কে বীর্যবান্ ক্ষত্রিয় আছে যে এই ব্রাহ্মণকে পরাস্ত করে ।

~~কর্ণ~~ । বীর্যবান্ ব্রাহ্মণ কে আছেন, যুদ্ধার্থে প্রস্তুত হ'ন ।

দুঃশা । যুদ্ধ—যুদ্ধ,
 নাহি ক্ষমা ব্রাহ্মণ বলিয়া ।
 সাজ সাজ নৃপতিমণ্ডল,
 আজি বীর্যশুদ্ধে লভিব পাঞ্চালী ।

দুর্যো । আজ দেখছি ব্রাহ্মণেরা কুশাগ্র পরিত্যাগ ক'রে অস্ত্র ধারণে উত্তত । সকলে দুর্কৃত্ত ব্রাহ্মণদের বধ করুন—বধ করুন ।

শ্রীকৃষ্ণ । বীরোচিত বটে ! তোমরা ক্ষত্রিয় বলে পরিচয় দাও, বাহুবলের আশ্ফালন কর—লজ্জা করে না ? এই সামান্য লক্ষ্যবেধে কেউ সমর্থ হ'লে না—আর এই ব্রাহ্মণ নিজ নৈপুণ্যে বীরত্বের সম্মান রক্ষা ক'রেছে বলে, বিনা কারণে সকলে একে শাস্তি দিতে উত্তত ?

শল্য । কথাই সময় নাই, যুদ্ধ—যুদ্ধ !

ধৃষ্ট । ক্ষুদ্র পঞ্চাল নগরী বুঝি ক্ষত্রিয়-কোপানলে ভস্ম হয় ।

অর্জুন । নাহি চিন্তা মতিমান,
 ক্ষুদ্র নহে পঞ্চাল নগরী
 অঞ্চল-ভূষণ পাঞ্চালী যাহার !
 দেহ মোরে অস্ত্রপূর্ণ রথ একখান,
 দেখি এই ক্ষত্র্যমাবে বীর আছে কেবা
 বহে স্থির সম্মুখে আমার ।

ভীম । রথে কিবা প্রয়োজন ?
 ভূজঙ্গয় কাম্বুক আমার,
 শাল বৃক্ষ যোগ্য বাণ তাহে ।

দুর্যো । সকলে আসুন ! অগ্রসর হ'ন, যুদ্ধার্থী ব্রাহ্মণ-বধে কোন পাপ
 নাই ।

শ্রীকৃষ্ণ । নির্লজ্জ ক্রত্নয়ের এই হীন আচরণ আমি কখন সহ করুব না,
 এস দ্বিজ, আমার রথ, আমার অস্ত্র তোমায় দান ক'রুছি, তুমি
 পূর্ণাঘ্ন হ'য়ে এই গর্কিত রাজাদের শাস্তি দাও । এস, পাঞ্চালী,
 জয়লক্ষ্মী স্বরূপ তোমার স্বামীর অনুবর্তিনী হ'ও ।

শকুনি ব্যতীত সকলের প্রস্থান

শকুনি । এ ছদ্মবেশধারী নিশ্চয় অর্জুন !
 হাঃ—হাঃ—হাঃ !

চতুর্থ দৃশ্য

প্রাস্তর—রণস্থলের অপরাংশ

দ্রোণের প্রবেশ

দ্রোণ । দুর্বার সংগ্রাম দেখিয়াছি বহু,
 কিন্তু দেখি নাই কত অদ্ভুত সমর ।
 বিকল অস্তর—
 বুঝিতে না পারি দুর্যোধনে কেমনে রক্ষিব ?
 পঞ্চ দ্বিজ করে মহামার
 হাহাকার চারিভিতে !
 ঐ শল্য ধূল্য লুটায়,
 জরাসন্ধ পলায় সভয়ে !

কোথা অশ্বখামা ?
রক্ষা কর দুর্ঘোষনে ।

দুঃশাসনের প্রবেশ

দুঃশা ।

দেব ! শরজালে আচ্ছন্ন গগন,
ছোটে বাণ নয়ন ধাঁধিয়া
নৃপকুল আকুল সকলে !
বুঝিতে না পারি কোন্ মায়াধারী
যুদ্ধ করে দ্বিজ-বেশে !

দ্রোণ ।

দুঃশাসন, চাল' সৈন্য দক্ষিণে রাখিয়া,
কহ দুর্ঘোষনে ব্যূহ-মুখে রক্ষিতে যতনে ।
নহে দ্বিজ ।
দেখি, ফিরে যম ব্রাহ্মণের বেশে ।

দুঃশা ।

না পালাও ভীকু মেনাদল,
রাখিও স্মরণে কৌরব-রক্ষিত তোমরা সকলে !

প্রস্থান

দুইটি - র দ্রোণাচ ঘোঁর চরণ স্পর্শ করিল

ভীষ্মের প্রবেশ

ভীষ্ম ।

হে আচার্য্য,
অদ্ভুত সময় হেন দেখি নাই কভু ।
একা দ্বিজ যুঝে লক্ষ রাজা-সনে ।
কিষ্কা নহে অসম্ভব ;
দ্বিজ-শিষ্য আমি ভীষ্ম ।
গুরু মম জামদগ্ন্য রাম,
পুনঃ কি হে নব কলেবরে

হইল উদয়,
 নিঃক্ষত্র করিতে ধরা ?
 দ্রোণ । শরমুখে পরিচয় করিয়াছি লাভ ।
 হে গান্ধেয়,
 শুন শুন আনন্দ সংবাদ ।
 নহে দ্বিজ,
 বেশধারী প্রিয় শিষ্য অর্জুন আমার ।
 পাশে ঐ ভীমসেন
 অরাতি সংহার করে --
 নলবন দলে যুধপতি যথা ।
 ভীষ্ম । শুনেছিহু বিদুরের মুখে,
 পেয়ে মুক্তি জতুগৃহ হ'তে
 পঞ্চ ভাই বঞ্চে ছদ্মবেশে ।
 আজি ঘুচিল সংশয়
 প্রত্যাক্ষ হেরিয়া সবে ।
 ওই যুধিষ্ঠির সহদেব নকুল স্মৃতি
 দ্বিজবেশে করে মহারণ,
 রাজগণ প্রাণভয়ে পালায় সকলে ।
 হে আচার্য্য, শিক্ষাদান সার্থক তোমার,
 সার্থক জীবন মম,
 স্বচক্ষে নেহারি' আজি
 ভরত-বংশের ওই পঞ্চ হোমশিখা
 মুখোজ্জল করিয়াছে মোর !
 আমি বটে পিতামহ পঞ্চ পাণ্ডবের—
 গৌরবের অভিধান এই !

চল—দেখি কোথা দুর্ঘোষন,
নিবৃত্ত করিয়া রণে গৃহে ফিরে যাই ।
ষড়পতি দিয়াছেন রথ,
পাণ্ডবের হেতু চিন্তার কারণ নাই ।

দ্রোণ । - দ্বিজগণ করে আশ্ফালন,
ক্ষত্রিয় পলায় ডরে—
এই দেখিলু প্রথম !

ভীষ্ম । ইথে গৌরব তোমার,
তুমি অর্জুনের গুরু
শিষ্য হ'তে গুরুর প্রতিষ্ঠা ।

উভয়ের প্রস্থান

কতিপয় সৈন্তের প্রবেশ

১ম । নহে দ্বিজ, রাক্ষস নিশ্চয়—
ওই আসে ধৈর্যে পলাও পলাও

প্রস্থান

ভীষ্মসেনের প্রবেশ

ভীষ্ম । আরে আরে ভীকু ক্ষত্রদল
যুদ্ধ-মৃত্যু ভুলিয়াছ সবে ?
ছি ছি প্রাণভয়ে কর পলায়ন ?
কোথা দুর্ঘোষন,
অকলঙ্ক কুলে দিলি কালি.
ডুবাইলি ভরত-বংশের মান ?
কিবা ফল, হীনপ্রাণ রাখি ?

যুধিষ্ঠিরের প্রবেশ

যুধি । শুন বৃকোদর,
অনর্থক প্রাণনাশে নাহি প্রয়োজন,

দেখ কোথায় অর্জুন ।
 চল ফিরে যাই কুন্তকার বাসে,
 একাকিনী জননী ভাবেন কত ।
 ভীম । দুর্ঘোষন এখনো জীবিত,
 অতুগৃহ ঋণ হয় নাই পরিশোধ !
 যুধি । আজি শুভদিনে বিষাদ না আন ।
 লক্ষ্যবেধে লক্ষ্মীলাভ ক'রেছে অর্জুন,
 লক্ষ রাজা পরাজিত বাহুবলে তব ;
 হৃষ্ট মনে ক্ষমা করি, সবে, চল গৃহ-মুখে-
 ফিরাও অর্জুনে !

উভয়ের প্রস্থান

পঞ্চম দৃশ্য

নদীতীর

কর্ণ

কর্ণ । ধিক্ ধিক্ শত ধিক্ জীবনে আমার ।
 সভামাঝে উচ্চকণ্ঠে কহিল রমণী—
 স্মৃতপুত্রে না বরিব কভু,
 বিষ-শল্য সম বাণী পশিল অন্তরে,
 দুর্নিবার জ্বালা তার সহিতে না পারি-
 মৃত্যু শ্রেয়ঃ—শতশ্রেণে মৃত্যু শ্রেয়ঃ
 লাহিত জীবন হ'তে ।
 নারী—সেও ঘৃণা করে মোরে
 অম্ম যদি ছুরারোগ্য ব্যাধির সমান—

জীবনের চির সঙ্গী মোর,
 শুধু জ্বালায় কারণ—
 কিবা প্রয়োজন দুর্ভর এ ভার করিয়া
 মৃত্যু—সমদর্শী বন্ধু জগতের
 উচ্চ নীচ ভেদাভেদ বর্জিত স্তম্ভদ
 কোল দেহ মোরে—
 মুছে যাক, ধুয়ে যাক
 দেহ সনে বংশ-গত অপমান এই,
 কলঙ্কের দীপ্ত রেখা—
 স্বার্থময় সমাজের ঈর্ষার সৃজন !

বালকবেশে নিয়তির এবেশ

নিয়তি । হাঁ গা, তুমি ত একজন মস্ত বীর ?

কর্ণ । বীর ? কে ব'লে ?

নিয়তি । তুমিই বল্ছ, আর কে বলবে ? কাঁধে ধনুক, পিঠে তুণ,
 কোমরে তলোয়ার, আবার কি ক'রে বলতে হয় ? তা তুমি এখানে
 একলাটি কি ভাব্ছ ? ওদিকে খুব যুদ্ধ হচ্ছে, আর তুমি বীর হ'য়ে
 এখানে বুলি কেবল ভাব ছু ?

কর্ণ । যুদ্ধ হচ্ছে ! কেন ?

নিয়তি । গায়ের জ্বালায় ।

কর্ণ । সে কি ?

নিয়তি । আবার কি ? ঐ জ্বালাতেই ত সবাই অস্থির ! আচ্ছা তুমিই
 বল না । হাঁ গা সবাই কি সমান ? রাজার মেয়ের স্বয়ম্বর, কত
 দেশের সব বড় বড় রাজা এল, ক্ষত্রিয়—বীর—কিন্তু লক্ষ্যবেধ করতে
 কেউ পারলে না ! এক জন গরীব—বলে বামুন, লক্ষ্য বিঁধলে

রাজকন্যাও তার গলায় মালা দিলে, এই সব রাগ ! নিজেরা পারলে না, দোষ হ'ল সেই বামুনের ; অমনি সব কোমর বাঁধলে বামুনকে মারতে—দেখ দেখি অণায় !

কর্ণ । কোন ক্ষত্রিয় লক্ষ্যভেদ করতে পারলে না ?

নিয়তি । না গো, কে পারবে বল ? সে যে দুর্জয় লক্ষ্য, কেউ পারলে না । সকলে বললে কি জান ? অর্জুন হ'লে পারত, তার মত বীর নাকি কেউ নয় ? আর বললে—পারত কেবল কর্ণ ।

কর্ণ । সকলে বললে কর্ণ লক্ষ্যবেধে সমর্থ হ'ত ?

নিয়তি । বলবে না ? তার মত কে বল ? কিন্তু কি মজা দেখছ, কর্ণ লক্ষ্য বিঁধতে উঠলো । অমনি রাজকুমারী বললে আমি সূতপুত্রকে বিয়ে করবো না—আর কর্ণের লক্ষ্য বেঁধা হ'ল না, সকলে হো-হো করে হেসে উঠলো ! হাজার হ'ক ক্ষত্রিয়ের মেয়ে কি না, তার ঝাঁজ যাবে কোথা ?

কর্ণ । তার পর কি করলে ?

নিয়তি । পালাল, আর কি করবে ? একটা অপমান তো ! তুমিই বল না ।

কর্ণ । আমি কে জান ?

নিয়তি । তুমি না বললে জানব কি ক'রে ?

কর্ণ । আমিই সেই সূত-পুত্র কর্ণ ।

নিয়তি । তুমিই কর্ণ ? আহা ! তুমি যদি ব্রাহ্মণ কি ক্ষত্রিয় হ'তে, তা হ'লে দ্রৌপদী তোমারই হ'ত, না ? তবে কি জান, যার ভাগ্যে যা । নইলে আর কেউ পারলে না, সেই বামুনই বা পারলে কেন ? এখনো দেখি কি হয়, দ্রৌপদীর অদৃষ্টে আবার কি আছে কে জানে ? কি বল ? সবই তো ঐ পোড়া ভাগ্যের খেলা । ভাগ্য মান তো ?

কর্ণ । ভাগ্য—ভাগ্য !

নাহি জানি ছায়া কিংবা মায়া ।
 কোন্ মায়ার সৃজন ;
 নারী কিংবা নর—কি আকার তার,
 পীড়নে ষাহার ত্রস্ত ত্রিসংসার ;
 স্বেচ্ছাচার—শাসন দুর্ব্বার—
 অবহেলা করে পদানত দেবতা মানব !
 নিয়তি—নিয়তি—
 কোথা তার স্থান
 বিশ্ব হ'তে কত—কত দূরে,
 কোন্ স্বর্গে, ভীষণ নরকে,
 কিংবা অন্ধতম রসাতলে ?
 যদি পাই বারেক সন্ধান তার,
 যদি পাই সম্মুখে আমার,
 গুরুদত্ত অসির প্রহারে খণ্ড খণ্ড করি তারে,
 করি দূর জগতের জলন্ত জঞ্জাল ।

নিয়তি । ও ! তুমি দেখেছি বড় রেগেছ ! কি জানি যদি আমার
 ঘাড়েই তরুণ্যাল বসিয়ে দাও ! কাজ নেই, আমি গরীব বেচারী—
 আমার সরে পড়াই ভাল ! স্ত্রীলোক অপমান করে, তার আবার
 আশ্ফালন দেখ !

এহান

কর্ণ ।

রে হৃদয়,
 সহজাত অভেদ্য কবচ
 কোন অভেদ্য পাষাণে গঠন তোমার ?
 কতদূর সহ-গুণ তব ?
 হে তপন,

হৃদয় আনন্দ-নিধি, আরাধ্য আমার,
 পাংশু আবরণে কেন ঢেকেছ বদন ?
 দাঁড়াও দাঁড়াও দেব,
 তুমি ইষ্ট—তুমি সাক্ষী—
 তুমি ক্ষণ রহ স্থির,
 হে অন্তগামী অন্তর্ধামী জগৎ-নয়ন
 এ জীবন ডালি দিই সম্মুখে তোমার—
 স্মৃতপুত্র কর্ণ নাম
 যাক্ মুছে—
 যাক্ মিশে অনন্ত আধারে—
 মৃত্যু হ'ক একমাত্র আশ্রয় আমার ।

পদ্মাবতীর প্রবেশ

পদ্মা । আর তুমি হও একমাত্র আশ্রয় পদ্মার । (মাল্যদান)
 কর্ণ । কে ! কে তুমি ? এ কি ক'লে ? কার গলায় মালা দিলে ?
 পদ্মা । আমার স্বামীর !
 কর্ণ । কে তুমি ?
 পদ্মা । তোমার দাসী ।
 কর্ণ । কি সর্বনাশ করলে ! উন্মাদিনী ? কে তুমি ? তুমি কি জান
 আমি কে ?
 পদ্মা । জানি ; তুমি আমার স্বামী ।
 কর্ণ । না—না,
 স্মৃতপুত্র আমি—
 সর্ব ঘৃণ্য, সর্ব হেয়,
 নীচ—অতি নীচ

পরিচয়হীন—

অধিরথ-সুত, দীন রাধার নন্দন ।

পদ্মা । হ'ক, তবু তুমি মোর স্বামী ।

কর্ণ । শোন উন্মাদিনী,
জীবনের তট-প্রান্তে
করিয়াছি চরণ স্থাপন—
শোন—মৃত্যুকামী আমি ।

পদ্মা । তবু—তুমি মোর স্বামী ।

কর্ণ । কি করিলে বালা ?
কার গলে দিলে কুসুমের মালা ?
ফেলিয়া এসেছি আমি জীবন পশ্চাতে,
হের অন্তগামী রবি ছবি সন্মুখে আমার,
অনন্ত অঁধার আসিছে গ্রাসিতে মোরে—
তুমি চাহ

ফুলদল দিয়া রোধিবারে গতি তার ?

পদ্মা । না, আমি কারও গতিরোধ করতে চাই না । যদি তুমি মৃত্যুকামী হও, কোন ক্ষোভ নেই, কোন দুঃখ নেই । আমি দাসী, তোমার নিকট শুধু এই অধিকার চাই—তোমার সঙ্গে আমাকেও মরণকে বরণ করতে দাও ।

কর্ণ । এ কি আশ্চর্য্য ! স্বয়ম্বর সভামাঝে মুখ ফেরালে যে সেও নারী—
আর তুমিও নারী । আভিজাত্য-অভিমানহীনা, কে তুমি রহস্যের-মত
আমার সন্মুখে এসে দাঁড়ালে ? এখন আমি কি করি ?

পদ্মা । যা তোমার ইচ্ছা ! তুমি মরতে চাও, জেনো, আমিও তোমার
সঙ্গিনী ।

কর্ণ । কিন্তু জান কি সুন্দরি, কি সত্যে আমি আবদ্ধ ? এ পৃথিবীতে

নিজের ব'লে আমি কিছুই রাখি নি। গুরুদত্ত অভিশাপ মাথায় নিয়ে
সংসার-প্রবেশ মুখে প্রতিজ্ঞা করেছি, এ জীবনে প্রার্থীকে কখনও
নিরাশ ক'রব না। স্ত্রী পুত্র, রাজ্য সম্পদ, নিজের দেহ, প্রাণ—
যে যা চাইবে—অবিচারিত চিন্তে তখনই তা দান ক'রব ; এ শুনেও
কি তুমি আমায় বরণ করতে ইচ্ছা কর ?

পদ্মা। আমার তো আর স্বতন্ত্র ইচ্ছা নেই। তুমি সর্বস্ব দানে প্রতিজ্ঞা
করেছ, কিন্তু প্রভু, আমি তোমায় আত্মদান করেছি। তোমারও যে
প্রতিজ্ঞা—শোন স্বামিন্—আজ হ'তে আমারও সেই প্রতিজ্ঞা।

কর্ণ।

সুদর্শনে !

দর্শনে তোমার

মৃত্যু আজ হ'ল পরাজিত ;

লাঞ্ছিত জীবন

ধন্য হ'ল পুণ্য পরশে তোমার।

অভিশাপ—

মৃত্যুকালে রথচক্র গ্রাসিবে ধরণী,

আজি জীবন প্রভাতে

কালচক্র গ্রাসিলে রমণী !

এস এস মৃত্যুহারা সুধা জগতের,

আজি হ'তে তুমি ধর্মপত্নী মোর।

তৃতীয় অঙ্ক

প্রথম দৃশ্য

ইন্দ্রপ্রস্থ—তোরণ-সম্মুখ

দুর্যোধন ও শকুনি

দুর্যোধন। বারবার এ অপমান সহ্য ক'রে বেঁচে থাকার চেয়ে মৃত্যুই শ্রেয়ঃ।

বাল্যকাল থেকে এই পাণ্ডবেরা প্রতি কার্যে আমায় অপমান ক'রছে,—অন্ধ পিতা, বৃদ্ধ পিতামহ ভীষ্ম—সর্বকার্যে তাদেরই প্রশ্রয় দিচ্ছেন। অস্ত্র-পরীক্ষায় অপমান, জতুগৃহ ব্যর্থ, লক্ষ্যবেধে লক্ষ লক্ষ রাজার সম্মুখে দীন ব্রাহ্মণ-বেশী পাণ্ডবের অভ্যাদয়—আর আমি কোরবেশ্বর দুর্যোধন—ভীষ্ম, দ্রোণ, কর্ণ—মহারথী সব সহায় থাকতেও লাঞ্চিত, পরাজিত!

শকুনি। ছোট গাছ একটু বাতাসে ভেঙ্গে পড়ে, কে তা' লক্ষ্য করে? আকাশস্পর্শী বৃক্ষ যখন মাটিতে লোটার, লোকে তখন ককণায় হার হার করে! মহামানী দুর্যোধনের অপমান সকলের দৃষ্টি আকর্ষণ ক'রেছে, বিশেষতঃ এই রাজস্বয় যজ্ঞে।

দুর্যোধন। এরও মূলে—আমার পিতা, ভীষ্ম আর বিদুর।

শকুনি। রহস্য কিছুই বুঝতে পারেন না। পরম আত্মীয়ও শত্রু হয়।

পিতা—পুত্রের কল্যাণই তাঁর একমাত্র কামনা—তিনিও সম্ভানের সর্বনাশ করেন।

দুর্যোধন। কি ক্ষতি হ'ত যদি পাণ্ডবেরা বনে বনে বাস ক'রত?

শকুনি। মহারাজ ধৃতরাষ্ট্র, ভীষ্ম যেই শুনলেন—যে-ব্রাহ্মণ লক্ষ্যবেধ

ক'রেছে—সে অর্জুন, জতুগৃহে পাণ্ডবেরা মরে নি—গোপনে কুন্তকার গৃহে বাস ক'রছে—অমনি বিদুরকে পাঠিয়ে সমাদরে তাদের রাজধানীতে নিয়ে এলেন !

দুর্যো।। মার্কণ্ডেয়ের পরমায়ু নিয়ে জন্মেছিল এই পাণ্ডবেরা !—আমি এখনো বুঝতে পারি না, জতুগৃহে তারা কিরূপে নিষ্কৃতি পেলে। আর দ্রৌপদীর স্বয়ম্বরেই তো পাণ্ডবদের ধ্বংস হ'ত ; কিন্তু কি আশ্চর্য্য, পিতামহ ভীষ্ম অস্ত্রই ধরলেন না। শ্রীকৃষ্ণ নিজের রথ, নিজের অস্ত্র অর্জুনকে দিয়ে মহত্ব দেখালেন।

শকুনি। ঘটনা সবই বিচিত্র ! পুরুষের পাঁচটা কেন—অমন একশ'টা স্ত্রী হয়, স্ত্রীলোকের কখনও পঞ্চস্বামী হয় শুনেছ ? আমি তো প্রথম শুনে বিশ্বাসই করি নি। তার পর বিদুরের কাছে সব রহস্য শুনলেম। কুন্তী—কুটীরে ছিলেন, পাঁচ ভাই ভিক্ষে ক'রতে বেরিয়ে স্বয়ম্বরে একটা কাণ্ড ক'রে দ্রৌপদীকে লাভ ক'রলেন, ফিরে গিয়ে মাকে বল্লেন, “মা আমরা ভিক্ষে থেকে ফিরিছি।” মা বল্লেন, “বেশ ক'রেছ, যা এনেছ পাঁচ জনে ভাগ ক'রে নাও !”—আহা ! মাতৃভক্ত সন্তান, কি আর করে বল। পাঁচজনেই দ্রৌপদীকে ভাগ ক'রেই ভোগ ক'রছেন। চমৎকার ব্যাপার !

দুর্যো।। যাঁর পাঁচ স্বামী, তাঁর ষষ্ঠেই বা ক্ষতি কি ? দ্রৌপদী ! দ্রৌপদী ! মাতুল, আমি এখনও স্বয়ম্বরের অপমান ভুলতে পারি নি।

শকুনি। তার পর এই রাজসূয় ! অপমানের ষেটুকু বাকী ছিল, তা পূর্ণ হ'ল এই যজ্ঞে ! লজ্জায়, অপমানে, ধিক্কারে—দুর্যোধন—কি আর বলব, এ বুকের মধ্যে যে কি ঝড় তা তোমায় দেখাতে পারছি নি। প্রতি নিশ্বাসে অস্ত্রের উত্তাপ ছুটে বেরোচ্ছে ! মহামানী দুর্যোধন—কানে এ ধ্বনি এখন ব্যঙ্গ বলেই মনে হয়। তোমাদের এখানে না এসে, আমার বনেই বাস করা উচিত ছিল।

যুধিষ্ঠিরের প্রবেশ

যুধি। এই যে সুষোধন! ভাই, বৃহৎ কার্যে অনেক ক্রটি বিচ্যুতি
হ'য়েছে, কিছু মনে কোরো না, কিছু মনে রেখো না।

দুর্যো। না—না, মনে কি রাখব?

শকুনি। তবে ঐ কপালের ফুলোটা। যতক্ষণ ব্যথা, ততক্ষণ মনে তো
থাকবেই। আহা, কি সভাই ক'রেছিল ময়দানব! দানবীয় কাণ্ড
কি না? শুভ ক'রতে গিয়ে, হয়ে গেল অশুভ। স্ফটিকের এমন
কারিকুরি—তিন হাত চওড়া দেওয়াল—মনে হ'ল কি না প্রশস্ত
পথ! কি ব'লব, বাবাজীর মাথা—একেবারে নিরেট লৌহপিণ্ড—
নইলে আর কারো হ'লে গুঁড়িয়ে চুরমার হ'য়ে যেত।

যুধি। দানবীয় সৃষ্টি! আমাদের সকলেরই ভ্রম হ'য়েছিল।

শকুনি। আর সত্যিকার জলটা দেখেছ তো বাবাজী, যেন ঘাস বিছান
মাঠ! যেমন দুর্যোধন পা বাড়িয়েছেন, একেবারে এক গলা জল!
চারিদিকে কি হাসির ধুম—বিশেষতঃ দ্রৌপদীর।

যুধি। সভার নিৰ্ম্মাণ-কৌশল দেখে সকলেই চমৎকৃত হ'য়েছিল! এও
আমার সুষোধনেরই গৌরব।

শ্রীকৃষ্ণ, দুঃশাসন ও কর্ণের প্রবেশ

শ্রীকৃষ্ণ। রাজগুবর্গকে বিদায় দিয়ে এলেম, তাঁরা মহানন্দে স্ব স্ব দেশে
প্রস্থান ক'রলেন। কুরুপতি দুর্যোধন! তোমার অভ্যর্থনায় আদরে
আপ্যায়নে সকলেই প্রীত, শতমুখে তোমার প্রশংসাধ্বনি, তুমি
সমাগত সকলেরই মর্যাদা অক্ষুণ্ণ রেখেছ।

শকুনি। হাঁ—হাঁ, মানী নইলে কি মানীর মান রাখতে জানে? মহামানী
দুর্যোধন—কথার কথা তো নয়?

শ্রীকৃষ্ণ। মাতুল ঠিকই ব'লেছেন। দুর্যোধনকে আপনি যেমন চেনেন,

তেমন আর কে বলুন ? গুণমুগ্ধ বলেই তো ছায়ার মত তার সঙ্গে
সঙ্গে আছেন।

শকুনি। (স্বগত) ঠাট্টা করলে না কি ?

শ্রীকৃষ্ণ। আর মহারথ কর্ণ, তোমার প্রশংসারও অন্ত নেই ; এই বিরাট
যজ্ঞে দানে তুমি সকলকে চমৎকৃত করেছ। তোমার দানে ষাচক
মুগ্ধ ; ভীষ্ম প্রভৃতি সকলেই স্বীকার করেছেন। তোমার গায়
মুক্তহস্ত দাতা কেউ কখন দেখেন নি।

কর্ণ। যদুপতি ! তুমি যে যজ্ঞের ঈশ্বর সে যজ্ঞে তো কোন ক্রটি
হবে না—এতে আর আমাদের গৌরব কি ? এ যজ্ঞের গৌরবই
তো তোমার !

শকুনি। তবে কি না, দুষ্টলোকের জিহ্বা বায়ুর মতই মুক্ত, আটকাবার
যো নেই ! আমার সত্য কথা বলাই অভ্যাস ; যেমন শুনেছি, তাই
বলছি। লোকে বলছে, পরের ধন দিলিয়ে সকলেই অমন দাতা
হ'তে পারে।

কর্ণ। বলছে না কি ?

শকুনি। কা'র মুখ চাপা দেবে বল ? বলছে বৈ কি।

কর্ণ। কিন্তু আমি তো—

যুধি। না--না, কেন কুণ্ঠিত হচ্ছ ? আমি তো তোমায় পর ভেবে ভার
দিই নি ; সহোদরের মত প্রিয়জ্ঞানেই, তোমায় স্বভাব জ্ঞানেই,
যদুপতি শ্রীকৃষ্ণের উপদেশেই তোমাকে এই গুরুভার দিয়েছিলাম।
তোমার গায় দানবীর ভারতে আর কে আছে ভাই ?

দুঃশা। তা আপনি যাই বলুন, মাতুল মিথ্যা বলেন নি। এ দানে কর্ণের
সুখ্যাতি অপেক্ষা নিন্দাই হ'য়েছে অধিক।

শ্রীকৃষ্ণ। যদি নিন্দাই হ'য়ে থাকে, সে নিন্দা কর্ণের নয়—আমার ; কেন
না, আমি কর্ণকে এই ভার দিতে বলেছিলাম।

শকুনি । একেই বলে ভাগ্য, ভাল কাজ ক'রেও কর্ণের অদৃষ্টে ঘণ নেই ।
কর্ণ ।

সত্য, হে মাতুল !

চিরদিন মন্দ-ভাগ্য আমি !

কিন্তু যাক্,

করিয়াছি শ্রীকৃষ্ণের আদেশ পালন ;

ভৃত্য আমি,

নিন্দা-স্তুতি সমান আমার ।

করি নমস্কার

রাজীব চরণে যত্নপতি,

দেহ বিদায় আমারে ।

হে পাণ্ডব !

পরিতৃপ্ত যত্নে তোমাদের ;

কৃতজ্ঞতা কি ভাবে প্রকাশি বল ?

যুধি ।

ভাই, সত্য বল, লোকের কথায় তুমি ব্যথিত হও নি ?

কর্ণ ।

(বিষাদ হাস্যে) ব্যথা ?

কোথা ব্যথা—

ব্যথাহারী সম্মুখে যাহার ।

কর্ণের প্রশ্ন

দুর্যো । ভাই, তা হ'লে আমরা এইখান থেকে এই বিদায় গ্রহণ ক'ল্পে'ম,

আর তোমাদের কষ্ট ক'রে আসতে হ'বে না । বহু অতিথি পুরে,

যাও, সকলেই যোগা আদরের প্রার্থী ।

শ্রীকৃষ্ণ । এসো রাজা । দুর্যোধন, বিদায় ।

শ্রীকৃষ্ণ ও যুধিষ্ঠিরের প্রশ্ন

শকুনি । বাবা, হাঁফ ছেড়ে বাঁচ'লেম । এক বিদায়ের ধাক্কায় অস্থির ;

চল, আমরাও ঘরে ফিরি ।

দুর্যো । এখন বুঝতে পাচ্ছি, এ যজ্ঞে আমাদের না আসাই উচিত ছিল ।

দুঃশা । আমার তো মুখ দেখাতে লজ্জা ক'রছে !

শকুনি । কিন্তু মুখ তো দেখাতেই হবে ।

দুর্যো । হাঁ, দেখাতেই হবে । দুঃশাসন, কাতর হ'য়ো না । কাপুরুষ
অপমানে মলিন হয় ; যে বীর, সে অপমানে জ্বলে উঠে । সে বেঁচে
থাকে অপমানের প্রতিশোধ নেবার জন্ত । শোন দুঃশাসন, শোনো
মাতুল—আজ থেকে আমি পিতৃদ্রোহী, মাতৃদ্রোহী, আত্মীয়দ্রোহী !
আজ থেকে আমার আহারে বিহারে, শয়নে স্বপনে, একমাত্র চিন্তা—
পঞ্চপাগুবের মৃত্যু ! পঞ্চপাগুবের উচ্ছেদই আজ থেকে আমার ব্রত !

শকুনি । ছলে হ'ক, বলে হ'ক, কোশলে হ'ক—জেনো দুর্যোধন, এই
ধ্বংস-যজ্ঞে আমি তোমার একমাত্র সহায় । ভীষ্ম নয়, দ্রোণ নয়,
কর্ণ নয়—আমি—শকুনি—এই ধ্বংসের বীজ—বহুদিন হ'তে সংগ্রহ
ক'রে রেখেছি ; কেবল সুযোগের অপেক্ষা করছিলাম । সে আগুন
জ্বলে উঠেছে, তাকে নিবতে দিও না । অপমানের উচিত বিধান
আমিই ক'রব ।

দুর্যো । এস দুঃশাসন, এস মাতুল ।

দুর্যোধন ও দুঃশাসনের প্রস্থান

শকুনি

ধীরে—

ধীরে মিশে কাল অনন্তের কোলে !

কহ অন্তর্যামী, কত দিন—কত দিন আর !

অন্ধকার কারাগারে

বন্দী পিতা গান্ধার ঈশ্বর, সহ শত ভাই মোরা—

বৃদ্ধ শীর্ণ জরাভারে,

মুক্তি দিল মৃত্যু একে একে !

আমি শুধু রহিলাম প্রাণে

পিতৃ-সত্যে আবদ্ধ শকুনি

কুরু-কুলধ্বংসব্রত উদ্ঘাপন হেতু ।

কহ পিতা, কহ, কত দিনে
 শত ভাই দুর্ঘোষন লুটাবে ধরায়,
 শত বিনিময়ে শত—
 কত দিনে ঋণমুক্ত হব আমি ।
 অস্থি তব পরিণত অক্ষের আকারে,
 অতি যত্নে রাখি বক্ষ মাঝে ;
 দধীচির অস্থি সম
 কত দিনে
 এই বজ্রে কুরুচূড়া পড়িবে খসিয়া—প্রতিহিংসা তুষা
 কত দিনে মিটিবে আমার ?
 কহ—কত দিনে
 শত ক্ষুধিতের অন্ন ঋণ
 শুধিবে শকুনি একা ?

এহান

দ্বিতীয় দৃশ্য

প্রাস্তর

নিয়তি

গীত

কালপ্রবাহ চলে ধীরে—ধীরে
 জীবন মরণ ছায়া ভাসে কারণ নীরে ।

কভু কুসুম বিভান

কুহ কুহ পাখী করে গান
 রোদন ধ্বনি কভু ছায় গগন ধিরে ।
 হাসে—হাসে, কভু শিররে তরাসে,
 উন্মাদিনী করে করে আকুল তীরে ।

তৃতীয় দৃশ্য

হস্তিনা

প্রাসাদ-কক্ষ

শকুনি

শকুনি ।

যদি ধৃতরাষ্ট্র হয় অসম্মত ?

অসম্ভব !

ভিত্তিহীন আশঙ্কা আমার ।

স্নেহ—

দুর্কলতা অণু নাম যার—

অনায়াসে বিজ্ঞ জনে করে জ্ঞানহীন,

বিশেষতঃ—পুত্রস্নেহ !

সুরে বাঁধা সুর—

পিতা হেরে পুত্র-হৃদে প্রতিবিম্ব নিজ

সমপ্রাণ হয় দৌহাকার—

পায় লোপ বিচার বিবেক ।

দুর্যোধন বুঝেছে যখন

এই অক্ষৈ পাণ্ডবের হবে সর্বনাশ,

অন্ধ রাজা বুঝিবে নিশ্চয় ;

ফল করে বৃক্ষের নির্দেশ ।

দুর্যোধনের প্রবেশ

দুর্যোধ্য । মাতুল, পিতা সম্মত হয়েছে ।

শকুনি । হ'তেই হবে, হ'তেই হবে, এ আমি জান্তেম্ ।

দুর্যোধ্য । তবে পিতা ব'ল্ছিলেন, এ উপলক্ষে কোন বিরোধ না হয়

শকুনি । এখানে মন আর মুখ এক কথা বলে নি । খেলার কল্পনাই তো

বিরোধ থেকে—আড়ি অর্থাৎ ভাবের অভাব ।

দুর্যো । ভীষ্ম, দ্রোণ ও বিহুর মহা আপত্তি তুলেছিলেন ।

শকুনি । সব মুছে ফেলে দেব, কোন চিন্তা নেই, ভীষ্মও থাকবে না,

দ্রোণও থাকবে না । অস্থিসিদ্ধ !

দুর্যো । রাজসূয় যজ্ঞে যে ঐশ্বর্য দেখিয়ে অপমান ক'রেছে, এই

পাশা খেলায় যুধিষ্ঠিরের সে ঐশ্বর্য সব জয় করে নিতে পার, তা

হ'লে বুঝি তোমার পাশার গুণ ।

শকুনি । চিরদিন এই সাধনা ক'রে এসেছি । যদি ইন্দ্র কি কুবের

আমার সঙ্গে পাশা খেলায় বসেন, তাঁদেরও সর্বস্ব খুইয়ে পথের

ভিখারী হ'তে হবে—পঞ্চপাণ্ডব তো কোন্ ছার !

দুর্যো । আমি বিহুরকে পাঠিয়েছি, এই দ্যুত ক্রীড়ায় যুধিষ্ঠিরকে

নিমন্ত্রণ ক'রতে ।

শকুনি । বিহুর যে বড় সম্মত হ'ল ?

দুর্যো । পিতা ব'লেন—ধর্মভীরু—জ্যেষ্ঠের আজ্ঞা অমান্য করতে

পারুলেন না ।

শকুনি । বেশ, এখন সভার আয়োজন । পাশার নেশা—একবার ছক

পাততে পারলে হয় । ঘুরিয়ে দেব, সব ঘুরিয়ে দেব ! যুধিষ্ঠির,

ভীষ্ম, অর্জুন—সব ধেই ধেই নাচতে আরম্ভ ক'রবে ; আর তেমন

তেমন হয় তো দ্রৌপদী বাদ যাবে না !

ভীষ্মের প্রবেশ

ভীষ্ম ।

বৎস,

এখনো বুঝিয়া দেখ,

ভ্রাতৃদ্বন্দ্ব কভু নাহি কলে শুভফল

অস্তুর বিকল—
 বৃদ্ধ আমি,
 ভবিষ্যৎ নেহারি শিহরি ।
 পাণ্ডু আর ধৃতরাষ্ট্র,
 দুই জামু পরে দুই ভাই,
 সংসার-বিরাগী ভীষ্মের দুইটি বন্ধন,
 তাদের বংশধর তোরা,
 স্নেহ-নীড়ে ক'রেছি বর্ধিত—
 নীচ ঈর্ষা করিয়া পোষণ
 সেই বংশমূলে
 নিজ করে না হান কুঠার ।
 অতি ধীর পঞ্চ ভাই পাণ্ডব তনয়,
 সদা ধর্ম্মে মতি
 অনর্থক তাদের কোরো না পীড়ন ।

দুর্ঘো। পিতামহ কেবল পাণ্ডবদেরই ধার্মিক দেখেন। আমরা কি
 অধার্মিক? ক্ষত্রিয়ের পক্ষে যুদ্ধও যেমন শাস্ত্রবিধি, অক্ষ-ক্রীড়াও
 তেমনি নীতি-বিরুদ্ধ নয়। এতে পীড়নই বা কি আর আশঙ্কাই বা
 কি? শাস্ত্রকারেরাই এ কথা ব'লে গেছেন।

ভীষ্ম। সকলের চেয়ে বড় শাস্ত্রকার বিবেক। কোথাও ধর্ম্ম, কোথাও
 অধর্ম্ম, শাস্ত্রের সূত্র দিয়ে সব সময় তা' বোঝা যায় না। হৃদয়ের
 অপেক্ষা মীমাংসাকার আর নাই। দুর্ঘোখন, আমার ইচ্ছা ছিল, এই
 দ্যুত-ক্রীড়ায় তুমি না প্রবৃত্ত হও।

দুর্ঘো। আপনি, আচার্য্য দ্রোণ, পিতৃব্য বিহুর, ঔদের পরামর্শ শুনে
 কাজ কর্তে গেলে আমার বাণপ্রস্থে বেতে হয়। পাণ্ডবেরা আপনাদের
 প্রিয়, আমরা চক্ষুশূল!

শকুনি । না, না, গুঁরা বৃদ্ধ হ'য়েছেন, পরকালের চিন্তা অধিক, তাই
আশঙ্কা করেন ।

দুর্যো । আমি সব বুঝি । রাজসূয় যজ্ঞ উপলক্ষে আমাকে যখন অপমান
ক'রবার সঙ্কল্প ক'রেছিল—কৈ, তখন তো পাণ্ডবদের কেউ নিবারণ
করেন নি ? আমি ধর্ম ও জানি, অধর্ম ও জানি, কিন্তু তাতে আমার
প্রবৃত্তি নিবৃত্তি নাই, আমার হৃদয় যা বলবে আমি তাই ক'রব ।
শত ভীষ্ম, শত দ্রোণ, শত বিদুর, আমায় সঙ্কল্পচ্যুত করতে পারবেন
না । এস মাতুল, সভার আয়োজন করি ।

শকুনি । প্রণাম, ভীষ্মদেব । কুরুবৃদ্ধ আপনি, আশীর্বাদ করুন—যেন
আমার মনোবাঞ্ছা পূর্ণ হয় ।

শকুনি ও দুর্যোধনের প্রস্থান

ভীষ্ম ।

সত্য সত্য—

বৃথা চেষ্টা মানবের,

বৃথা আকুলতা ।

বৃথা শাস্ত্রের শাসন !

ধর্মাদর্শ প্রবৃত্তি নিবৃত্তি

অর্থহীন শব্দ আড়ম্বর !

সর্বজীবে সর্ববিশ্বে স্বাবর জঙ্গমে,

সর্বকার্যে সকল কারণে

বিদ্যমান তুমি হ্রষীকেশ !

অহি-দস্তে তুমি বিষ,

তুমি সূধা জননীর হৃদয়-আধারে ;

হাসি অশ্রু—একাধারে মূরতি তোমার !

ভুলে যাই, তাই কাঁদে প্রাণ,

হই আতঙ্কে আকুল,

অহঙ্কারে হই দিশেহারা !
হৃদিস্থিত তুমি স্বধীকেশ,
অখিলের বিকাশ বিনাশ,
অধঃ উর্দ্ধে সম্মুখে পশ্চাতে
লহ প্রণাম আমার !

প্রহান

চতুর্থ দৃশ্য

ইন্দ্রপ্রস্থ—উদ্যান

দ্রৌপদীর সখীগণের গীত

মাধব, রেখো চরণে—

যুবতী ধরম স'পেছি তোমারে

চিরদিন থেকে স্মরণে ।

যেতে চাও যাও যতেক দূরে

আসন তোমার যতনে পাতিয়া রাখিব হৃদয় পুরে

তুমি এস ওগো এস আপন ভাবিধে

ভুলো না জীবনে মরণে ।

প্রহান

শ্রীকৃষ্ণ ও দ্রৌপদীর প্রবেশ

শ্রীকৃষ্ণ । সখি, তা হলে আমার বিদায় দাও, বহু কার্য্য ফেলে এসেছি ।

রাজসূয়ে বহু আনন্দে দিন কেটেছে, আর তো বিলম্ব করতে পারি

না ; আবার আসব, আবার দেখা হবে ।

দ্রৌপদী । তোমার কার্য্য তুমি জান যতপতি, আমি তোমায় বিদায়

দিতে পারব না !

শ্রীকৃষ্ণ । যুধিষ্ঠির, ভীষ্মার্জুন সকলের নিকটেই বিদায় নিয়ে এসেছি,

না ছেড়ে দিলে আমি তো যেতে পারি না ।

দ্রৌপদী । আখি-জল ক'ঠ করে রোধ,

কেমনে বিদায় দিব ?

সখি বলি' সম্বোধন করিয়াছ মোরে,
হইয়াছে সার্থক জীবন ;
আর কিছু নাহি চাই চরণে তোমার ।
দেখো সখা, তুলো না সখীরে কভু ।

শ্রীকৃষ্ণ ।

তুলিব তোমাতে ?

বৃথা এ আশঙ্কা সতী,
অভিন্ন পাণ্ডব কৃষ্ণ ।

তবে কেন অভিমান ?

আছি—রব চিরদিন বঁধা ।

দ্রৌপদী ।

কথায় কে আটিকে তোমাতে ?

চিরদিন তুমি প্রতারক, মিথ্যা নহে এই বাণী ।

শ্রীকৃষ্ণ ।

যদি হই প্রতারক,

প্রতারণা শিখেছি নারীর কাছে ।

রেখো মনে—দাও গো বিদায় ।

দ্রৌপদী ।

লহ প্রণাম আমার ।

পুনঃ কবে দেখা হবে ?

শ্রীকৃষ্ণ ।

যখনি ডাকিবে ;

আসি তবে ।

প্রস্থান

দ্রৌপদী ।

কি যে ব্যথা বিরহে তোমার,

সেই জানে,

যারে ভালবাসিয়াছ তুমি !

তুমি কাঁদাও সকলে,

কিন্তু কারো তরে প্রাণ কাঁদে কি তোমার ?

তুমি জান মহিমা আপন,

অজ্ঞ নারী

আমি শুধু জানি চরণ তোমার !

যুধিষ্ঠির, ভীম ও অর্জুনের প্রবেশ

যুধি । যদুপতি চ'লে গেলেন, আর দুর্যোধনের নিমন্ত্রণ নিয়ে পিতৃক
বিহুর এসে উপস্থিত হ'লেন । যুহুর্ভ পূর্বে এলে কর্তব্য নির্ধারণ
শীক্রুই ক'রতেন । এখন কি করি ? দ্যুত-যুদ্ধে আহ্বান—এ
তো প্রত্যাখ্যান ক'রতে পারি না !

ভীম । এ অক্ষ-ক্রৌড়ায় দুর্যোধনের কিছু দুর্ভিসন্ধি আছে ।

অর্জুন । অনুমানের উপর ত সত্যাসত্য নির্ধারণ করা যায় না ।

যুধি । তা হ'লে নিমন্ত্রণ গ্রহণ করি, কি বল ?

অর্জুন । আপনি এ কথা আমাদের জিজ্ঞাসা ক'রছেন কেন ? আপনি
রাজা, আমরা আপনার অনুগামী ভূত্য !

ভীম । নিমন্ত্রণ গ্রহণ না ক'রলে দুর্যোধন মনে ক'রবে, আমরা ভয়ে তার
নিমন্ত্রণ গ্রহণ করি নি ।

যুধি । তোমাদের সকলেরই তা হ'লে এই মত ? পাঞ্চালি, তোমার কি
অভিপ্রাধ শুনি ?

দ্রৌপদী । যখন তোমার আদেশে অর্জুন লক্ষ্যবেধ ক'রেছিল, তখন কি
আমার মতামত জিজ্ঞাসা ক'রেছিলে ? স্বয়ম্বর সভায় যখন লক্ষ
রাজাকে পরাস্ত ক'রেছিলে, তখন কি আমার মতামত জিজ্ঞাসা
ক'রেছিলে ? তবে আজ এ রহস্য কেন ?

যুধি । ধর্মপত্নী যে মন্ত্রণায় সচিব ।

দ্রৌপদী । দাসীও বটে ।

যুধি । না না, নহ দাসী,
সর্ব অধীশ্বরী তুমি ।

ভীম । তা হ'লে আমি পিতৃব্য বিজুরকে ব'লে আসি যে, আমরা প্রস্তুত ?
 যুধি । না না, চল, সকলে এক সঙ্গেই যাই ।

দ্রৌপদী ব্যতীত সকলের প্রস্থান

দ্রৌপদী । যুদ্ধ বা ক্রৌড়ায় ক্ষত্রিয়ের সম উল্লাস, ক্ষত্রিয়ের চরিত্রই
 বিচিত্র !

নিয়তির প্রবেশ

নিয়তি । তোমার পাচ স্বামী পাশা খেলতে চলল, তুমি বেশ আছ !

চোখে জল নেই, কাঁদছ না !

দ্রৌপদী । কেন, কাঁদব কেন ?

নিয়তি । রাজসূয় যজ্ঞে বড্ড হেসেছ, একটু কাঁদবে না ? কাঁদবে—কাঁদবে

—খুব কাঁদবে । তোমার—চোখের জলে আগুন জলবে! এক এক

ফোটা জল দাবানলের সৃষ্টি ক'রবে ! তুমি আর কাঁদবে না !

দ্রৌপদী । কে তুমি এমন অমঙ্গলের কথা ব'লছ ? তোমায় তো কখনো

দেখি নি, তোমার কথা শুনে আমার বুক কেঁপে উঠল কেন ?

নিয়তি । ধরিত্রী কাঁপিবে ;

সরিং সাগর,

অভভেদী স্মেরু-শিখর,

তারামালা চন্দ্রমা তপন,

বাতাহতপত্র সম সঘনে কাঁপিবে,

দিকে দিকে দিগঙ্গনা

হাহাকারে ধরধরি উঠিবে কাঁপিয়া—

আজি সূচনা তাহার ।

অভীতের ষবনিকা পারে,

মন্দাকিনী তরঙ্গ লহরে,

মায়াবিনী আধি-নৌবে
 ভেসেছিল প্রক্ষুটিত কনক কমল,
 অদূর ভবিষ্যে—
 দর বিগলিত ওই তব নয়নের ধারে,
 ফুটিবে অনল-পদ্ম—
 ভ্রম সম দুর্মহ কক্রিয়-দল
 সে আগুনে হবে ছারখার—
 আজি সূচনা তাহার—
 কাঁদ—কাঁদ নারি !
 কাঁদ উচ্চরোলে,
 ধক্-ধক্ দাবানল জলুক ভীষণ ।
 ভস্ম হ'ক অত্যাচারী নর ।

এহান

ত্রোপদী । কে এ অপরিচিতা আমার আনন্দের ঘর এক নিশ্বাসে শুঁড়ে
 দিয়ে গেল !

এহান

পঞ্চম দৃশ্য

হস্তিনা—কুরুসভা

ধৃতরাষ্ট্র, ভীষ্ম, দ্রোণ, কৰ্ণ, বিদুর, দুৰ্য্যোধনাদি,
যুধিষ্ঠিরাদি ও শকুনি, এতিকাশী ইত্যাদি

দুৰ্য্যোধন ।

হে মাতুল, অদ্ভুত নৈপুণ্য তব—

অক্ষ নহে,

জয়লক্ষ্মী পাশার আকারে—

নিমেষে জিনিলে সব !

কহ যুধিষ্ঠির,

রাজসূয়ে ক্ষটিক তোরণ

হইয়াছে ধূলিসাৎ ?

রাজত্ব সম্পদ

হারাইলে সকলি অকালে ।

বিনা পঞ্চ ভাই,

আছে কিহে আর কিছু রাখিবারে পণ ?

ভীষ্ম ।

নিশ্চয় এ মায়া-অক্ষ নাহিক সন্দেহ,

মায়াধর শকুনি নিশ্চয়,

মায়াবলে দুরাচার জিনে বার বার—

অন্ত অক্ষ ল'য়ে কর খেলা ।

শকুনি । তা' তো নিয়ম নয় । যে পাশা নিয়ে আরম্ভ হয়েছে, সেই

পাশাতেই শেষ ক'রতে হবে । ভীষ্মসেন ! দুরাচার ব'ল্ছ বটে, কিন্তু

যুদ্ধনীতি তো কিছু কিছু জানি । ভাল, সভাস্থ সকলে বলুন, আমি

যা বলছি তা যদি সত্য না হয় এই পাশা ফেলে দিয়ে উঠে যাচ্ছি । যুদ্ধে

বা ক্রীড়ায় যে ভয় পায়, তার সঙ্গে সন্ধি করারও একটা নিয়ম আছে ।

যুধি ।

মায়া যদি হয়,
কিবা ক্ষতি তাহে ?
এ সংসার মায়ার আগার—
অলক্ষ্যে বসিয়া মায়া ফেলে অক্ষপাটী,
মস্তমুগ্ধ খেলে নর মায়ার নির্দেশে !
ভাল, সন্ধি করিব মাতুল,
আগে সন্ধিক্ষণে
বলি হ'ক পঞ্চ পাণ্ডুর তনয় !

শকুনি । হাঁ হাঁ, এই তো বীরের মত কথা ! এই তো চাই । তা'হলে
কি পণ করবে ? পণ কর ।

যুধি ।

এবারের পণ—
যদি হারি
পঞ্চ ভাই
কৌরবের দাসত্ব করিব অঙ্গীকার ।

শকুনি । কতদিনের জন্ম দাসত্ব স্বীকার করবে ? আজীবন বোধ হয় ?
ধৃত । থাক থাক, আর কাজ নেই, যথেষ্ট হয়েছে ; বৎস দুর্ঘোষন, এইবার
ক্ষান্ত দাও ! আজীবন দাসত্ব—বড়ই গর্হিত, বড়ই গর্হিত !

শকুনি । রহস্য—রহস্য ! বুঝেছেন কৌরবেশ্বর, সব রহস্য । দাস বললেই
কি দাস হয় ? আজীবন না হয়—যুধিষ্ঠির বারো বৎসরের জন্ম দাসত্ব
অঙ্গীকার করুন । বারো বৎসর এমন কি বেশী ?

ধৃত । বারো বৎসর রাজপুত্রেরা দাস হ'য়ে থাকবে ?

শকুনি । তার স্থিতি কি ? আমিও তো হারতে পারি ?

ধৃত । বারো বৎসর ! বড় বেশী হ'ল—বড় বেশী হ'ল ।

দুর্ঘোষ । পিতা স্থির হ'ন, দেখুন না পরিণাম কি হয় ।

বিহুর । পরিণাম দিব্যচক্রে দেখতে পাচ্ছি, পরিণাম ধ্বংস !

দুর্ঘো। এ সভাম্বলে ভিক্ষকের কিবা প্রয়োজন ? যান পিতৃব্য, আপনার
কুটীরে বসে কৃষ্ণ নাম করুন।

বিহর। ভীষ্ম, দ্রোণ, নীরব সকলে ?
কেহ নাহি কবে নিবারণ ?
মায়া-অক্ষে খেলিছে শকুনি,
অভিসন্ধি তার বুঝিবারে নাহি।
দুর্ঘোধান, শুনহ বচন,
বিষ সংহরিয়া
পঞ্চ নাগ, পঞ্চ জ্ঞাতি তব,
পঞ্চ পাণ্ডুর কুমার
বসি আছে স্থির—
নুখে তার স্ব-ইচ্ছায় অঙ্গুলি প্রদান
কভু নাহি কর—
এখনও নিবৃত্ত হও।
আমি দরিদ্র ভিক্ষুক,
সত্য বটে
রাজসভা নহে যোগা-স্থান মোর।
দুর্নীতির সহবান তাজিতে উচিত।

এহান

দুর্ঘো। আমার আত্মীয় নন, বিহর আমার চির-শত্রু। ভাল, ছাদশ
বৎসরের জন্ম দাসত্ব স্বীকার, এইবার যুধিষ্ঠিরের পণ হ'ক ! মাতুল
আপনি ভাগ্য পরীক্ষা করুন।

শকুনি। শুষ্ক অস্থি হও সঞ্জীবিত !
বহুদিন শুষ্ক তুমি, আকুল তৃষ্ণায়—
আজি প্রাণ পুরে মিটাও পিপাসা !

হাঃ—হাঃ !

প্রত্যক্ষ আমার অক্ষ—

দেখ ভাগ্যপটে লিখিয়াছে শঙ্কুনির ভয় ।

দুর্যো ।

সাবাসি মাতুল !

কহ যুধিষ্ঠির,

আর কিবা করিবে হে পণ ?

কর্ণ ।

আছে মাত্র দ্রৌপদী সম্বল !

ভীষ্ম ।

আরে হীন রাধার নন্দন,

এত শর্করা তোর !

কুললক্ষ্মী মা আমার পঞ্চাল-নন্দিনী—

নীচ তুই, সূত-অগ্নে বর্জিত শরীর,

হীন রসনায় তোর

উচ্চারণ করিস্ পামর

ভরত-বংশের কুলবধুর নাম—

মর্যাদা যাহার

ঈর্ষা করে সুরনারী নন্দনে বসিয়ে ।

ধিক্ ধিক্ কি কব অধিক তোরে—

বংশোচিত বুদ্ধি তোর আরে রে অধম !

ধৃত । থাক্ থাক্ কাজ নেই, কুলবধু—কুলবধু ! দুর্যোধন, মা আমার
কুলবধু !

দুর্যো ।

পিতামহ, রহ স্থির,

রাজাজ্ঞায় সভাসীন তোমরা সকলে ।

আমি কহি—

নহে কর্ণ,

আমি কহি,

স্তন যুধিষ্ঠির,

- শ্রৌপদীয়ে রাখিবাৰে পণ,
সম্মত কি তুমি ?
- ভীষ্ম ।
দুৰ্য্যোধন,
এইবাৰ নিৰুন্তৰ কৰিয়াছ মোৰে ।
- ভীষ্ম ।
ৰাজা !
- যুধি ।
নহি ৰাজা—দাস মোৰা, শ্ৰদ্ধা স্ৰবোধন,
দাস মোৰা পঞ্চ ভাই ।
ভাল হে মাতুল,
কৰিলাম পাঞ্চালীয়ে পণ !
- শকুনি ।
ভাল ভাল,
দেখ অক্ষ কিবা কহে ?
হেৰ দেখ, স্ৰগ্ৰসন্ন ভাগ্য কৌৰবেৰ,
পৰাজিত যুধিষ্ঠিৰ !
- দুৰ্য্যোধন ।
হে মাতুল, দেহ পদধূলি,
তুমি আজ
উড়াইলে কৌৰবেৰ গৌৰব-নিশান,
ৰাজস্বয়-অপমান শোধ দিলে !
- শকুনি ।
শোধ—শোধ—ঋণ শোধ—
এই বটে সূচনা তাহাৰ !
দুৰ্য্যোধন !
কৌৰব-ঈশ্বৰ !
শুক আস্থ তৃপ্ত এত দিনে !
ওই দেখ—
ক্ষুধাতূৰ কাতৰ নয়নে চাহে ,
ওই শুন—

‘ঋণ শোধ’—‘ঋণ শোধ—’
 শুধু কঠে উঠে ধ্বনি অবিরাম,
 চারিভিতে প্রতিধ্বনি তার
 - করে হাহাকার !
 তুমি তৃপ্ত—আমি তৃপ্ত—তৃপ্ত পিতৃলোক !
 ঋণ শোধ বুঝি হয় এত দিনে ।

শকুনির প্রস্থান

দুর্যো। তা হ’লে যুধিষ্ঠির ! আর সময় আসনে কেন ? যাও, রাজমুকুট
 পরিত্যাগ ক’রে পঞ্চ ভাই দাস-যোগ্য স্থানে বোসো গে ।

যুধি। ভাই, সত্য বটে,
 রাজবেশে আর নাহি অধিকার ।
 ভীম, অর্জুন, নকুল, সহদেব,
 অনুগামী ভাই মোর !

অর্জুন। হে অগ্রজ, তুমি যদি আজ ভৃত্য, আমরা তা হ’লে ভৃত্যের
 ভৃত্য, এই রাজমুকুট রাজবেশ পরিত্যাগ করলেম ।

ভীম। দুর্যোধন ! মায়া শঙ্কের ছলনায় পরাস্ত ক’রেছ বটে, কিন্তু জেনো
 —ভীমের এ গদা—এ মায়া নয় ! তোমার এ দুরাচারের প্রতিফল
 আমিই দেব ।

যুধি। ভাই, সত্যবদ্ধ আমি ।

ভীম। তোমার সত্য যাই হ’ক, আমার সত্য তুমি । তুমি যার দাস হও,
 আমার রাজা তুমি । তোমার অপমান আমি প্রাণ থাকতে দেখতে
 পারব না ।

অর্জুন। হে মধ্যম !
 ক্রোধ কর সখরূপ

নাহি হও নিশ্চয়
 ধর্মরাজ-অনুগামী যোবা ;
 হিতাহিত জ্ঞান, মান অপমান,
 সুখশ সন্মান,
 জ্যেষ্ঠ-পদে সব দিছি বিসর্জন ।
 মিথ্যানাদী তবে ষ্টিষ্টির,
 চারি ভাই মোরা বহিতে জীবিত ?
 ভবিষ্যৎ বংশধর গাহিবে কুশল,
 সত্য্য ভ্রষ্ট হবে—
 জগৎ হাসিবে—
 নিদারুণ এ কলঙ্ক
 সহিতে কি জনম মোদের ?
 কিবা ক্ষতি ?
 হব তৃত্য জ্যেষ্ঠের আদেশে,
 অনুজের এই তো আচাব ।

হঃশা । ষাও ষাও, ভৃত্যের আসনে বসগে ষাও ।

হুর্ষো । ইহা ইহা ! আর পণে বন্ধা দ্রোপদী তো আজ থেকে কোরবের
 দাসী । প্রতিকামী ষাও, দ্রোপদীকে কোরবসভায় নিয়ে
 এস ।

প্রতিকামীর প্রস্থান

ভীম । (অর্জুনের প্রতি) ইহাও সহিতে হবে ?

অর্জুন । নিয়তি-লিখন !

ধৃত । বড় বাড়াবাড়ি হ'ল, বড় বাড়াবাড়ি হ'ল । না সঞ্জয়, আর নয়,
 আমার হাত ধর, আর এখানে নয়, আর এখানে নয় ; বুললক্ষীর

অপমান ! জন্মান্ত—দেখতে হবে না, কানেই বা শুনি কেন ? সঞ্জয়,
আমার হাত ধর—হাত ধর । পুত্রেরা নিতাস্তই অবাধ্য !

সঞ্জয়ের সহিত প্রস্থান

ভীষ্ম । দুর্ঘোষন, এখনো কি সভায় থাকতে হবে ?

দুর্ঘোষা । হাঁ হাঁ, বসুন—আপনি, আচার্য্য দ্রোণ ; এত মমতাই বা কেন ?

দ্রোণ । হে গাঙ্গেয় ; এই তো প্রায়শ্চিত্তের আরাধন, এর শেষ কোথায় ?

ভীষ্ম । অন্ন-ঋণে বদ্ধ দেহ,

হে আচার্য্য,

প্রায়শ্চিত্ত হইবে সম্পূর্ণ

জীবন আহুতি দানে ।

প্রতিকারীর পুনঃ প্রবেশ

দুর্ঘোষন । এ কি ! তুমি একা কেন ?

প্রতি । দেবী বল্লেন, ধর্ম্মরাজ তির তি নি আর কারও দাসী নন, তাঁর
অনুমতি না পেলে তিনি কখনো সভায় আসবেন না ।

দুর্ঘোষা । মুখ, তুমি দূব হও ।—বিকর্ণ, তুমি যাও, উদ্ধতা পাঞ্চালীকে
এখনি এখানে নিয়ে এস ।

বিকর্ণ । আমি এখনো বুঝতে পারছি নি, এ সভাস্থলে অভিনয় হচ্ছে, না
এ সব সত্য ? কুরুরাজ । সত্যই কি আপনার বুদ্ধিব্রংশ হ'য়েছে ?
পিতামহ ভীষ্ম, আচার্য্য দ্রোণ, মহারথী কর্ণ ! আপনারা জীবিত না
মৃত ? এত বড় অত্যাচার—যা পৃথিবীর কেউ কখনো করলনাও
করে নি—সকলে নীরবে অনুমোদন ক'রছেন ? আমার কুলবধুকে,
অসূর্য্যাম্পলা ভরত-বংশের কুলবধুকে এই নরক-তুল্য সভায় নিয়ে
আসব আমি ? আর কেউ দ্রোপদীকে জানতে যাবার পূর্বে আমি
জানতে চাই, দ্রোপদী পণ্যা কি না—যুধিষ্ঠির তাঁকে পণ রাখতে
পারেন কি না ?

দ্রোণ । (স্বগত) ধনু বিকর্ণ, ধনু ! কণ্টক-বৃক্ষেও অমৃত ফল ফলে,
তুমিই তার নিদর্শন ।

দুঃশা । যুধিষ্ঠির পণ রাখতে পারবেন না কেন ?

বিকর্ণ । আমি জানতে চাই, যুধিষ্ঠির তো একা দ্রৌপদীর স্বামী নন—
বৃদ্ধিভ্রষ্ট যুধিষ্ঠির কোন্ অধিকারে ভীষ্মাঙ্কনাদির বিনা সম্মতিতে
দ্রৌপদীকে পণ রাখেন ?

দুর্ঘো । বিকর্ণ, তুমি বালক, তোমার নিকট আমি উপদেশ শুনতে চাই
না, আমার আজ্ঞা পালন ক'বে কি না ?

বিকর্ণ । কখনই না ।

দুর্ঘো । বিকর্ণ, ভুলে যাচ্ছ যে তুমি আমার কনিষ্ঠ ।

বিকর্ণ । আমার দুর্ভাগ্য যে, আমি আপনার সহোদর ।

দুর্ঘো । তুমি এখনি সভাস্থল হ'তে দূর হও ।

বিকর্ণ । এত বড় সৌভাগ্য আমার হবে, এ আমি আশা করি নি । ভীষ্ম,
দ্রোণ, যুধিষ্ঠির—আপনাদের মহিমা আপনাদেরই জানেন, আমি মুর্থ—
আপনাদের চরণে নমস্কার ক'রে আমি এই পাপ-সভা ত্যাগ ক'ল্লেম ।

প্রস্থান

দুর্ঘো । উত্তম, তাই হ'ক্ !—দুঃশাসন, তুমি যাও দ্রৌপদীকে কেশাকর্ষণ
ক'রে নিয়ে এস ।

দুঃশা । ষষ্ঠা আজ্ঞা ।

প্রস্থান

দুর্ঘো । অগ্নি কাষ্ঠ হ'তে জন্মগ্রহণ ক'রে কাষ্ঠকেই দগ্ধ করে, বিকর্ণের
প্রকৃতি সেই অগ্নির মতই দেখছি ।

নেপথ্যে দ্রৌপদী । ছাড়্, ছাড়্, দু'রাচার !

একবস্ত্রা নারী পুরবধু, কোঁরবের

সভাস্থলে নাহি লও মোরে !

ভীষ্ম । অর্জুন ! অর্জুন !

অর্জুন । জ্যেষ্ঠের আদেশ ।

দ্রোণ । মাধব ! মাধব ! হে মধুসূদন !

কহ—কোন বজ্র ভীষণ এমন,

দাসত্ব তুলনা যার ?

কহ, পরাধীন পর-অন্নভোজী দাস,

পরার্থে বিক্রীত দেহ—

নর বলি' কেন পরিচিত ?

আমি দ্রোণ যজ্ঞসূত্রধারী,

বীরশ্রেষ্ঠ কৌরব-আচার্য্য,

পর-আজ্ঞাবাহী দাস—

উপহাস এ হ'তে অধিক কিবা ?

স্বাধীন কুকুর

শ্রেষ্ঠ দেখি পরাধীন গুরু দ্রোণ হ'তে

দ্রোণদ্বীর কেশকর্ষণপূর্বক দুঃশাসনের প্রবেশ

দ্রোণদ্বী । ওগো—এত ছিল ভাগ্যে অভাগীর !

কোথা দিগ্বিজয়ী স্বামিগণ মোর !

বাঃ বাঃ—

এই যে, ভৃত্যাসনে ব'সেছ সকলে !

কহ ধর্ম্মরাজ !

ভাষ্য্য দাসী কিবা নহে ?

হেঁ ট-মুণ্ডে ব'সে আছে ভীষ্ম,

ফাল্গুনী নীরব—

সহদেব নকুল নিম্পন্দ,

আমি পাণ্ডব-মহিষী
 সামাগ্রা-বনিতা সম,
 আজি দুঃশাসন
 কেশে ধরি' করিছে দুর্গতি—
 এ সমাজে পুরুষ কি নাহি কেহ ?
 পিতামহ, গুরু ভ্রোণ,
 আর আর সভাজন যত—
 কহ, নীরব কি হেতু ?
 কহ, এই কি হে পুরুষের বীতি ?
 নীতিবিদ্ কহ মতিমান,
 কোন্ ধর্ম্মে কোন্ শাস্ত্রে আছে এই বিধি ?

ভীম ।

কুললক্ষ্মী মা আমার,
 উত্তর তোমার,
 অসিমুখে শোণিত-অক্ষরে
 চিরদিন কাললিপি-পটে যবে লেখা
 অত্যাচারী নরে
 পরিণাম তার করা'তে স্বরণ ।

দুর্য্যো । হ্রোপদী, ওখানে দাঁড়িয়ে কেন ? এস—দাসীর উপযুক্ত স্থানে
 ব'সবে এস । (উক দেখাইলেন)

ভীম ।

নভঃ বরিষ অনলধারা,
 ধরাভিত্তি হ'ক স্থানচ্যুত ।
 আরে আরে কুরু-কুলান্দার !
 কি কহিব, সত্যে বহু, জ্যেষ্ঠ-অনুগামী ;
 কিন্তু শোন্ দুঃরাচার,
 প্রতিজ্ঞা আমার—

পূৰ্ণ হ'লে কাল,
এই গদাৰ আঘাতে ওই উৰু তব
যেণু যেণু কৰি, উড়াব আকাশে !
শোন্ দূঃশাসন '

পশু তুই,
কুলনারী-অপমান কৰিনি পামৰ,
পশু-বন্ধ তোৰ
বিদাৰিয়া নখে,
তপ্ত বক্ত যেই দিন কৰিব বে পান,
সেই দিন তপ্ত হবে প্ৰাণ !

জ্যোপদী ।

শোন ভীম !
দূঃশাসন ধৰিয়াছে কেশে ;
এই কেশ সেই দিন কৰিব বন্ধন
যেই দিন তার বন্ধের শোণিত-সিক্ত-করে
তুমি—তুমি বেণী মোৰ কৰিবে সংহাৰ ।

কৰ্ণ ।

আজি মনে পড়ে লক্ষ্যবেধ,
মনে পড়ে,
“সূতগুণ্ডে বৰিব না কতু ।”

হে ফাস্তনি,
আজি কোথা সে বীরস্ব তব ?

অৰ্জুন

শোন্—শোন্ দূৰাচাৰ,
বীরস্ব বৈতব
সমৰ্পণ কৰিয়াছি জ্যেষ্ঠেৰ চরণে ;
কিন্তু শোন্ দুষ্ট, প্ৰতিজ্ঞা আমাৰ—
যুগি সম উড়াইব কোঁৱৰেৰ দলে,

নিজ হস্তে পশুবৎ বধিব য়ে তোরে !

আরে আরে স্মৃতবংশাধম তুই বীরকুল-গ্নানি ।

দুষ্যো । নির্বিষ ভুজঙ্গের আফালন অসহ ! দুঃশাসন, পণে বিক্রীতা
এই দাসীকে বিবস্ত্রা কর ।

ভীষ্ম, দ্রোণ । নায়ায়ণ !

ভীষ্ম : কহ রাজা,
 এও কি দেখিতে হবে ?

যুধি । কল্পনা ভীষণ !
 অত্যাচারী-কল্পনা-ভীষণ !

কিন্তু তবু—

তবু ভাই, নাহি হও বিচঞ্চল ।

অক্ষ-পণে যবে সত্য করিয়াছি দান,

সত্যগ্রাহী হইয়াছি যবে—

নহে কবির কল্পনা—

নহে ঐকো নরত্বের আদর্শ সৃজন—

এই চক্ষে হইবে দেখিতে,

এই বক্ষে হইবে সহিতে,

কল্পনার অতীত পীড়ন—

পত্নী-পুত্র সহোদর-নির্ঘাতন

হ'ক যতই ভীষণ !

শোন ভীষ্ম, শোন ভাই,

মহ—মহ বিকার-বিহীন-চিত্তে

মহা কর এই অপমান—বনি গার এ লাঞ্ছনা :

দেখিবে অচিরে

নিজ বিঘে হবে জর্জরিত,

আজি যারা ব্যভিচারী শক্তির প্রয়োগে
উৎপাড়িত করিছে মোদের !

তুৰ্যো । হুঃশাসন, দাঁড়িয়ে কি শুন্চ ? দাসীকে বিবস্ত্রা কর ।

হুঃশা । এস বালা,
ছিল পঞ্চ স্বামী—
যষ্ঠে, কিবা ভয় ?

দ্রৌপদী । এঁয়া—এঁয়া !
এ যে সত্য আমে হুঃশাসন !
এ কি ! কাঁপিল কি ধরা ?
নারী আমি,
বিবসনা করিবে আগারে ?
সত্যে বন্ধ স্বামিগণ মোর
জড় সম নিষ্পন্দ দেখিবে তাহা ?

হুঃশা । নাহি চিন্তা লো সুন্দরি,
আজি নগ্ন রূপ তব দেখিবে সকলে ।

দ্রৌপদী । তবে—তবে—
কে রক্ষিবে রমণীর মান,
স্বামী যদি হেন বিকাব-বিহীন ?
কোথা জগতের স্বামী
কোথায় অনাথবন্ধু
ষড়পতি অগতির গতি
দীননাথ দীনের শরণ !
কোথা নারায়ণ,
দ্রৌপদীর সখা কৃষ্ণ
অবলার লজ্জা-নিবারণ !

কোথা—কত দূরে—
 কোন স্বর্গে গোকুলে বৈকুণ্ঠে,
 দ্বারকায় কিংবা মথুরায়,
 কোথায় হে তুমি ?
 ক্ষৌণ্ণ রোদনের ধ্বনি মোর
 পশেনি কি অন্তরে তোমার ?
 কোথা হে মধুসূদন !
 নিতান্ত দুঃখিনী আমি—
 সখা—সখা—দয়া কর মোরে ।

দুঃশাসন বস্ত্র আকর্ষণ করিতে লাগিল । শূন্যে শ্রীকৃষ্ণের আবির্ভাব—বস্ত্র ফুরায়
 না ; দুঃশাসন ক্রান্ত হইয়া পড়িয়া গেল । সকলে বিষয়-বিস্ফারিত
 নেত্রে স্রোপদীর দিকে চাহিয়া রহিল

চতুর্থ অঙ্ক

প্রথম দৃশ্য

হস্তিনা

বিহ্বের কুটীর

শ্রীকৃষ্ণ ও কুন্তী

কুন্তী । তবু ভাল, যে এত দিন পরে এ হতভাগিনীকে মনে প'ড়েছে ।

শ্রীকৃষ্ণ । না, না, আর্ষ্যো ! মনে তোমরা নিয়তই আছ ! তবে অনেক দিন দেখা হয় নি, নানা কার্যো ব্যস্ত, তাই বহুকাল পরে একবার দেখতে এসেছি ।

কুন্তী । কি দেখতে এসেছ ? চির-অভাগিনী আমি, রাজ-মহিষী রাজ-মাতা হ'য়ে বনে বনেই প্রায় চির-জীবন কাটল । কিন্তু তাতেও দুঃখ ছিল না হরি, যদি পুত্রেরা সব কাছে থাকত ! আহা, নকুল মহদেব বালক ! মাদ্রী ম'রে গেল, আমার কোলে ছেলে দু'টিকে দিয়ে ব'লে গেল—অনাথা—ভার নিও—দেখো । খুব দেখচি—খুব ভার নিয়েছি । রাজকন্যা—রাজবধু—একবজ্রা—তাকে কুরুসভায় কেশে ধ'রে অপমান ক'লে ; নারী আমি—পাষণী—সব শুনলুম । তার পর সেও বনে বনে কোথায় আছে কে জানে । কৃষ্ণ । দুঃখ এই, মৃত্যু যার শাস্তি, তা'কে মৃত্যু দাও না কেন ?

শ্রীকৃষ্ণ । দেবি, তুমি যুধিষ্ঠিরের জননী হ'য়ে এই কথা বলছ ? ধর্মরাজ যার পুত্র, যিপদে কি তার কাতরতা শোভা পায় ? তোমার আর সখী

দ্রৌপদীর জীবন চিরকাল জগতের নারীকে শেখাবে, দুঃখের জীবনে
মৃত্যুই শান্তি নয়—সহ্য করাই শান্তি ।

বিহুরের প্রবেশ

বিহুর । ওঃ, অত্যাচার তার সীমা ছাড়িয়ে উঠল ।—এই যে, এই যে

ভক্তবৎসল ! কি ভাগ্য আমার, আজ তুমি এ ভিক্ষকের কুটীরে ?

শ্রীকৃষ্ণ । বিহুর ! তোমার ক্ষুদের আশ্বাদ যে আজও ভুলতে পারি

নি ; কিন্তু তুমি অত্যাচারের কথা কি বলছিলে ?

বিহুর । তোমাকে আর বলব কি অন্তর্যামী, তুমি কি না জান ? দুর্শ্বতি

দুর্যোধনের আচার-ব্যবহার যে ক্রমে আমার অতিষ্ঠ ক'রে তুলছে !

শ্রীকৃষ্ণ । কেন বিহুর, আবার নূতন কি হ'ল ?

কুন্তী । কুলাঙ্গার আবার কি কল্পনা ক'রেছে ? বৎস, আমার পুত্রেরা

বেঁচে আছে তো ? পাপিষ্ঠ কি আবার তাদের হত্যার ষড়যন্ত্র ক'রছে ?

বিহুর । না, পাপিষ্ঠ কল্পনা ক'রেছে, বনবাসী পাণ্ডবদের ঐশ্বর্য দেখিয়ে

পীড়া দেবে । মাৎসর্যের পূর্ণমুক্তি দুর্যোধন, শকুনির পরামর্শে

পুরাঙ্গনাদের নিষে পাণ্ডবদের উপহাস ক'রবার জগ্ন যাত্রা ক'রছে ।

সর্বনাশ করেও তৃপ্তি নাই । ঐশ্বর্যের মাদকতা হীন-চিত্ত দুর্যোধনকে

এমন অভিভূত ক'রেছে, সে যে মানুষ, সে কথা ভুলে গেছে ।

শ্রীকৃষ্ণ । কেন বিহুর, এতে বিস্মিত হ'চ্ছ ? ঐশ্বর্যের ধর্মই তো এই ।

যে অভাগা ঐশ্বর্যকে পরের জগ্ন উৎসর্গ করে নি, তার দশা তো

চিরদিন এমনিই হ'য়ে থাকে, এ তো নূতন নয় ।

কুন্তী । ওঃ ! এত দুঃখ আমার বাছাদের ভাগ্যে ছিল ! ভাগ্যের এমন

ক্ষমতা—জগতের ঈশ্বর শ্রীকৃষ্ণ, পাণ্ডবদের আত্মীয় হ'য়ে, সখা হ'য়ে,

হিতকারী হ'য়েও এই ভাগ্যের হাত থেকে তাদের নিষ্কৃতি দিতে

পারলেন না !

শ্রীকৃষ্ণ ।

ভূঞ্জে নর নিজ কৰ্ম-ফল,
 ঈশ্বর নিষ্ক্রিয় সদা ।
 কৰ্ম-ফলে ভাগ্যের সৃজন,
 নহে ভাগ্য কৰ্ম হ'তে স্বতন্ত্র শক্তি ।
 ইচ্ছা করে কৰ্মের সৃজন,
 এই ইচ্ছা সতত স্বাধীন ।
 বাসনার খেলা, বন্ধ প্রকৃতির ;
 তাই মহামায়া
 নেত্রীরূপে সৰ্ব জীবে সৰ্ব বিশ্বে
 সৰ্ব ভূতে সদা বিদ্যমান ।
 মুক্ত সেই,
 এই তত্ত্ব অবগত যেই জন,
 তারি হয় বাসনার নাশ,
 সেই হয় ভাগ্যেরই অতীত ।
 দুর্যোধন—অত্যাচারী
 তার সহজাত প্রকৃতির গুণে ;
 যুধিষ্ঠির—সুখে দুঃখে সম নিষ্কিঁকার,
 মহা তত্ত্ব শিখাইতে নরে
 জনম তাহার ।
 তুমি মাতা তাহার জননী ।
 শোক নহে উচিত তোমার ।

বিদুর : মায়ায় । তুমি যাই বল, আমার বিশ্বাস এ সবই তোমার
 লীলা । বল দেব, কত দিনে যুধিষ্ঠির আবার মেঘমুক্ত সূর্যের ন্যায়
 ভারত-সিংহাসনে বসবে ?

শ্রীকৃষ্ণ । দুর্যোধনের এই ঘোষণাডায়, যুধিষ্ঠিরের কার্যের উপর সমস্ত

ফলাফল নির্ভর করছে ! জেনো বিদুর, দুর্যোধনের এ মাৎসর্যের খেলা বৃথা নয় । কৌরব-সভায় দ্রৌপদীর অপমানে যুধিষ্ঠিরের নিশ্চেষ্টতায়, ভীমার্জুনের আহুগত্যে অজ্ঞরা মনে ক'রেছে—যুধিষ্ঠির ভয়ে, নিজ অক্ষমতায় সেই অত্যাচারের প্রতিবিধান করেনি, নিকরপায় হ'য়ে সকল পৌড়ন সহ্য ক'রেছে । দুর্যোধনের এই ঘোষণাত্রায় যুধিষ্ঠিরের কার্যে, ব্যবহারে প্রতিপন্ন হবে, নিকরপদ্রবে সকল উৎ-পৌড়ন সহ্য করা সব সময়ে অক্ষমতা নয় । এ নিশ্চেষ্টতায় মৃত্যুর লক্ষণ নাই, এ মহাজীবন-লাভের পূর্বলক্ষণ ।

কুন্তা ।

অজ্ঞ নারী

পুত্র স্নেহে অন্ধ সদা,

বুদ্ধিতে না পারি, কর্ম—কর্মফল,

ফলাফল চরণে তোমার ।

কুটীরে বসিয়ে এই,

নিত্য নয়নের নীবে

সিক্ত করি ওই তব চরণ কমল,

তুমি বন্ধু, তুমি সখা, আত্মীয় আমার,

তুমি জান ভাগ্য পাণ্ডবের,

আমি জানি তোমাতে কেবল ।

বিদুর । মা—মা, তুমি যা জান, তুমি যা জেনেছ, তার চেয়ে জানবার আর কিছই নেই । মহা ভাগ্যবান আমি, তাই তোমার মত জননীকে আমার এই ভগ্ন কুটীরে পেয়েছিলাম, যার জগৎ আজ শ্রীকৃষ্ণ আমার দ্বারে অতিথি ।

শ্রীকৃষ্ণ । বিদুর, অতিথি তো বল্ছ, কিন্তু আহারের আয়োজন কর্ছ কৈ ? দেবি, ছেলেদের কথায় আমার খাবার কথা যে ভুলে গেলে, আমি যে এখনও অভুক্ত ।

বিদ্র।

গীত

দয়াময়! বল কোথা কিবা পাব—
 কি আছে আমার কি দিব তোমার হে।
 বিনে ভক্তি সুখা, তোমার মিটিবে কি সুখা
 (ওহে ভবের সুখাহারী)

(তুমি সর্বভূষাহারী ভকতবৎসল হে)
 আমার নিত্য অনটন অনিত্য সংসার হে।
 (কত) পাবে ধ'রে সাধি নিশিদিন কাঁদি,
 তুমি তো চাহ না ফিরে,
 (ও.হ নিষ্ঠুর!)

আমার মরুভূমি প্রাণ হয়ে ছ শ্মশান,
 তোমারি চরণ করিয়া স্মরণ কত দিন অসান,
 (তুমি তো চাহ - ১ তিলেক)

(আমি অভাবে অভাবে করি দিন অবস'ন)

(তোমার ভ বের অভানে মরুভূমি প্রাণ)

আমি ভক্তি সুখা কোথা পাব বল,
 বিখারীর ঘরে সে নিধি কোথা পাব বল,
 আছে আমার কি দিব তোমার হে।

সকলের প্রধান

দ্বিতীয় দৃশ্য

প্রভাস—কাম্যবন

ভীম ও যুধিষ্ঠির

ভীম

মহাসৈন্য সমাবেশ দেখিলাম বনে,
আমিরাছে দুর্যোধন চতুরঙ্গ দলে ;
হয় হস্তী রথ অগণিত
দাস দাসী রত্নের সম্ভার,
বিচিত্র বৈভব,
বাঘ- াও নানাবিধ,
শত শত পট্টবাসে আচ্ছন্ন কানন ;
সৈন্যগণ গরজে ভীষণ,
মহা দস্তে করে আফালন !
দেহ আচ্ছা নরপতি,
যদি ভাগ্যবশে গৃহ-পাশে মিলিয়াছে অরি,
কার' অরাতি নিধন
বাধি আনি' দুর্যোধনে
শ্রীচরণে দিই উপহার ।
দ্রোপদীর অপমানে
যেই জ্বালা দহে অন্তস্তলে,
আজি করি নিষ্কাশ তাহার ।

যুধি

শুন ভীম, কাল পূর্ণ নহে এবে,
দ্বাদশ বৎসর হবে অতিক্রম,

নহে বেশী দিন আর ;
 পরে অজ্ঞাত বৎসর ;
 এইরূপে ত্রয়োদশ বর্ষ গতে
 হইব উদয় লোকালয়ে পুনঃ ।
 বহুদিন স্ব-ইচ্ছায় মাইয়াছ দুঃখ
 ভাই, চাহি মুখপানে মোর
 ধর ধৈর্য্য । কিছু কাল আর !

অঙ্ক-নর প্রবেশ

ন । হে নরেশ,
 মিলিল সুযোগ
 দেখিলাম তুষোধান কর্ণের সহিত,
 মহোল্লাসে মত্ত হবে ।
 আকুল গাণ্ডীব গুনি' মৈত্র্য-কোলাহল,
 তুণে বাণ হতেছে চঞ্চল ।
 অনুমানি—
 পতিত জ্ঞাতারে
 আসিয়াছে দেখাতে বৈভব ।
 কেশরি আবাসে ফের,
 স্ব-ইচ্ছায় পশিয়াছে পতঙ্গ অনলে ।
 কহ নররায়,
 বিনা শাস্তি ফিরে যাবে তুষোধান ?
 শাস্তিদান না রাখয়ণ ভাই !
 কাল পূর্ণ হ'লে
 ভগবান করিবেন শাস্তির বিধান ।

দ্রোপদীর প্রবেশ

দ্রোপদী ।

শুন শুন হইয়াছে সর্কনাশ ।
 'প্রতিহারী দিল সমাচার—
 গন্ধর্ব ঈশ্বর চিত্রসেন মনে
 মহারণে পবাজিত কুরু-কলাঙ্গার ।
 সঙ্গে কলাঙ্গনা
 কোরব ঘরণী যত বন্দিনী তাহাব,
 বাধি ল'য়ে যায় সবে গন্ধর্কের দেশে ।
 রণে ভঙ্গ পলায় শকুনি, শলা,
 মৈত্রাদল ছত্রভঙ্গ সবে,
 নাবীগণ হাহাকারে গগন বিদাবে ;
 কোরবেব রাণী ভানুমতী
 কাঁদিয়া আকুল,
 পাঠাইলা সঙ্গেপনে দূত
 উপাধ করিতে ভবা ।
 পূর্বাপর ঘটনা যেমন
 শুন প্রতিহারী মুখে,
 ভয়ে ভীত অনুচর শিহরে তবাসে ।

ধৃবি ।

দ্রোপদী ।

সে কি । কি সর্কনাশ । দেবি, কোথায় সে প্রতিহারী
 আশ্রয় করিয়া তারে এমেছি হেথায়
 দানিতে সংবাদ ।

ভীম ।

হ'ল ভাল, গন্ধর্কের বাধিল,
 মৃত্যুমতি দুর্ষোধনে,
 উপযুক্ত শাস্তি দিল ভগবান্ ।

ধৃবি

অর্জুন, কিবা উচিত এখন ?

অর্জুন ।

তুমি জান তাহা,
মোরা শুধু আজ্ঞাবহ দাস ।

যুধি ।

ভীমসেন ?

ভীম ।

দ্রুঃশাসন বক্ষ রক্ত পান
আছে প্রতিজ্ঞা আমার ;
ভাবিতেছি—
গঙ্কর্ব যতপি বধে,
সে প্রতিজ্ঞা না হবে পালন ।

যুধি ।

কহ পাঞ্চাল-নন্দিনী
যুক্তি কিবা এ সঙ্কটে !

লৌপদী ।

আমি নারী,
যুক্তি তর্ক নাহি জানি ।
শুনিলাম দূত-মুখে
বন্দিনী বমণী,
রাজরাণী কোঁরব-ঘরণী যত ।
আকুল পরাণ কাঁদিল তখনি,
বুঝিতে না পারি
কি লাঞ্ছনা আছে লেখা ভাগ্যে সবাকার ।
ধরি পায় নররায়,
উপায় যতপি থাকে করহ বিহিত,
উদ্ধার করহ সবে
হিতাহিত যুক্তিতর্ক কিছু নাহি বুঝি !

ভীম । কিন্তু দেবি, এই দুর্ঘোষনই তো তোমার লাঞ্ছনা ক'রেছিল ?

ভগবান গ্ৰাঘ্য বিচার ক'রেছেন ; দুর্ঘোষনের মহিয়ী আজ গঙ্কর্ব
কর্তৃক লাহিত ।

ক্রোধদী ।

আমি জানি,
 আমি সহিয়াছি যে লাঞ্ছনা,
 জগতের কোন নারী যেন
 নাহি সহে সে যাতনা আর !
 আমি জানি—কি সে বাধা,
 পুরুষ যখন দুর্বল ভাবিয়া
 নিপৌড়িত করে রমণীকে,
 করে অপমান অত্যাচার
 দুর্দশা অসীম !
 তাই আশঙ্কায় শিহরে অন্তর
 লাঞ্ছিতার অপমান স্মরি'
 নারী কাদে মুক্তি হেতু,
 নারী কাদে, নারী যাচে,
 নারী পাঠায়েছে দূত
 নারীর সকাশে,
 ভয়ে ভীতা নারী
 নিকৃপায় করে হাহাকার ।
 বীখ্যবান তোমরা সকলে
 অবলার আঁখি জল
 যদি না কর বারণ
 কিবা ফল পুরুষ-জনমে ?
 কিবা ফল বীরত্ব আখ্যান ?
 হে বীর-কেশরী,
 শাস্তি দিয়ে গন্ধর্ব-ঈশ্বরে
 রমণীর রাখহ সম্মান ।

অঙ্কুন । ঠিক বলেছ যাজ্ঞসেনি, জ্ঞাতির দুর্দর্শা দেখে যে পুরুষ নিশ্চেষ্ট হয়ে থাকে, তার মরণই মঙ্গল । দুর্ঘোষনের মহিষী আমাদের ভ্রাতৃ-বধু, আমরা জীবিত থাকতে ছাড়া গন্ধর্ব তার নাশনা ক'রবে ? জ্ঞাতি—জ্ঞাতি ! এক গোত্র, এক ধারা, এক শোণিত । আমরা ভাইয়ে ভাইয়ে বিবাদ করি, যুদ্ধ করি, সে আমাদের ঘরের কথা ; কিন্তু তাই বলে পর সেই জ্ঞাতির অপমান ক'রবে, ছাড়া আমরা তাই দাঁড়িয়ে দেখব ? ধর্মরাজ আদেশ করুন, এখনই গন্ধর্বকে তার সমুচিত শিগা দিই ।

ভীম । অঙ্কুন ! অঙ্কুন !
কোল দে রে—মোরে ।
কৌরব পাণ্ডব
এক বৃক্ষে দুই শাখা,
দুই গন্ধর্ব ছেদিবে,
ছিন্ন বাহু করিবে মোদের
তাও কি সম্ভব কভু ?
দুই জানে না নিশ্চয়
ভীমাঙ্কুন রহে হেথা
আর তারা কৌরবের ভাই ।

যুধি । তুই আমি
হেরি উৎসাহ সবার ।
যাও পাণ্ড, যাও ভীমসেন,
ত্বরা মুক্তিদান কর দুর্ঘোষনে ।
ভুলে যাও পূর্বের বিবাদ,
দেখো, ঘৃণাক্ষরে অপমান কোরো না তাহার ।
মহা সমাদরে

যত্ন করি কুলাঙ্গনাগণে
 দরিদ্রের এ কুটীরে আন সযতনে ।
 হে পাঞ্চালি,
 উচ্চ বাঙ্গা তব পূরিবে এখনি
 নাহিক সংশয় ;
 কর আয়োজন ভ্রাতৃ-বধুগণে মোর
 যথোচিত করিতে সংকার ।

দ্রৌপদী । হে কৃষ্ণ ! হে দ্রৌপদীর সখা ! সভাস্থলে তুমি দ্রৌপদীর
 লজ্জা নিবারণ ক'রেছিলে, দেখো প্রভু ! যেন কোরব রমণীগণের
 লজ্জা নিবারণ হয় ।

সকলের প্রস্থান

ভক্তায় দৃশ্য

অঙ্গদেশ

কর্ণের উজ্জান

বৃষকেতু ও বালকগণ

বালকগণের গীত

সকলে । রাজা রাজা খেলবো মতুন খেলা

দেখি পারি কি হারি ?

১ম । আমি বসবো সিংহাসনে—

২য় । হয় ভাল, কেউ যদি কোটাল হ'রে চোর আনে ;

৩য় । কে বল ক'রনে চুরি—

৪র্থ । কাণা মাছি চোরের খাড়া—

৫ম । যদি ছু'য়ে দেয় বুড়া—

৬ষ্ঠ । আমি মন্ত্রী হ'রে চানুবো মাথা,

৭ম । আমি তবে ধ'রবো ছাতা—

সকলে । (আমরা) সবাই যদি রাজা হই মজা হয় ভারি।

বৃষ । কি ভাই, দিন রাত গান গাওয়া ? আমার ও ভালো লাগে না ;
তার চেয়ে আয়, আমরা ব্যহ রচনা করে যুদ্ধ করি, দেখি কে কাকে
হারায় ।

২য় বালক । কে ব্যহ রচনা ক'ব'ব ? আমার এখনও লক্ষাই ঠিক হয়
নি, আমি রচনা ক'ব'তে পারব না ।

৩য় বালক । আমিও না ।

বৃষ । তোদের কিছুই ক'ব'তে হবে না, আমি ব্যহ রচনা করি, তোরা

দেখ্ ! কি ব্যাহ রচনা করব বল্ ? মৎশ-বাহ, ময়ূর-বাহ, না
চক্র-বাহ ?

২য় বালক । তুই পারবি ?

বৃষকেতু । পারব'না ? এই দেখ্, এই দেখ্, এই এমনি ক'রে সব
দাঁড়া, ধরুক কাঁধের উপর রাখ্, তুই এই, তুই এই—আর আমি
এই মাঝখানে ।

১ম বালক । এ ভাই ভাল না—তার চেয়ে আর কিছু খেল !

বৃষ । আচ্ছা বেশ, আর এক রকম খেলি তবে ।

২য় বালক । কি ভাই ?

বৃষ । একজন ছুটে একটা ফল পেড়ে নিয়ে আয় তো । তুই যা ভাই ।

৪র্থ বালকের প্রস্থান

৩য় বালক । ফল কি হবে ভাই ?

বৃষ । এই দেখ না কেমন মজা করি ।

ফল লইয়া ৪র্থ বালকের পুঃ প্রবেশ

৪র্থ বালক । এই নে ভাই ফল ।

বৃষ । দে, দে, দেখ্ ফলটা কেউ ভাই মাথায় করে রাখ্ (একজনকে
লইয়া) এই তুই আয়—দাঁড়া ঠিক সোজা হ'য়ে, নডিস্নি—ফলটা না
প'ড়ে যায়—আর আমি দেখ্, তীর দিয়ে বিধে ফেলি ।

৪র্থ বালক । (ভয় পাইয়া) না ভাই আমি পারবো না । যদি ভাগ
ফস্কে মাথায় লাগে, যদি ম'রে যাই ?

বৃষ । দূর তুই বড় কাপুরুষ । মরতে ভয় করিস্ ? আচ্ছা ! তোদের
মধ্যে কে পারবি আয়, আমি এই মাথায় ফল রাখলুম । নে, তীর
ছোঁড় ! লাগে আমার লাগবে ।

৩য় বালক । ওরে ওই তোর মা আস্ছে, আর খেলা নয় !

বৃষ । তাই তো !

পদ্মাবতীর প্রবেশ

পদ্মা। তোমরা এখনও খেলা করছ? যাও অনেক বেলা হয়েছে,

স্নানাহার করগে, আবার রন্ধর পডলে খাবেনা খেলতে আসবে।

২য় বালক। ওরে কেতু, আমরা তবে চললাম ভাই!

বালকদ্বয়ের প্রস্থান

বৃষ। হাঁ মা, বাবা রাজা যুদ্ধিষ্টিবের রাজসূয় যজ্ঞের গল্প বল্লেন; আমাদের
কবে যজ্ঞ হবে মা?

পদ্মা। সকলের ত রাজসূয় যজ্ঞ করতে নেই; বড় হও, বুঝতে পারবে
কোন যজ্ঞের কে অধিকারী।

বৃষ। আচার্ঘ্য বল্লেন, মা-বাপের পা পূজোর চেয়ে বড় যজ্ঞ আর নেই;
এতে অধিকারী অনধিকারী নেই, সকল ছেলেই এ যজ্ঞ করতে
পারে—না মা?

পদ্মা। হাঁ বাবা।

বৃষ। আচ্ছা মা, যাদের মা-বাপ নেই?

পদ্মা। ভগবান শ্রীকৃষ্ণ, তাঁর চরণ পূজা করলেই মা-বাপের চরণ পূজা
করা হয়। সর্ষ-যজ্ঞেশ্বর শ্রীহরি—তাঁর চরণ পূজা করলে সকল যজ্ঞই
করা হয়।

বৃষ। তা হলে তো মা এ খুব সোজা। আর কোন যজ্ঞ না করে এক
শ্রীকৃষ্ণকে পূজা করলেই তো হয়। আমি বড় হয়ে অন্য যজ্ঞ
করব না। এখন রোজ তোমার আর বাবার পা পূজো করবো,
আর শ্রীকৃষ্ণের পা পূজো করবো, তা হলে আর কোন যজ্ঞ করতে
হবে না, কেমন মা?

পদ্মা। বেঁচে থাক বাবা; এই সংবুদ্ধি নিয়ে দীর্ঘজীবী হও।

বৃষকেতুর প্রস্থান

(স্বগত) এমন ভক্তিমান পুত্র দীর্ঘজীবী হয়, তবেই না।

কর্ণের প্রবেশ

কর্ণ। অন্তরান হ'তে বৃষকেতুর কথা শুনছিলাম! মাতার শিক্ষায় পুত্রের ভবিষ্যৎ নির্মিত হয়। তোমার শিক্ষায় তোমার আদরে বৃষকেতু আমার বংশগৌরবকে উজ্জ্বল ক'রবে—এ ভরসা আমার আছে। আশীর্বাদ করি—বয়সের সঙ্গে সে যেন তোমার ভাগ্য লাভ করে—আমার মত দুর্ভাগ্য না হয়।

পদ্মা। কেন এ কথা বলছ নাথ?

কর্ণ। চিরদিন দুর্ভাগ্যই আমার সহচর। আমার জীবনের কথা সবই তো জান। ভাগ্য কেবল একস্থানে পরাজিত হ'য়েছে—তোমার কাছে! নইলে দেখ, শিক্ষা নিষ্ফল হ'ল, জীবন নিষ্ফল হ'ল, অপযশ সংস্কার সাথী। যুদ্ধিষ্ঠিরেব রাজস্বয় যজ্ঞে দানের ভার দিলে আমায়, লোকে বলে “পরধনে মুক্তহস্ত কর্ন!”

পদ্মা। তুমি নীতিবিদ, তোমাকে আর কি বলব? ভাগ্যদেবী চিরদিনই ছলনাময়ী।

প্রতিহারীর প্রবেশ

প্রতি। মহারাজ, ক্ষুধার্ত ব্রাহ্মণ পুরে,
পারণ-প্রয়াসী তিনি।

কর্ণ। শুভ এ সংবাদ।
রাগি, পাণ্ড-অর্ঘ্য কর আয়োজন।
অতিথি ব্রাহ্মণ
সমাগত কৃতার্থ করিতে মোরে।
চল প্রতিহারী,
দেখি কোথায় সে দ্বিজ।

চতুর্থ দৃশ্য
প্রাসাদ-কক্ষ

মন্ত্রী ও ব্রাহ্মণ

মন্ত্রী। ব্রাহ্মণ, আপনি সিংহাসনে উপবেশন করুন। মহারাজকে সংবাদ দেওয়া হ'য়েছে, তিনি এখন এসে আপনার চরণ-বন্দনা করবেন।

ব্রাহ্মণ। ক্ষুধায় কাতর,
অন্ধকার নেহার সংসার ;
ঘৃণ্যমান বাঁচক্ৰ সম্মুখে আমার,
বুঝি আয়ুশেষ করে মোর !
উপবাসা আমি,
বিষগ্রাসী ক্ষুধার প্রহার
সহিতে না পারি আর !
কোথা গৃহস্থানী,
অপেক্ষায় ক'ক্ষণ র'ব ?

মন্ত্রী। দেব, আর অপেক্ষা করতে হবে না ; ঐ মহারাজ আসছেন,
এইবার আমন পরিগ্রহ করুন।

কর্ণের প্রবেশ

কর্ণ। আসুন ব্রাহ্মণ, আসুন বিজশ্রেষ্ঠ, অমৃতপুরে প্রবেশ করে অর্ঘ্য গ্রহণ করুন। আপনি কি অবগত নন, ব্রাহ্মণের পক্ষে আমার দ্বার সदा অব্যাহত ?

ব্রাহ্মণ। কথার সময় নাই,
ওঙ্ক-কণ্ঠ, ওঙ্ক-তানু, উদরে অনল,

একাদশী ব্রতধারা আমি,
 পাণ্ডবের আগে
 ফিরি দ্বারে দ্বার,
 হেরি' মোরে
 দ্বার কক কক পৌরজন,
 শুধাইলে কেহ কথা নাহি কহে,
 পশ্চমে শান্তনুদ ।

হে রাজন্ !

যদি ব্রহ্মধে নাহি থাকে সাধ,
 কর অরা সংকারের আয়োজন !
 পাত্ত অর্ঘ্য লব,
 করিব নিশ্চয়,
 অগ্রে কর অঙ্গীকার,
 বিমুখ না করিবে আমারে !

কর্ণ ।

বিমুখ করি' তোমা ?
 ক্ষুধা-ক্লিষ্ট তুমি হিঙ্গ অতিথি আমার
 সমাগত পুরে
 কৃতার্থ করিতে মোরে
 কৃপা করি' অন্নপানি করিয়া গ্রহণ,
 আমি বিমুখ করিব তোমা ?
 নাহিক নকোঁচ,
 করহ আদেশ,
 কিবা আয়োজন করিবে এ দাস,
 তব তৃপ্তি হেতু ।
 কোন ভোজ্যে আসক্তি তোমার ?

করি অঙ্গীকার
 বাহু। তব এখনি পুরাব ।

ব্রাহ্মণ
 বহুদিন করি নাই আমিষ ভোজন,
 বৃদ্ধ আমি,
 কোমল নধর মাংসে আসক্তি আমার ।

কর্ণ ।
 উত্তম ।
 হে দ্বিজ,
 কহ, কোন মাংসে প্রীত হবে তুমি ?
 ছাগ, মৃগ কিংবা মেষ ?

ব্রাহ্মণ ।
 না না—অখাণ্ড সকলি ।
 বহুদিন আছি হে বঞ্চিত নর-মাংস হ'তে—
 স্তম্ভাহ নধর—

কর্ণী । ৫৭
 নর-মাংস !

ব্রাহ্মণ ।
 হাঁ হাঁ !
 কে-রে মুখ, বাধা দেয় মোরে ?
 নর-মাংস অতি উপাদেয় ।

কর্ণ ।
 নর মাংস প্রিয় তব ?

ব্রাহ্মণ ।
 হাঁ হাঁ,
 ধরামাঝে শ্রেষ্ঠ জীব নর,
 মাংস তার শ্রেষ্ঠ খাণ্ড নাহিক সন্দেহ ।
 নর মাংস অভিনাষী আমি ;
 হে রাজন !
 যদি সাধ্যায়ত্ত,
 কহ, রহি অপেক্ষায়—
 নহে চ'লে যাই,

অভুক্ত ক্ষুধার্ত আমি বিমুখ ভিক্ষুক
মৃত্যু-ক্রোড়ে লইতে আশ্রয় ।

কর্ণ ।

না—না—

কেন যাবে বিমুখ হইয়ে,
মধ্যাহ্নে অতিথি তুমি

ক্ষুধার্ত ব্রাহ্মণ,

নরমাংস স্ফুলভ যদি—

আমি নর

অতি ক্ষুদ্র—অতি তুচ্ছ, অনন্ত এ নরসিকু-মাঝে
বিন্দু বিশ্বপ্রায় ;

কিবা ক্ষতি

যদি তাহা হয় লয় তোমার সংকারে !

যদি রূপা করি' আসিয়াছ পুরে,

তিষ্ঠ ক্ষণকাল,

বলি দিই এ জীবন সম্মুখে তোমার,

স্বপকার করুক রক্ষন,

স্বখে তুমি করহ পারণ

নারায়ণ অতি পূজ্য অতিথি আমার ।

ব্রাহ্মণ ।

ভাল ভাল,

গতিরোধ করিলে আমার !

মাংসাশী ব্রাহ্মণ আমি,

লবণাক্ত মাংসের আশ্বাদ

প্রলুব্ধ কবিছে মোরে ;

প্রীত আমি বাক্যে তব ;

কিন্তু—

বয়ঃপক্ব মাংস তব নহে তো কোমল ;
 কহ কিবা ফল বৃথা বিনাশি তাহারে ?
 আমি চাই
 নধর কোমল মাংস শিশুদেহ হ'তে ।
 আহা উপাদেয়—অতি উপাদেয় ।
 স্মৃতিমাত্রে লাল্য করে রসনায় ।
 কহ, হবে কি উপায় ?

মন্ত্রী
 কর্ণ ।

—মহাৰাজ !
 (স্থির হও ;
 মুখে ব্যক্ত তব অন্তরের ভাব ;
 স্থির হও,
 রুদ্ধ কর বাক্যের তুয়ার ।
 (ব্রাহ্মণের প্রতি) দেব !

ব্রাহ্মণ ।

স্তুতিবাদ নাহি সাধ ;
 কহ শাস্ত্র, ফিরে যাব, কিম্বা রব অপেক্ষায় ?

কর্ণ ।

নর-শিশু !

ব্রাহ্মণ ।

হাঁ—হাঁ—

অষ্টম বর্ষীয় শিশু রাজ-বংশধর—

বিলাসে পালিত অঙ্গ কোমল-মসৃণ !

কর্ণ ।

এ কি প্রহেলিকা সম্মুখে আমার !

এ কি গুনি বাণী !

শিশু-মাংস লোলুপ ব্রাহ্মণ,

কহ সত্য,

কিম্বা উপহাস কর মোরে !

কহ দেব,

সত্য তুমি দ্বিজ, কহ ক্ষুধায় কাতর,
কিষ্ণা বেশধারী মৃৎজনে ছলিতে এসেছ—
দেবতা গন্ধর্ক কিষ্ণা মায়াধর কেহ !

ব্রাহ্মণ ।

ছলনায় নহি পটু,
ক্ষুধার্ভের কোথায় ছলনা ?
চাতুরী কি সাজে তারে,
যেই জন ক্ষুধার বাথায়
অন্ধকার নেহ রে ভুবন,
মৃত্যু যার সম্মুখে দাঁড়িয়ে ?

কর্ণ ।

কিন্তু ক্ষমা কর দেব,
কোথা পাব অষ্টম-বর্ষীয় শিশু রাজ-বংশধর ?

ব্রাহ্মণ ।

শুনিয়াছি পুত্রবান্ তুমি !

*মন্ত্রী ।

মহারাজ ! মহারাজ !
নহে দ্বিজ, রাক্ষস নিশ্চয় !

কর্ণ ।

নির্ঝাধ অজ্ঞান,
রসনা সংযত কব ।
ভেবেছ কি
হেন মায়াধর আছে কেহ তিন পুরে,
কর্ণের সম্মুখে যাচে বংশধর তার,
ক্ষুধার নিবৃত্তি হেতু ?
সত্য দ্বিজ তুমি নাহিক সন্দেহ ;
বিশ্বনাশী এই ক্ষুধা
একমাত্র তোমাতে সম্ভব ।
বুঝিয়াছি ইঙ্গিত তোমার
পুত্রবান্ বটে আমি !

হে ব্রাহ্মণ, কবাব পারণ,
 আশীর্বাদে তব
 জ্ঞানহারা কোরো না আমারে
 যতক্ষণ অভীষ্ট আমার না হয় পূরণ ।

ব্রাহ্মণ ।

সাধু ! সাধু !
 আশ্বস্ত হইলু আমি শুনি' সঙ্কল্প তোমার ।
 কিন্তু হে রাজন্,
 আছে পারণের সামান্য নিয়ম !

কর্ণ ।

অসামান্য করুণা তোমার,
 সামান্যে কি আসে যায় ?
 কহ কি নিয়ম ?

ব্রাহ্মণ ।

তুমি আর মহিষী তোমার
 করাতে কাটিবে তনয়ের শির,
 হস্তমুখ,
 বিন্দু অশ্রু ঝরিবে না নয়নে কাহারো,
 তবে সিদ্ধ হবে সেই বলি ;
 পরে সূপকার করিবে রক্ষন,
 আনন্দে পারণ করিব ক্ষুধার্ত আমি ।

কর্ণ । (স্বগত) প্রার্থা যেরূপ করিবে প্রার্থনা,

বিমুখ না করিব তাহারে !
 হৃদি-বৃত্তি, স্নেহ মায়া মমতা করুণা,
 অশ্রুধারা হৃদয় কম্পন,
 কিছু আর নহে তো আমার—
 বিসর্জন দিয়াছি সকলি
 কোন দূর অতীত সায়াহ্নে

সাক্ষী করি' তোমাতে ব্রাহ্মণ !
 আজ দেখি, সে প্রতিজ্ঞা
 ধরি' দ্বিচ্ছের আকার
 আসিয়াছে পরীক্ষিতে মোরে ।
 একদিকে, আত্ম হ'তে উদ্ভূত সম্ভান
 আত্মজ আমার
 এই হৃদয়ের শোণিত-আধার ;
 অন্যদিকে—
 জীবনের সার মহাসত্য,
 অক্ষরে প্রত্যক্ষ ব্রহ্ম অক্ষয় অব্যয় ।
 কায়ে রাখি,
 কায়ে করি বিসর্জন ?
 (প্রকাশ্যে) হে ব্রাহ্মণ !
 এস, কর বিশ্বাম গ্রহণ,
 মহাভাগ্যবান আমি—
 আজি তোমা করাব পারণ ।

কর্ণ ও ব্রাহ্মণের প্রস্থান

যশী ।

নাহি জানি কে মায়াবী দ্বিজ-বেশধারী
 আসিয়াছে অনর্থ বাধাতে আজি !
 পিতা মাতা স্বহস্তে বধিবে
 তনয়ে আপন—
 শুনি নি কখনো !
 মহাপাপ বৃদ্ধি আজ ঘেরিল মেদিনী !
 আচ্ছন্ন ভূপতি,

জ্ঞানহীন উন্মত্তের প্রায়
পুত্রবধে হইল মম্বত ।
দেখি পুত্রঘাতী স্পর্শে মহাপাপ ।

পঞ্চম দৃশ্য

কর্ণের অন্তঃপুর

কর্ণ ও পদ্মা

পদ্মা । পুত্র বলি ! নিজ হস্তে ?
কর্ণ । নিজ হস্তে !
তুমি—আমি—জনক-জননী ।
পদ্মা । সত্য দ্বিজ ?
কর্ণ । দ্বিজ কিম্বা নহে দ্বিজ কিবা আসে ষায়,
সত্য বাক্য—
সত্য প্রতিজ্ঞা মোদের ।
পদ্মা । কিন্তু স্বামী—
কর্ণ । নাহি কিন্তু,
নাহি বিচার বিতর্ক ।
পদ্মা । বৃষকেতু !
বৃষকেতুর প্রবেশ
বৃষ । কেন মা ?
পদ্মা । না—না,
ডাকি নাই তোরে ।
পালাও পালাও দূরে,
ধরণীর সীমান্ত-প্রদেশে,

যেথা সত্যে বন্ধ নহে পিতা,
 মাতা নহে পুত্রহৃদা-স্বামী-অনুগামী !
 কর্ণ । রাগি, বিন্দু-অশ্রু না ঝরিবে
 ন নে কাহারো ।
 পদ্মা । ভগবান ।
 কেন পুত্রবতী ক'রেছিলে মোরে ?
 কর্ণ । ও কি ?
 কাঁপিবে না মাংসপেশী অন্তর চরণ,
 শুষ্ক চক্ষু—কঠোর করাল,
 অবিকৃত নয়ন বদন ।
 বৃষ । কেন মা, কেন বাবা, আপনারা অমন ক'চ্ছেন ?
 পদ্মা । জগতের আদি দিন হ'তে
 ভূ-ভারতে শোনে নাই কেহ
 হেন অসঙ্গত কার্য্য বিপরীত !
 পশু শু'ন' আওকে কাঁপিবে,
 বাঘী শিহারবে,
 নিবিড় গহনে সিংহিনী লুকাবে ডরে,
 রক্ত-ভূষা ভূলবে রাক্ষসী,
 উন্মাদ কাঁদিবে,
 সৃষ্টি মুছে যাবে,
 বক্ষ্য্য হবে স্ত স্ততা মেদিনী—
 জননী যত্নাপ হয় মস্তান-ঘাতিনী !
 না—না—অসম্ভব ।
 কোথা পুত্র ?
 কোথা বৃষকেতু ?

আয় বাপ বক্ষমাঝে—

মাতৃ-বক্ষ সন্তানের চির-নিরাপদ

আনন্দ আলয় ।

বৃষকেতুকে বক্ষে ধারণ

বৃষ ।

মা মা ।

পদ্মা ।

বল্ বল্, জুড়াক জীবন !

পুত্রমুখে এ কি সম্বোধন !

মা—মা—একাঙ্কর বাণী—

স্বধার নিবন্ধ,

মা—মা

ভাঙ্গা ভাঙ্গা আধ আধ স্বরে,

একেবারে পুঞ্জীভূত জগতের সমস্ত সঙ্গীত !

মা—মা

এই ক্ষুরিত অধরে

মা—মা

কৈশোরে ঘোবনে—

পরিণত বার্কিকা বয়সে

সমস্বরে বাঁধা স্বর মধুর—মধুর—

বল্ বল্ আরবার ;

শুনিতে শুনিতে

হই লয় সমাধির কোলে,

চেতনা বিলুপ্ত হ'ক্ মহা সন্ধিক্ষণে !

কর্ণ ।

বাণি !

নাহি হও সংজ্ঞাহীম,

জেনো—সত্যাদীন মোরা ।

পদ্মা । কিন্তু মহারাজ,
জ্ঞান নহে অনীন আমার—
পুত্র স্নেহে বন্দি নই অধীনা ।

(নেপথ্যে ত্রাস্কণ) কহ রাজা,
কতক্ষণ র'ব অপেক্ষায় ?
পারনের বেলা ব'য়ে যায় ।

কর্ণ । দেব !
বহু ক্ষণ, আমিও প্রস্তুত—
বৎস !

বৃষ । কেন বাবা !

পদ্মা । হ'ক জিহ্বা পাষণে গঠিত,
পক্ষাঘাতে জড়পিণ্ডে পরিণত হ'ক
উভয়ের দেহ,
মৃত্যু যদি রুপা নাহি করে ।

কর্ণ । ওঁ ৩০ রাণি, শোন নি নিঃশব্দ,
স্ব-ইচ্ছায় আত্ম-সমর্পণ করেছিলে তুমি,
প'রেছিলে সন্তোষ শৃঙ্খল,
নহে সে কথার কথা ।
সেই দিন হ'তে
মৃত্যু সম এ সংসার করিতেছ বাস—
অতিথিনী পরগৃহ-গাঝে,
সন্তো বন্ধু পাষণ বিগ্রহ—
পরপুত্রে আদরে হৃদয়ে ধরি'
আজি পরীক্ষার দিনে
কেন ভোল সেই কথা ?

আমিই বলিব—
 আমি বলি দিব—
 তুমি সহমৃত্যু সঙ্গিনী আমার,
 বাঁধ বুক, হও দৃঢ়,
 ছেনো সত্য ভগবান—
 যদি রাখি মতা, রাখি মন,
 নহে এ সংসার ধ্বংসের আগার,
 প্রয়োজন নাহি কিছু তার।
 শুন বৎস, শুন বৃষকেতু!
 সত্য-বাক্য ব্রাহ্মণের ঠাই
 বলি দিব তোম। ক্ষুধার্তের তৃপ্তি হেতু।
 পুত্র, ঋণে মুক্ত কর আমাদের।

বৃষ। মা, এইজন্য তুমি কাতর হ'য়েছ? ক্ষুধার্ত ব্রাহ্মণের তৃপ্তির জন্য
 আমি বলি হ'ব এ তো আনন্দের কথা।

ব্রাহ্মণের প্রবেশ

ব্রাহ্মণ। কৈ মহারাজ, আর বিলম্ব কত? আমি অপেক্ষা ক'রতে
 পারব না, ক্ষুধার তাড়নায় অস্থির হ'য়ে উঠেছি। আমার
 সামনেই বলি দাও। কৈ? এই ছেলেটি? বাঃ বাঃ!
 দিবা কাস্তি!

বৃষ। ব্রাহ্মণ, প্রণাম! আপনিই ক্ষুধার্ত? একটু অপেক্ষা করুন।
 আসুন পিতা, আশায় বলি দিন।

ব্রাহ্মণ। শুধু পিতা না, মা বাপে দু'জনে কাটবে—আমার সামনে—
 আমি দেখব—চোখে যেন এতটুকু জল না পড়ে। সত্যশ্রদ্ধী পণ,
 আমিই তার মাক্ষী।

পদ্মা । হে ব্রাহ্মণ !
 ধরি পায়,
 আগে বলি দেহ মোরে,
 পরে কোরো যেন অভিক্রুচি তব !

ব্রাহ্মণ । তাও কি হয়? তোমার স্বামী যে সত্য ক'রেছেন—তাও কি হয় ?

পদ্মা । হে দেবদেব মহাদেব !
 হে নারায়ণ ! হে ব্রাহ্মণ !
 সত্য যে গো নির্ময় এমন
 আগে তো বৃষ্ণি নি,
 দীনা জ্ঞানহীনা,
 কর পার মহা পরীক্ষায় ।
 না জানি উপায় ।
 অঁথি নীর করিতে নিরোধ
 কহ স্বামী, কিবা আজ্ঞা তব ?

কর্ণ । আজ্ঞা মম লেখা অনি ধারে ।
 দৌবারিক, দেহ অস্ত্র ।
 পুত্র !

বৃষ : পিতা, আমি তো প্রস্তুত ।
 দৌবারিক বর্জুক অস্ত্র প্রদান

ব্রাহ্মণ । বৃষকেতু, এই আসনে বসো । রাজা, রাণী, আর বিলম্ব কেন ?

অস্ত্র ধর ।

বৃষ । মা, কিছু দুঃখ করো না, আমার এতটুকু লাগবে না ; আমি মনে
 মনে তোমার আর বাবার চরণ ধ্যান করি, আর তোমরা আমায়
 কাটো । শ্রীকৃষ্ণের চরণ তো ধ্যান ক'রতে পারবো না, কখনও তো
 শ্রীকৃষ্ণের চরণ দেখি নি ।

কর্ণ ।

রাণি !

পদ্মা

জ্ঞানহীনা হইনি এখনো—

প্রভু, আমিও প্রস্তুত !

কর্ণ ।

নারায়ণ !

পদ্মা ।

শ্যামী !

উভয়ে কাটিতে লাগিলেন, সহসা ব্রাহ্মণ অস্তিত্ব হইলেন

দৈববাণী ।

সত্য মাত্র আহার আমার ।

বহুদিন ছিন্ন উপবাসী

আজি পরিতৃপ্ত ক্ষুধা,

ক্ষুধাপানে আনন্দ-বিভোর,

ধন্য কর্ণ, ধন্য পদ্মাবতী !

সার্থক জীবন—এ সংসারে সত্যাত্মীয় আদর্শ দম্পতি,

সত্য-পাশে বেঁধেছ আমারে ।

বৎস বৃষকেতু ! দেখ নাই শ্রীকৃষ্ণ চরণ,

দেখ কৃষ্ণমূর্ত্তি সম্মুখে তোমার ।

কর্ণ ।

এ কি !

শ্রীকৃষ্ণের হাত ধরিয়া বৃষকেতুর প্রবেশ

বৃষ । মা ! মা ! কে এসেছে দেখ ।

পদ্মা । বাবা ! বাবা ! (বক্ষে ধারণ)

শ্রীকৃষ্ণ । ইন্দ্রপ্রস্থ হ'তে মথুরায় ফেরবার পথে একবার তোমার এখানে

অতিথি হ'তে এলাম ।

উভয়ে । দয়াময়, তোমার এত করুণা !

শ্রীকৃষ্ণ । তোমরা যে সত্যে আমার বন্ধ ক'রেছ, আমি যে দাতা-কর্ণের

সখা ! আহারের উদ্যোগ ক'রবে চল, সত্যই আমি ক্ষুধার্ত্ত ।

সকলের গ্রহান

পঞ্চম অঙ্ক

প্রথম দৃশ্য

শবাচ্ছন্ন রণস্থল

শৈরব ও শৈরবী

গীত

রবি শশীডোবে শোণিত সাগরে, রুধিরে ভাসিছে ধরা

এলয় ধূম ছেয়েছে গগন, গরজে পবন ঐাণহারী ।

কেরে অট অট হাসে ?

কাঁপে নিখিল ভুবন ত্রাসে,

নাচে বহুকাল—কেরে কেরপাল

শৈরবী ভীমা হুঙ্কারে ঘন রুধির তৃষা মাতোয়ারী ।

উভয়ের এহান

দ্বিতীয় দৃশ্য

হস্তিনা

ধৃতরাষ্ট্র ও সঞ্জয়

ধৃত । সঞ্জয় ! দিক্‌হস্তী গর্জন ক'রছে কেন ? কুলবধুরা হঠাৎ কেঁদে
উঠলো কেন ? আমার সিংহাসন কাঁপছে কেন ? অকালে বজ্রপাত
হ'ল কেন ? হুর্ঘ্যোধন ভূমিষ্ঠ হয়ে রাসভের গায় চীৎকার ক'রেছিল,
আজ আবার সেই চীৎকার-ধ্বনি হ'চ্ছে কেন ? পৃথিবীর সমস্ত অমঙ্গল
একসঙ্গে দেখা দিয়েছে ? আর কি তার ধ্বংস আসন্ন ?

সঞ্জয় । হে আৰ্য্য । পৃথিবীর ধ্বংস আসন্ন নয় ! জড়িত রসনা—কি ব'লব—আজ আচার্য্য দ্রোণ, অৰ্জুনের শরে ভূমিশয়া গ্রহণ ক'রেছেন ।

ধৃত । আচার্য্য দ্রোণও আমাদের ত্যাগ ক'রে গেলেন? জ্যেষ্ঠতাত ভীষ্ম—ষাঁর সমকক্ষ বীর তিনলোকে কেউ ছিল না—তিনি শরশয্যায় ইচ্ছায় মৃত্যুকে বরণ ক'রে নিলেন । আচার্য্য দ্রোণ—মহামুনি জামদগ্ন্যর শিষ্য—তিনিও হত ? সঞ্জয় ! সঞ্জয় ! আমায় একবার বরণক্ষেত্রে নিয়ে যেতে পার ? অন্ধ—দেখতে পাব না—একবার স্পর্শ ক'রে অনুভব ক'রে আসি, মৈনাক কেমন ক'রে শোণিত সাগরে আত্ম-গোপন ক'রেছে !

সঞ্জয় । হে মহাভাগ ! স্থির হ'ন । যুদ্ধে জয়-পরাজয়ে ক্ষত্রিয়ের তো সম উল্লাস, তবে আপনি বিচলিত হ'চ্ছেন কেন ?

ধৃত । সঞ্জয় ! সব জানি, সব বুঝি—কিন্তু তবু—শত পুত্রের পিতা আমি—আমাকে কি বড়ই বিচলিত দেখছ ?

সঞ্জয় । হাঁ দেব !

ধৃত । আবরণ দিয়ে রেখেছিলাম । ক্ষুর সাগর বিচলিত আজ হয় নি, বহুপূর্বে এ সাগরে তরঙ্গ উঠেছে । কাউকে জানতে দিই নি, বুঝতে দিই নি ! কুলক্ষয়ের দুর্বিষহ দৃশ্য আমার অন্ধ চক্ষুকে প্রতারিত করতে পারে নি ।

সঞ্জয় । মতিমান্ ! কেন বৃথা কুলক্ষয়ের আশঙ্কা ক'চ্ছেন ? এই তো যুদ্ধের প্রারম্ভ ; এখনও ত কোঁরবেয়া হীনবল নয় ।

ধৃত । সঞ্জয় ! আশঙ্কা বৃথা নয়, তোমার সাহসনা বৃথা । আর কেউ জানে কি না ব'লতে পারি না, কিন্তু আমি জানি—শত পুত্রের শোক নিয়ে আমাকে আর গান্ধারীকে বেঁচে থাকতে হবে । যে দিন দুর্ঘ্যোধন জন্মগ্রহণ ক'রেছে সেই দিন আমি জানি—পুত্র আমার

কুলনাশন ! যে দিন থেকে দুর্ঘোষন পঞ্চ-পাণ্ডবের উপর ঈর্ষা পোষণ ক'রেছে, সেই দিন থেকেই জানি আমার বংশনাশ নিশ্চিত ! দুর্ঘোষন বুঝতে পারে নি, আমি বুঝতে পেরেছিলাম—যে দিন সে জতুগৃহে আগুন দিয়েছে, সেই দিনই কুরু-বৃক্ষের মূলে অগ্নি প্রবেশ ক'রেছে । অস্ত্র-পরীক্ষায় যে দিন আমার পুত্রের সহিত কর্ণের মিলন হ'য়েছে, আমি সেই দিন থেকে জানি—কৌরবের ধ্বংস অনিবার্য ।

সঞ্জয় । সবই বিধিলিপি ।

ধৃত । বিধিলিপি ? কখনও নয় । বিধিলিপি ত অজ্ঞেয় ; কিন্তু আমি দিব্য চক্ষে সেই দিনই দেখেছিলাম, আমার শতপুত্র মৃত্যুর ক্রোড়ে সেই দিন আশ্রয় নিয়েছে, যেদিন শকুনি কপট অক্ষক্রৌড়ায় ধর্ম্মাত্মা যুধিষ্ঠিরের সর্বস্ব অপহরণ ক'রেছে । যেদিন কৌরব-সভায় আমার কুলবধু দ্রৌপদীকে আমার পুত্র দুঃশাসন কেশাকর্ষণ ক'রে বিবস্ত্রা ক'রতে গিয়েছিল, আমি সেইদিনই বুঝেছিলাম, সমস্ত দেবতার রোষবহ্নি আমার মহাবংশকে ধ্বংস ক'রবার জন্ম প্রজ্বলিত হ'য়ে উঠেছে । যদুপতি শ্রীকৃষ্ণ পাণ্ডবদের দূত হয়ে যেদিন আমার পুত্রের নিকট পঞ্চ পাণ্ডবের জন্ম পাঁচখানি মাত্র গ্রাম ভিক্ষা ক'রতে এসেছিলেন, আর তার উত্তরে, দুষ্ট মন্ত্রীর পরামর্শে দুর্ঘোষন দূতের অপমান করে ভগবানকে বাঁধতে গিয়েছিল—আমি সেইদিনই জানি ভীষ্ম, দ্রোণ, কৃপ, কর্ণ, দুর্ঘোষন, দুঃশাসন সকলে মৃতের গায় অবস্থান করছে ।

বিহ্বল ও দুর্ঘোষনের প্রবেশ

দুর্ঘো । হে পিতৃব্য ! বৃথা অহুরোধ,
 দুর্বীর প্রতিজ্ঞা মোর
 ষতক্ষণ দেহে রবে প্রাণ—

সূচ্যাগ্র মেদিনী নাহি দিব পাণ্ডবেরে কভু ।

হ'ন শ্রীকৃষ্ণ সহায়,

কিবা ক্ষতি তায় ?

ক্ষত্র-ক্ষেত্রে জন্ম মোর,

মহামানী আমি দুর্ঘোষন,

পিতা মোর কোরব-ঈশ্বর,

মৃত্যুভয়ে সন্ধি করিব হে আমি—

বাতুলের ঐ কল্পনা !

ছিল প্রাণ, নহে বর্ণক্ষেত্রে করিব শয়ন—

জন্ম মৃত্যু সমান আমার !

ধৃত । কে ? দুর্ঘোষন ? সঙ্গে কে ? বিহুর ? আর কে ?

বিহুর । হে জ্যেষ্ঠ, আপনি এখনো দুর্ঘোষনকে নিবৃত্ত করুন । আজ

আচার্য্য দ্রোণের পতনে সৈন্যেরা সকলেই নিক্রমসাহ হ'য়েছে । এ

কাল যুদ্ধে আর প্রয়োজন নাই ।

ধৃত । বিহুর ! কালের গতি পরিবর্তন ক'রতে মহাকালও পারেন না—

তুমি আমি কোন ছার ।

দুর্ঘোষ্য । পিতা, নিক্রমসাহ হবেন না । কপট-সমরে পিতামহ ভীষ্মকে বধ

ক'রে পাণ্ডবদের এত উল্লাস ! ধর্ম্মাত্মা যুধিষ্ঠির মিথ্যার আশ্রয় নিয়ে

আচার্য্য দ্রোণকে বধ ক'রেছে, তাই পাণ্ডবদের এত উল্লাস ; কিন্তু

এবার কপটতা আর মিথ্যার আবরণ পাণ্ডবদের রক্ষা ক'রতে পারবে

না । আমি কর্ণকে কুরুসৈন্যের সেনাপতি ক'রেছি । আর মমতা

নেই, স্নেহের বন্ধন নেই, এবার দেখ'ব, কি কৌশলে শ্রীকৃষ্ণ পাণ্ডবদের

রক্ষা করেন । আমি মহাবাজ শল্যের শিবিরে যাই, তাঁকেই কর্ণের

সারথি হ'তে হ'বে ।

ধৃত । হৃষ্যোধন চলে গেল ? বিহুর কি এখনো অপেক্ষা ক'রুছ ?

বিহুর । অনুমতি করুন ।

ধৃত । আর কতদিন ?

বিহুর । আমায় আর জিজ্ঞাসা করছেন কেন ? আপনার অগোচর কি আছে ?

ধৃত । বলতে পার, কত জনের কর্মফলে এই শাস্তি ? এই পুত্র হৃষ্যোধন আর তার উনশত ভাই, কেউ থাকবে না, তবু আমাকে বেঁচে থাকতে হবে ।

বিহুর । হে জ্যেষ্ঠ ! আজ আমি আপনার নিকট বিদায় নিতে এসেছি ।

ধৃত । বুঝেছি বিহুর, কুলনাশ স্বচক্ষে দেখবে না ব'লে বিদায় চাচ্ছ ; কিন্তু ভাই, বিদায় ত তোমায় সেই দিনই দিয়েছি, যে দিন দ্যুত-সভায় হৃষ্যোধন তোমায় তাড়িয়ে দিচ্ছিলেন, আর আমি তা নিবারণ করি নি । কোথায় যাবে ?

বিহুর । মহর্ষি ব্যাসের আশ্রমে, আর সংসারে নয় ।

ধৃত । বেশ তাই যাও ; তোমার কুটীরশ্রমে একটু স্থান রেখো—আমি আর গান্ধারী সত্বরই তোমার অতিথি হ'ব । ভাই, ভাই, শক্রপূরীতে আমার একমাত্র আত্মীয় ভাই ! অভিমানে কখনো আমার অনগ্রহণ কর নি, কিন্তু চিরদিনই আমার মঙ্গল কামনা ক'রেছ, তোমায় বিদায় দেব—পুত্র-শোকেরই মত এ বিদায়ে আমার বুক ভেঙ্গে যাচ্ছে ! ভাই, যাবার পূর্বে একবার আমার বুক এস ।

বিহুর । দাদা, আমার স্থান আপনার চরণতলে ।

তৃতীয় দৃশ্য
পাণ্ডব-শিবির

শ্রীকৃষ্ণ ও অর্জুন

অর্জুন ।

ধিক্ ধিক্ জীবনে আমার ।
ছার রাজ্য, ছার সিংহাসন
করিনাম গুরু-বধ শেষে ।
ছিল যঁার পুত্রাধিক স্নেহ মম প্রতি,
জ্ঞানহারা—সেই গুরু মোর
অজ্ঞেয় ভুবনে,
হিমাদ্রির সম
অচল অটল স্থির রণসিন্ধু মাঝে,
মাৎস্য-তাড়নে
হানিলাম পুনঃ পুনঃ বাণ
দেব অঙ্গে তাঁর ।
যত্নপতি !

কহ,

কতদিনে হবে এই যুদ্ধ অবসান ?
মহাপাপে মুক্ত হ'ব আমি ?

শ্রীকৃষ্ণ ।

হে কোন্তেয় !

পুনঃ কেন অজ্ঞানের সম এই শোক ?

কেন অহঙ্কারে ভাব

তুমি বধিয়াছ দ্রোণে ?

মহাকাল করে মহামার,

তুমি নিমিত্ত কারণ তার

ধর্মক্ষেত্রে কুরুক্ষেত্রে কহিয়াছি তোমা

ধর্মের নিগূঢ় তত্ত্ব ।

তবু শোকময় কেন,

কেন বীর অধীর এমন ?

অর্জুন ।

হৃর্বল হৃদয়,

বিচিত্র গঠন তার,

বিবেক বিহীন দেখি হৃদয়ের কাছে ।

শুন স্ববীকেশ,

হ'ক জ্ঞান যতই কঠোর,

পদে পদে পরাজিত তাহা

অস্তুরের সামান্য আঘাতে ।

শোক বল কেমনে নিবাবি ?

ভীমের প্রবেশ

ভীম ।

হে মাধব !

মহোন্মাদ শুনিনাম বিপক্ষ-শিবিরে,

মহা-আস্ফালন করে কৌরবীষ চম্—

কর্ণ হ'ল সেনাপতি রণে ;

দামামা-নির্ঘোষে

স্মৃত-বংশাধম

সৈন্য-মাঝে করিছে প্রচার—

কালি রণে বধিবে পাণ্ডবে ।

হ'ল ভাল—

পিতামহ ভীষ্মদেব, গুরু দ্রোণ,

আছিলেন নায়ক যখন,

মমতায় করিয়াছি রণ ;
 এবে কর্ণ সেনাপতি,
 প্রাণ ভরি' মিটাইব রণতৃষ্ণা :ম !
 হে অর্জুন !
 কেন ম্লান ?
 কেন হেরি নিরুৎসাহ তোমা ?

শ্রীকৃষ্ণ । আচার্য্যের মৃত্যুতে অর্জুন শোকে কাতর হয়েছেন ।

ভীম । এ তো শোকের সময় নয় । বৈরী আক্ষালন ক'রছে, আর আমরা
 শোক ক'রব ? শোক করব—যখন কুরুপক্ষের কেউ থাকবে না ।
 তখন শতভাই দুর্ঘোষন, ভীষ্ম, দ্রোণ সকলেরই জন্ম শোক ক'রব—
 এখন নয় । আচার্য্য ! অর্জুন দ্যুত-সভার প্রতিজ্ঞা কি এর মধ্যে
 ভুলে গেলে ?

অর্জুন ! ভুলি নাই,
 আছে হৃদয়ের স্তরে স্তরে লেখা—
 জ্যেষ্ঠের লাঞ্ছনা,
 পাঞ্চালীর অপমান
 অগ্নির অক্ষরে,
 তবু ভাই বিকল অন্তর,
 গুরু-হস্তা আমি !

ভীম । গুরুশোক করিব হে রণ-অবসানে ।

শ্রীকৃষ্ণ । এই তো বীরের কথা !
 যুদ্ধ অন্তে ক্ষত্র করে শোক,
 হাসিমুখে পুত্র দেয় বলি'
 হৃদয়ে পাষণ বাধি' ।
 ক্ষত্রিয়ের শোক ফুটে অসিমুখে !

হত অভিমত্যা—

তবু আছি স্থির অশ্ব-বজ্জু ধরি' ।

আখি নীর শুষ্ক সব সমর উত্তাপে ।

অর্জুন ।

সপ্তরথা মারিয়াছে অভিমতে মোর—

হে মাধব, ভাল কথা করালে স্মরণ ।

বৃহমুখে ছিল জয়দ্রথ,

আজি পরপারে করিছে বিশ্রাম ।

সপ্তরথী মাঝে কর্ণ একজন—

ভাল কথা করা'লে স্মরণ ।

হে মধ্যম !

কোথা রাজা ? কোথা যুধিষ্ঠির ?

দামামা নির্যোধে

দুষ্ট দুর্ঘোধন প্রকাশে উল্লাস,

শত বজ্রে কর আবাহন—

উঠুক গর্জিয়া সপ্ত সমুদ্রের বারি—

মহারোলে ছুঁকারি' পবন করুক প্রচার—

কালি রণে কর্ণবধ প্রতিজ্ঞা আমার !

শ্রীকৃষ্ণ ।

যাও দুই ভাই.

দেখ কোথা জ্যেষ্ঠ যুধিষ্ঠির ।

অতি স্নান গুরু-বধে তিনি,

অনুমানি, নির্জনে করেন খেদ ।

ভীম ।

শোক-অগ্নি তাঁর করিব নির্বাণ

দুঃশাসন বক্ষ-রক্ত ঢালি'—

এস ভাই ।

শ্রীকৃষ্ণ । ভারত-যুদ্ধে অস্ত্র ধারণ করব না ; কিন্তু সমস্ত অস্ত্রের ধার-
 মুখে আমি । অর্জুন প্রতিজ্ঞা ক'রলে কর্ণ বধ ক'রবে ; কিন্তু কর্ণ
 তো সামান্য বীর নন । সহজাত কবচ-কুণ্ডলধারী জামদগ্ন্যশিষ্য কর্ণকে
 বধ ক'রতে দেবতারাও পারেন কিনা সন্দেহ ! অর্জুনের পক্ষে একা
 কর্ণ বধ অসম্ভব । আর যদিও অর্জুন কোনরূপে কর্ণের শৌর্য্য সহ্য
 করতে পারে—যুধিষ্ঠির, ভীম, নকুল, সহদেব অগ্নিমুখে তুণের মত
 কর্ণের শরানলে দগ্ধ হবে । তাই যদি হয়, তা হ'লে আমার এট
 ভারত-যুদ্ধের আয়োজন, সবই তো পণ্ড ।

কুন্তীর প্রবেশ

শ্রীকৃষ্ণ । কহ মাতা,
 কিবা প্রয়োজনে আগমন হেথা তব ?
 শুষ্ক মুখ, ভয়ে ভীত সঙ্কুচিত গতি,
 মহারণে পড়িয়াছে দ্রোণ,
 পুত্রগণ বিজয়ী তোমার,
 তবে কেন নিরানন্দ হেরি ?

কুন্তী । শুনি অন্তর্ধামী তুমি ।
 যদি সত্য অন্তর্ধামী,
 অস্ত্রের ভাষা মোর বুঝহ আভাষে ।
 বুঝ কি বেদনা তার
 যেই নারী পুত্রের জননী ।

শ্রীকৃষ্ণ । কিন্তু মাতা,
 পুত্রগণ নহেক সামান্য তব,
 তবে কি হেতু কাতর ?

কুন্তী । যদি বুঝিয়া না থাক,

হ'তে পার তুমি ভগবান,
কিন্তু স্থনিশ্চয়—নহ—অস্তর্যামী কভু,
পুত্রগণ বিজয়ী আমার
নাহিক সন্দেহ ;
কিন্তু কৃষ্ণ !
কালি রণে ভ্রাতৃদ্বন্দ্বে মাতিবে মেদিনী,
সহোদর, সহোদর- বধে তুলিবে কুপাণ,
আমি কুন্তা জননী পুত্রের—
নিরুদ্ধেগে দেখিব মে রাক্ষসীয় লীলা !
কহ, নারী ব'লে
সহেরও কি নাহি সীমা মোর ?

শ্রীকৃষ্ণ

মাতা,
এতদিন যে কথা কর নি প্রকাশ
আজি যদি কহ ধর্মরাজে,
যুধিষ্ঠির—সদাধর্ম অনুগামী
সিংহাসন ডালি দিবে জ্যেষ্ঠের চরণে ;
অভীষ্ট আমার
ধর্মরাজ্য স্থাপনের মহা আয়োজন,
সকলি হইবে পণ্ড !
বুঝ দেবি,
মহাকার্য্য হবে নাশ,
তুমি হবে নিমিত্ত তাহার ।

কুন্তী

তবে পুত্রবধ হেরিতে হইবে মোরে ?
তুমি জান, কর্ণ মহাবীর,
তিন লোকে সমকক্ষ নাহি তার কেহ,

পঞ্চ-পাণ্ডব-জননী আমি
 পুত্রহারা হ'ব তার বশে ?
 যাহাদের তরে সহিয়াছি এত দুঃখ,
 বনে বনে ভিখারিণী বেশে,
 কভু নির্জনে কুটীরে,
 আশি-নীরে ভাসিয়ে মেদিনী
 ষাপিয়াছি অন্ধকারে দিবস ষামিনী ?

শ্রীকৃষ্ণ

মাতা, বখা এ আশঙ্কা তব ।
 তিনলোকে নাহি কেহ
 অর্জুনে বধিতে পারে ।

কুন্তী ।

আর চারি পুত্র মোর ?

শ্রীকৃষ্ণ ।

ধর্মরাজ রক্ষিত সকলে
 যম-জয়ী হবে .

কুন্তী ।

কিন্তু কর্ণ ?

শ্রীকৃষ্ণ ।

মাতা । এইবার চিন্তিত করিলে নোরে ;
 কিন্তু দেবী, বুঝিতে না পারি
 কিবা খেদ

কর্ণ যদি পড়ে রণাঙ্গনে—

চির পুত্র-বৈরী তব সেই ।

আর তুমিও তো মাতা,

জননার স্নেহে তারে কর নি পালন,

তবে আজি কেন এই মায়া ?

কুন্তী ।

শুনি ভগবান,

তুমি জগতের জনক-জননী,

তবে কেন নাহি বুঝ মা'র মনোব্যথা ?

পালন করি নি তারে !
 কত দিন—কত মাস—কত বর্ষ হয়েছে বিগত,
 মুখ তার করি নি দর্শন—
 কিন্তু নারায়ণ
 মাতৃ-বক্ষ মাঝে
 নিমিষের স্মৃতি দিয়ে গড়া,
 সেই পরিত্যক্ত সম্মান আমার
 পলে পলে হয়েছে বর্ধিত !
 কল্পনায় মাতৃসুত্র করিয়াছে পান,
 কল্পনায় ক্ষুদ্র বাহু বেড়ি'
 ধরিয়াছে গলদেশ মোর,
 কল্পনায় কেঁদেছে কখনো,
 খলখল হেসেছে মধুর,
 শত চুম্বনের সোহাগ মাখান
 সেই ফুল কুম্বের মত ক্ষুদ্র মুখখানি
 কতবার গণ্ডে মোর করেছে স্থাপন !
 সেই অভাগা নন্দন—
 যদি কালি রণে হয় তার নাশ—
 শ্রীনিবাস ।

শ্রীকৃষ্ণ ।

মাতা,
 এর একমাত্র আছে গো উপায়,
 কিন্তু তাহা অতীব কঠিন ;
 পারিবে কি তুমি ?

কৃষ্ণী ।

পুত্রশোক হ'তে আছে কি কঠিন কিছু ?

শ্রীকৃষ্ণ । কর্ণে তুমি পার কি করিতে নিবারণ
এই মহারণ হ'তে ?

কুন্তী । কোথা দেখা পাব তার ?

শ্রীকৃষ্ণ । মধ্যাহ্নে সমর ত্যজি'
নিত্য যায় সূর্য্য-সর্ঘ্য দিতে
যমুনা-সলিলে ;
কালি নিভূতে তাহার সনে কর দেখা,
কহ তাহে আশ্রু-পরিচয় তার,
কর অনুরোধ মিলিবারে যুধিষ্ঠির সনে ।
অনুমানি,
যদি শোনে তুমি জননী তাহার,
অনুরোধ তব এড়াতে নারিবে ।

কুন্তী । ভাল, তব আজ্ঞা করিব পালন,
যত্নপতি ।
যাব আমি কর্ণের নিকটে ।
সঙ্কটে সঙ্কটহারী,
তুমি মাত্র সহায় আমার ।

কুন্তীর প্রস্থান

শ্রীকৃষ্ণ । কুন্তী ! তোমার এই মমতাই তোমার পুত্রনাশের কারণ হবে ।
একা অর্জুনের মাধ্য কি কর্ণকে বধ করে ! সহজাত কবচ-কুণ্ডল-
ধারী কর্ণের নিধন অসম্ভব । দেখি, ইন্দ্রকে দিয়ে যদি কবচ-কুণ্ডল
ভিক্ষা করাতে পারি । কুন্তী ! তুমি, আমি, ইন্দ্র, মেদিনী, রামের
অভিশাপ এবং অর্জুন—এই ছয়জনের দ্বারাই কর্ণ বধ হবে ।

প্রস্থান

চতুর্থ দৃশ্য

নদীতীর

কর্ণ ও কুস্তী

কর্ণ ।

কহ কেবা তুমি

সুপ্রবাসে বর অঙ্গ করি' আচ্ছাদন,

প্রতীক্ষায় রয়েছ এখানে ?

কহ, কিবা প্রয়োজন তব ?

কুস্তী

বৎস, ভিখারিণী আমি ।

কর্ণ ।

বৎস বলি, সম্বোধন করিলে আমায়ে !

নমস্কার লহ দেবি !

কহ মাতা, কেবা তুমি,

কিবা প্রয়োজন তব ?

কুস্তী ।

কেবা আমি ?

পরিচয় মোর

অজ্ঞাতে তোমার কর্ণে উঠিছে ফুটিয়া ।

স্বপ্ত ছিল এতদিন যাহা

শোণিতের অন্তরালে তব,

কাল যাহা পারে নি নাশিতে ।

বৎস,

আমি কুস্তী—

কর্ণ ।

পার্শ্বের জননী ?

কহ মাতা,

এ কি অঘটন আজি ?

পঞ্চকেশরী-জননী তুমি,
 পাণ্ডব-ঈশ্বরী দীনা ভিখারিণী বেশে
 আসিয়াছ মোর কাছে
 চির পুত্র-বৈরী তব !
 কহ কিবা প্রয়োজন ?

কুন্তী ।

আসিয়াছি ষষ্ঠের নিকটে !

কর্ণ ।

আসিয়াছ ষষ্ঠের নিকটে ।

কহ, কি সম্বন্ধ তোমা আমার ?

এ কি !

জ্ঞান কেন বদন তোমার ?

অশ্রু কেন নয়নের কোণে ?

জ্ঞান কেন মধ্যাহ্ন-ভাস্কর,

জ্ঞান হেরি দিক্-চক্রেখেথা ?

মলিনতা ধমুনার নীরে !

কহ, সত্য কেবা তুমি ?

কুন্তী ।

আমি যে জননী তোমার ।

কর্ণ ।

স্বত-পুত্র আমি বাধার নন্দন,

চিরদিন এই খ্যাতি—

পরিচয়-পতাকা আমার

পুরোভাগে করেছে গগন—

আজি তুমি এসেছ হেথায়

শতচ্ছিন্ন করিনারে তারে ?

তুমি যদি না হইতে ধর্মরাজ্য যাতা,

যদি আর কেহ বলিত এ কথা,

মিথ্যাবাদী বলিতাম তারে !

কুস্তী ।

নহে মিথ্যা,
 সত্য নহ, তুমি রাখার নন্দন,
 অভাগিনী কুস্তীর তনয়,
 বৃদ্ধি দোষে মোর আজি স্মৃত আখ্যাধারী,
 ব্রাহ্ম বৈরী—মিত্র কোঁরবেব ।
 বৎস,
 তুমি মোর প্রথম তনয় ।
 সূর্য্য-তেজে জনম তোমার ।

কর্ণ ।

বিচিত্র নাটক—কাব্য কথা হেন—
 ইতিপূর্বে আর কেহ করে নি রচনা !
 পাটেশ্বরী ভারত-ঈশ্বরী জননী আমার—
 পিতা ওই তমোহর দেব দিবাকর
 আলোক আকর,
 আর, আমি ফিরি শৃগালের প্রায়
 অন্ধকার সংসার অরণো,
 পরিচয়হীন—বাক্ জগতের !
 যাও—যাও দেবি,
 উন্মাদ কোরো না মোরে ।
 তুমি মোর মাতা,
 মরণ শিয়রে করি'
 এই পরিচয়ে নাহি প্রয়োজন ।

কুস্তী ।

বিধির নির্বন্ধ বৎস,
 সত্য আমি তোমার মাতা ।

(দৈববাণী—সূর্য্য ।) বৎস,

সন্দেহ না মনে দেহ স্থান !

তুমি কর্ণ সন্তান আমার,
 জননী তোমার মন্থুখে দাঁড়ায়ে ওই ।
 কর্ণ । দিব্যালোক গ্রাস করিল রজনী,
 স্থান কাল হারাইল নিজ ব্যবধান,
 অতীত উদয় হেরি বর্তমান মাঝে !
 আমি কর্ণ কুস্তী-পুত্র রবির তনয়,
 মাতৃহারা আজ মাতার মন্থুখে,
 অদ্ভুত বিধির বিধি ।

হে জননী,

হও ষত অপরাধী—

তবু তুমি আরাধা আমার !

নহে ভিক্ষা,

কহ কিবা আজ্ঞা তব ?

কুস্তী ।

ভীষ্ম, দ্রোণ গত,

শুনিলাম এ সমরে তুমি সেনাপতি !

আকুল আমার প্রাণ—

ব্রাতৃবধে ভাই !

পুত্রহারা হবে কুস্তী তুমি কিম্বা পাণ্ডব উচ্ছেদে,

তাই লোকলজ্জা দিয়া বিসর্জন—

যে কলঙ্ক গোপনের তরে

বক্ষ ক্ষীরে বঞ্চিত করিয়া তোমা,

নয়নের নীরে ভাসি'

নদীজলে দিয়া ছিহু ডালি—

আজি স্ব-ইচ্ছায় সে কলঙ্ক ধরি' শিরোপরে,

—সেই নদীতটে

ভিখারিণী বেশে এসেছি তোমার কাছে
পুত্র,

ভিক্ষা—এ সময়ে দেহ কমা,

'মিল' যুধিষ্ঠির সনে,

ছয় পুত্র মোর রহুক জীবিত ।

কর্ণ ।

এত মায়া, এত স্নেহ, এতই ককণা—

ওই বক্ষে তব !

তবে কহ গো জননি,

কোন প্রাণে বিসর্জন ক'রেছিলে মোরে,

—অসহায় অবোধ অজ্ঞান শিশু,

দশ মাস দশ দিন গর্ভে দিয়ে স্থান ?

মৃত্যুখে দিয়েছিলে ম'পি'

প্রথম তনয়ে তব ?

কহ মাতা,

তখন কি কাঁদে নি গাঘের প্রাণ ?

বিন্দু বারি ঝরে নি কি নয়নে তোমার ?

কুন্তী ।

পুত্র !

আর লজ্জা নাহি দেহ মোরে ।

কর্ণ ।

কোথা লজ্জা ?

চির লজ্জাহীনা তুমি—

যাক্--

বুঝিয়াছি মাতা,

বুঝিয়াছি আগমন কারণ তোমার—

পুত্রস্নেহে অন্ধ তুমি !

কিন্তু আস নাই মোর ভরে,

আমি সেই বিসম্বিত অভাগ! তনয় তব !

আসিয়াছ

পঞ্চ-পাণ্ডবের কল্যাণ কান্দনা কার'

আব—কলঙ্কের ডালি তুলে দিতে শিরে মোর ।

হ'ক—তা'তে না ছিল আক্ষেপ,

কিন্তু মতো বন্ধ আমি দুর্ঘোষন পাশে,

আমরণ আঞ্জা তার করিব পালন ।

ভাজিতে তাহারে না পারিব কভু,

যদি জগতের সমস্ত মাত্ত

আজি দীন-কণ্ঠে ভিক্ষা করে কর্ণের নিকটে !

কৃত্তী

তবে নিষ্ফল হইবে ভিক্ষা ?

কর্ণ ।

এ জীবন করেছ নিষ্ফল,

ব্যর্থ করিয়াছ সব সাধনা আমার,

ক্ষত্র হয়ে নহি ক্ষত্র আমি,

রবিদ্রাতি ধূলিমাং ক'রেছ হেলায়—

দুর্ঘোষন বক্ষে স্থান দিয়েছে সাদরে,

কি আশ্চর্য্য, ভিক্ষা তব হইবে নিষ্ফল ।

মাতা,

নাহি জান কি করেছ তুমি ।

নাহি জান.

কি উত্তাপ—কি ঘনুনা ভীষণ

এই হৃদয়ের স্তরে স্তরে

আছে সঞ্চিত আমার !

তুমি যদি স্থান দিতে কোলে,

আজ ভারতের ইতিহাস হ'ত অন্তরূপ ।

কি করিব, বাক্য-বদ্ধ,
নাহিক উপায়—
আমি রব চির-বৈরাণী পাণ্ডবের ।

কুন্তী ।

আজ আমি যদি বলি,
যুধিষ্ঠির মর্গোরবে সিংহাসনে বসাবে তোমারে,
জ্যেষ্ঠ বলি' পূজিবে চরণ ?

কর্ণ ।

ভাগ্যবান যুধিষ্ঠির,
ভাগ্যবান চারি ভ্রাতা তার—
এই মাতৃস্নেহে বদ্ধিত হয়েছে তারা ।
চিরদিন ভাগ্যহীন আমি,
এই স্নেহে হ'য়েছি বঞ্চিত !
আসিয়াছ পঞ্চ তনয়ের কল্যাণ কামনা করি'
পঞ্চ পাণ্ডব-জননী,
এসেছ যখন,
সাধ্যায়ত্ত যাহা তাহা করিব গো দান—
নহে সিংহাসন লোভে ;
সিংহাসন অতি তুচ্ছ কর্ণের নিকটে !
শুধু রাখিতে সম্মান তব,
করি পণ—
এই যুদ্ধে হয় পার্থ নয় কর্ণ
ধরা হতে লইবে বিদায়—
তুমি রবে চিরদিন পঞ্চ-পুত্রের জননী ।

কুন্তী ।

বৎস,
বুঝিয়াছি অভিমান তব ।
আমি নারী দুর্বলা অভাগী,

মনোব্যথা মোর,
 জানেন সে অন্তর্ধামা ষিনি !
 কি বলিব—কমা কোরো মোরে,
 কমা কোরো জ্ঞান-হীনা জননী বলিয়ে,
 জেনে—
 শুধু করি নাই ব্যর্থ তোমার জীবন,
 জীবন-সঙ্গিনী ব্যর্থতা আমার—
 আমি মাতা অভাগা কর্ণের ।

শব্দান

রে অঙ্কন !
 এত দিন করিয়াছি হিংসার পোষণ,
 আজি দেখি ব্যর্থ সব ।
 তুমি বটে কুস্তী-পুত্র,
 আমি চিরদিন রাধার নন্দন ;
 অদ্ভুত অদ্ভুত লিপি !
 মাতা, নহে পরিচয়—
 নিজ হস্তে মৃত্যু দিয়ে গেলে মোরে ।

শব্দান

পঞ্চম দৃশ্য

কর্ণের প্রাসাদ-কক্ষ

পদ্মাবতী ও ছদ্মবেশী সূর্য্য

পদ্মা। আপনি কে ?

সূর্য্য। মা, সে পরিচয় দেবার তো সময় নেই, পরে জান্বে আমি কে।
স্নেহাঙ্ক, নিশ্চিত থাকতে পারি নি, ছুটে এসেছি। কাল রাত্রে স্বপ্নে
তোমার স্বামীকে সাবধান করেছিলেম, কিন্তু তাতে কোন ফল হবে
কি না কে জানে !

পদ্মা। আপনি তাঁকে দেখা দিয়ে সাবধান করলেন না কেন ?

সূর্য্য। কোন বিশেষ কারণে—যতক্ষণ তোমার স্বামী জীবিত থাকবেন—
আমি দেখা দিতে পারুব না, নচেৎ তোমার সাহায্য গ্রহণ করুব
কেন ?

পদ্মা। তিনি তো বুদ্ধসজ্জা করছেন, এখনি তো রণক্ষেত্রে যাত্রা
করবেন।

সূর্য্য। এখনো সময় আছে। তুমি আর বিলম্ব কোরো না, যাও—দেখো
রথে উঠবার পূর্বে যেন কোনো ব্রাহ্মণের সঙ্গে কথা কোন ব্যক্তির
সঙ্গে তাঁর দেখা না হয় ! তোমার স্বামী সত্যে বদ্ধ, যে যা চাইবে
তাকে তাই দেবে। জেনো মা, আজ যে আসবে, সে তোমার
স্বামীর প্রাণ ভিক্ষা চাইবে, তার সহজাত কবচ-কুণ্ডল চাইবে।
যদি স্বামীকে রক্ষা করতে চাও, আজ পুরদ্বার সব বন্ধ ক'রে দাও,
ভিক্ষার্থীকে আজ তোমার স্বামীর সম্মুখীন হ'তে দিও না। যাও—
নিজহস্তে তাকে রণসাজে মাজিয়ে রণক্ষেত্রে পাঠাও। এ যদি

পার মা, তা হ'লে জেনো—তোমার স্বামীর মৃত্যু নাই, তোমার স্বামীর জয় অবশ্যবাহী।

পদ্মা। কে আপনি মহাভাগ, করুণায় আগার স্বামীকে রক্ষা করতে এসেছেন? যদি পরিচয় না দিলেন, পদধূলি দিন, আশীর্বাদ করুন যেন স্বামীর জীবন রক্ষা করতে পারি।

সূর্য্য। খুব সাবধান, কোন প্রাথা যেন তোমার স্বামীর সন্মুখীন না হয়। মন্ত্রীদের ব'লে দাও, রাজকর্মচারীদের ব'লে দাও—ভিক্ষুক যেন পুরীতে প্রবেশ না করে। (স্বগত) ইন্দ্র! দেখি তুমি কিরূপে কৃতকার্য হও।

প্রগান

পদ্মা। কে ইনি কিছুই তো বুঝতে পারলেম না, নিশ্চয়ই আমার স্বামীর মঙ্গলাকাজ্জী কেউ দেবতা ছদ্মবেশে আমায় সাবধান ক'রে দিয়ে গেলেন। যা মতী-কুলরাণি। দেখো মা, তনয়ার মুখ রেখো, যেন দেবতার আদেশ পালন করতে পারি।

নিয়তির প্রবেশ

নিয়তি। আমায় চিন্তে পার?

পদ্মা। চেন্বার সময় নেই, মহাকাব্য সন্মুখে। বোধ হয় তোমায় কোথায় দেখেছি, বোধ হয় তোমায় চিনি—কিন্তু এখন নয়, এখন নয়। যদি দিন পাই, তখন তোমায় চিনব—এখন নয়।

প্রস্থান

নিয়তি। পদ্মাবতী! তুমি ভিক্ষুককে পুরপ্রবেশ করতে দেবে না—আজ নগরীর দ্বার বন্ধ করবার জ্ঞান ছুটে চলেছ—কিন্তু তুমি জান না যে, মহাকালের পথ সদা উন্মুক্ত, কেউ তার প্রবেশের পথ অর্গলবদ্ধ ক'রতে পারে না; লোক-লোচনের অস্ত্রালে সে পথ চির-অন্ধ-

কায়ে ঢাকা, কিন্তু সে আলো ধ'রে নিয়ে যাই আমি—তাই
যম সর্বজয়ী। ব্রাহ্মণবেশী ইন্দ্রকে তোমার স্বামীর নিকট আমিই
নিয়ে যাব।

প্রহান

পদ্মাবতীর পুনঃ প্রবেশ

পদ্মা। মন্ত্রী, রাজকর্মচারীদের প্রতি আদেশ দিয়ে এসেছি—নগরীর দ্বার
কদ্ধ—যাই—স্বামীকে নিজ-হস্তে বণ-সাজে সাজিয়ে বণ-ক্ষেত্রে পাঠাই।
হে অপরিচিত দ্বিজ। আপনার চরণে কোটি প্রণাম, আপনি
পিতার গায় আমার মহৎ উপকার ক'রে গেলেন।

প্রহান

ষষ্ঠ দৃশ্য

কর্ণের প্রাসাদ-কক্ষ

কর্ণ ও ব্রাহ্মণবেশী ইন্দ্র

কর্ণ। চাহ কবচ-কুণ্ডল ?
ইন্দ্র। হাঁ কবচ-কুণ্ডল—অঙ্গ হ'তে তব।
কর্ণ। কিবা প্রয়োজন তাহে দেব ?
ইন্দ্র। প্রয়োজন জানিবার নাহি অধিকার।
শুনি সত্যবাদী তুমি,
দান তব বিখ্যাত ভুবনে,
প্রার্থীজনে নিরাশ না কর কভু .
যদি অঙ্গ হতে তব

ছিন্ন করি সহজাত কবচ-কুণ্ডল

ভিক্ষা দিতে পার মোরে ।

কর্ণ । (অগত) অদ্ভুত স্বপন দেখেছিহু নিশি-শেষে ।

পূর্বাশার দ্বার মুক্ত করি’

জ্যোতির্ময় পুরুষ-প্রবর

স্নেহ গদগদকণ্ঠে কহিছেন মোরে,

“বৎস !

কালি প্রাতে প্রার্থী যদি কেহ

ভিক্ষা চাহে কিছু,

নিঃসংশয়ে বিনুথ করিও তারে !”

স্বপ্ন-মন্ম পারি নি বুঝিতে,

আজি দেখি অর্থ তার

দিবালোক সম স্পষ্ট আমার কাছে ।

(প্রকাশে) দেব !

জান কি হে তুমি,

কোন্ বস্তু করিছ প্রার্থনা ?

ইন্দ্র । জানি—কবচ-কুণ্ডল ।

কর্ণ । না, না, জান নাক কিছু

কিহা জান সমুদয়,

জেনে শুনে প্রাণ মোর এসেছ লইতে ।

আজ যদি

কবচ-কুণ্ডল দান করি তোমা—

জেনো, রণক্ষেত্রে নিশ্চয় মরণ মম ।

এখনো বুঝিয়া দেখ,

যদি পার,

বাক্য কব সংঘত এখনো—

চাহ আর যেবা অভিকৃতি তব,

শুধু কুরুক্ষেত্র মহাবরণ

ষতদিন নাহি হয় অবসান,

নাহি হয় পার্শ্বের বিনাশ,

ততদিন আর সব লহ—

যাহা ইচ্ছা তব—

শুধু চেও নাক কবচ-কুণ্ডল ।

ইন্দ্র :

কিন্তু প্রয়োজন কবচ-কুণ্ডল মোর ।

কর্ণ ।

বুঝিয়াছি,

প্রয়োজন কর্ণের নিধন,

তাই যথাকালে তুমি দ্বিজ মশ্মুখে আমার,

ভিখারীর বেশে ।

কিন্তু বাক্য ধবে করিয়াছি দান,

তুচ্ছ কবচ-কুণ্ডল—

অকাতরে দিব উপহার চরণে তোমার ।

কিন্তু কহ,

চক্ষুচ্ছেদে জীবিত কেমনে বব ?

চর্যোধন পাশে

করিয়াছি প্রতিজ্ঞা ভীষণ,

নিম্পাণ্ডবা করিব ধরণী

কিন্মা বগস্থলে দিব আছতি জীবন—

সেই বাক্য—

সেই প্রতিজ্ঞা কর্ণের—

হইবে নিষ্ফল !

কহ এ সমস্তার উপায় কি করি ?

ইন্দ্র

যম বরে

অঙ্গচ্ছেদে প্রাণনাশ না হবে তোমার,

অক্ষত বহিরে দেহ ।

গম্ভাবতীর প্রবেশ

পদ্মা ।

এ কি ' কে তুমি ?

কেমনে আসিলে হেথা ভিক্ষুক ব্রাহ্মণ,

কহ যবে পুরদ্বার সব ?

কর্ণ ।

পদ্মা, চেন কি ব্রাহ্মণে ?

পদ্মা ।

নাহি জানি নাথ,

সর্কনাশ সম্মুখে উদয় ।

নহে দ্বিজ,

মহাকাল এসেছেন ব্রাহ্মণের বেশে ।

কর্ণ ।

নাহি কৃতি,

হ'ন মহাকাল—

প্রতিজ্ঞা আমার নিশ্চয় পালিব আমি ।

এস দ্বিজ,

লহ অস্ত্র,

সহজাত কবচ-কুণ্ডল-ধারী কর্ণ হ'ক কবচ-বিহীন ।

কর্ণ ও ইন্দ্রের অস্থান

পদ্মা । কেমন ক'রে ব্রাহ্মণ এখানে প্রবেশ করলে ? কোন পথ দিয়ে

প্রবেশ করলে / কে ওকে এখানে আনলে ?

কর্ণ । আমি--আমার সঙ্গে ভাব, না আডি ?

পদ্মা । তুমি ! তুমি !

নিয়তি । হাঁ, চিন্তে পেয়েছ ?

পদ্মা । চিনিছি, চিনিছি, স্বামীর প্রাণ মূল্য দিয়ে তোমার চিনিছি ।

তবে রাক্ষসি, তুমিই ব্রাহ্মণকে পথ দেখিয়ে এখানে এনেছ ?

নিয়তি । আমিই তো পথ দেখিয়ে পঞ্চালে নিয়ে গিয়েছিলাম, আমিই

তো তোমার স্বামীকে চিনিয়েছিলাম ; তাই তো তোমার স্বামী তখন

মৃত্যু হ'তে রক্ষা পেয়েছিলেন, তবে রাক্ষসী বন্ড কেন ?

পদ্মা । কেবা তুমি প্রহেলিকাময়ী

ছায়া সম ফের সাথে সাথে ?

কভু মমতায় বিগলিত প্রাণ,

কভু পিশাচী সমান,

করি' ভেদ দুর্ভেদ প্রাচীর

মৃত্যু ডেকে আন ঘরে ।

কভু সঙ্গীত-ঝঙ্কার,

কভু হাহাকার

সমস্তরে কণ্ঠে তব বাজে,

কভু ফণিমালা মাঝে,

কভু কুসুমের সাজে,

প্রাণের দোসর অতি হেঁচু আরাধ্য কখনো,

ভীমা ভয়ঙ্করী কভু ।

ধরি পায়, কহ

কেবা তুমি মায়াবিনী, লম্ব ধরামাঝে ?

কর্ণের প্রবেশ

কর্ণ ।

সব শেষ—

আজি দান সার্থক আমার !

পদ্মাবতি—

এ কি !

সেই তাপস-তনয়া

গোধূলি আচ্ছন্ন বনে

তুমি তবে মায়া-মৃগ ধরেছিলে সন্মুখে আমার ?

আজি পুনঃ আসিয়াছ

মায়া-কায়া করিতে বিনাশ ?

কহ কেবা তুমি—দেহ পরিচয়,

সংশয়ে না রাখ আর ।

নিয়তি ।

নিয়তি ।

পদ্মা ।

(সভয়ে) নিয়তি ।

কর্ণ ।

নাহি ভয়,

রণক্ষেত্রে অসিগুথে

নিয়তির ছেদিব বন্ধন ।

সকলের প্রস্থান

সপ্তম দৃশ্য

রণস্থল

শকুনি

শকুনি । মহাঝড়ে বৃক্ষ হতে ফল পড়ছে—একটির পর একটি ; আজ কর্ণের সঙ্গে যুদ্ধের তৃতীয় দিন । আমি কবে যাব ? শত ভাইয়ের বাকী দুঃশাসন আর দুর্ঘোষন । আমারও উনশত ভাই অপেক্ষা করছে । বহু বর্ষের ক্ষুধা—মিটেছে কি ? মিটেছে কি ? বাকী— শুধু দুর্ঘোষন আর দুঃশাসন ।

দুর্যোধনের প্রবেশ

দুর্যোধ্য ।

হে মাতুল,
অদ্ভুত সময় হেন দেখি নাই কতু !
কর্ণ আজ করে মহামার ;
বিচ্ছিন্ন পাণ্ডব সেনা,
যুদ্ধিষ্ঠির পলায় সভয়ে,
অর্জুনের নাহিক সঙ্কান ।
দেখ কোথা সহদেব,
হও আগ্রহান,
প্রতিজ্ঞা ক'রেছে সেই বধিবে তোমায়ে ।

শকুনি ।

চারিদিকে শুনি
কুধার্তের চীৎকার ভীষণ ।
চল দুর্যোধন,
দেখি কোথা সহদেব—
আজি আনন্দ ধরে না মোর !

উত্তরের প্রস্থান

শল্যের প্রবেশ

শল্য । কর্ণ রথ পরিত্যাগ ক'রে ভূমিতে অবতীর্ণ হ'য়ে যুদ্ধ করছে ।
ছি ছি ! কি লজ্জা, কি ঘৃণা ! বখীশ্রেষ্ঠ শল্য আমি, আমি সূতপুত্র
কর্ণের সারথি ! কর্ণের মৃত্যু না হ'লে আমার বারস্ব দেখাবার
অবসর কৈ !

নেপথ্যে কর্ণ । ধনু পার্থ, ধনু সারথি তোমার,

পলায়ন-পটু হেন দেখি নি কখনো ।
কোথা ভীমসেন,
যদি পার, রক্ষা কর ধর্মরাজে তব ।

শল্য। যুধিষ্ঠিরও দেখছি রথ পরিত্যাগ ক'রে কর্ণের সম্মুখীন হয়েছে।

যাই, আমি রথ প্রস্তুত রাখি গে যদি প্রয়োজন হয়।

প্রস্থান

নেপথ্যে যুধিষ্ঠির। কোথায় অর্জুন! কোথা ভীমসেন।

অষ্টম দৃশ্য

রণস্থলের অপরাংশ

শকুনি ও দুঃশাসন

শকুনি। তুমি ভীমসেনকে খুঁজছিলে? সারথিকে ত্রে দেখে রথ
আনতে বলব কি?

দুঃশা। না, রথে নাহি প্রয়োজন,
গদাযুদ্ধে ভীমসেনে পাড়িব এখনি।

উভয়ের প্রস্থান

সহদেবের প্রবেশ

সহ। হে সৌবল!
আজি নাহি নিস্তার .তামার।
যেই করে যক্ষপাটি করেছ চালন,
সেই কর কাটি' শরমুখে
কুকুরে করিব দান

প্রস্থান

ভীম ও দুঃশাসনের প্রবেশ

ভীম। আরে আরে কোঁরব কলঙ্ক
আরে দুঃশাসন,
তিনপুরে নাহি কেহ আজি রক্ষা করে তোরে।

দুঃশা : ভাল, ভাল,
 দেখিব বীরত্ব তোমার !

উল্লসের প্রস্থান

শকুনির পুনঃপ্রবেশ

শকুনি । ব্রণ-সিকু উথলে ভীষণ,
 ঐ ঐ দুঃশাসন যুঝে ভীমসেন মনে ।
 ভীম, মনে রেখো —
 দুঃশাসন বক্ষরক্ত পান
 প্রতিজ্ঞা তোমার ।

প্রস্থান

ব্রণস্থলের অপরাংশ

দুঃশাসন শায়িত—বক্ষোপরি ভীমসেন

ভীম । আরে হীন পশুর অধম !
 আজি পড়ে কিবে মনে
 পাঞ্চালীর কেশ-আকর্ষণ ?
 ওহো ! আর নহে উষ্ণ,
 হিম দেখি বক্ষ রক্ত তোমার ।
 কৃষ্ণা ! কৃষ্ণা !
 এইবার বেণী তব করিব সংহার ।

নবম দৃশ্য

দুর্যোধনের প্রবেশ

দুর্যোধ্য। কোথা দূঃশাসন ?
বহুক্ষণ নাহি হেরি তারে !
কেন মোর অস্তর ব্যাকুল ?

শকুনির প্রবেশ

শকুনি। দুর্যোধন ! দুর্যোধন !
দুর্যোধ্য। এ কি মাতুল ! তোমার ললাটে রক্তের তিলক কেন ?
শকুনি। শুধু ললাটে নয়, এই দেখ, হাতেও রক্ত মেখেছি ! দেখ—
চিন্তে পার কার রক্ত ?
দুর্যোধ্য। কোন শত্রুর রক্তে হস্ত রঞ্জিত করেছ মাতুল ? সহদেব
কি মৃত ?
শকুনি। সহদেব নয়—দুর্যোধন—চিন্তে পারছ না ? সহোদরের
রক্ত ! তোমার সহোদর দূঃশাসন নেই, ভীমসেন তাকে বধ ক'রেছে ।
দুর্যোধ্য। আঁা ! দূঃশাসন ! ভাই—ভাই ! (মূর্ছা)
শকুনি। এ মূর্ছাও ভাঙ্গবে, এখনো উরুভঙ্গ বাকী। আর আক্ষেপ
নেই—আর আক্ষেপ নেই। পিতা আশ্রয় হও ! তোমরা অনাহারে
মরেছিলে, দেহে এতটুকু রক্ত ছিল না—এ রক্তের চেউ বয়ে যাচ্ছে ।
এইবার আমিও যাচ্ছি—যাচ্ছি—আর বিলম্ব নেই ! দুর্যোধন !
দুর্যোধন ।

দুর্যোধ্য। হত দূঃশাসন ?

শকুনি। কিন্তু ভীমসেন এখনো জীবিত রয়েছে ।

হুঁসো।

হে মাতুল !

সত্য বটে ভীমসেন এখনো অবিভিত ।

কোথায় সারথি ?

নহ রথ ভীমের সম্মুখে,

হেথি কত বল ধরে সে পামর !

শকুনি। হাঁ, হাঁ, চল—চল, আর বিলম্ব সহিছে না—আর বিলম্ব
সহিছে না।

এখানে

যদুহলে যুধিষ্ঠিরের গলদেশ বেষ্টন করিয়া কর্ণের প্রবেশ

কর্ণ।

কোথা পার্থ, কোথা ভীমসেন—

ভাক ভাক উচ্চৈঃস্বরে ;

কোথা যদুপতি সারথি তোমার ?

তুনি অগতির গতি তিনি,

গতি মুক্তি করুন বিধান।

যুধি।

আরে হেয় রাধেয় !

কর্ণ।

জ্ঞান এক কথা—

হীন আমি রাধার নন্দন,

কত হ'য়ে আর নাহি জ্ঞান কিছু ?

বংশ পরিচয়ে প্রতিষ্ঠা স্থাপন

আমি চাহি নাই কত !

বীৰ্য্যবলে ব্রাহ্মণ ক্ষত্রিয় জাতি ভেদ,

ধরা হ'তে করিব নির্মূল।

বাল্য হ'তে আছিল প্রতিজ্ঞা মোর

আজি সে প্রতিজ্ঞা অংশে পূর্ণ—

পরাজিত তুমি যুধিষ্ঠির।

যদি ইচ্ছা করি.
 এখনি নাশিতে পারি,
 কিন্তু তুমি নাহি জান কি 'বহু' সেই,
 যাহে অকাতরে প্রাণ দান করি আমি শুব ।
 যাও—যাও ধর্মের নন্দন !
 কহ ভুবনবিজয়ী পার্থে আমিতে সম্মুখে
 কোথা শল্য,
 দেহ বধ,
 দেখি ভীমসেন কোথা ।

প্রস্থান

যুধি । অর্জুন কি সত্যই প্রাণভয়ে পালিয়েছে ? এ অপমান অপেক্ষা
 যত্নাই শ্রেয়ঃ ; কিন্তু এ কি । কর্ণের সহিত যুদ্ধে আমার মনে
 হিংসার উদয় হয় না কেন ? কেন কর্ণের চরণের দিকে চাইলে মাতা
 কুন্তী দেবীর চরণ যুগল আমার মনে পড়ে ! এ কি দুর্বলতা ! কেন
 এ সাদৃশ্য ? দেখি কোথায় অর্জুন ।

দর্শন দৃশ্য

স্বপ্নাকর্ষণ কর্ণ ও শল্য

কর্ণ । শব-জালে আচ্ছন্ন গগন ।
 শুন শল্য অধিপতি !
 দেখ কোথা কপিধ্বজ বধ,
 আজি যুদ্ধে
 হয় পার্থ নয় কর্ণ
 ধরা হ'তে লইবে বিদায় ।

শল্য। কর্ণ! ঐ দেখ দূরে যদুপতি চালিঙ রথ। চল, এখনি তোমার
রথ অর্জুনের নিকটে নিয়ে যাচ্ছি।

(নেপথ্যে) অর্জুন। হে গাধব,

বিলম্ব না সহ্যে আর।

কোথা কর্ণ?

লহ রথ সম্মুখে তাহার,

আজি রণে দিব বলি বাধার নন্দনে।

রথারোহণে শ্রীকৃষ্ণার্জুনের প্রবেশ

শ্রীকৃষ্ণ। ভাল ভাল গৃহে শল্য চালিগাছ রথ,
বহুকষ্টে পেয়েছি সন্ধান।

অর্জুন। হও স্থির আকুল গাণ্ডীব,
ষোগ্য অরি নেহারি অদূরে,
এতদিনে মিটিবে তোমার তৃষা।

কর্ণ। হেলায় জীবন দান
করিয়াছি চারি সহোদরে তব,
কিন্তু আর নাহি ক্ষমা।
শল্য অধিপতি।
কেন অশ্ববলী করেছ সংযত?
চা'ল, চা'ল, রথ দ্রুতগতি,
বধি পার্শ্বে
জীবনের সমস্ত আক্ষেপ
দিই জলাঞ্জলি!

শল্য। কর্ণ! তুমি অর্জুনকে বধ করবে কখনো স্বপ্নেও ভেব না;
অর্জুনকে বধ করব আমি! তবে আক্ষেপ এই, তুমি নিহত হ'লে
আমার রথের সারথি হবে কে?

কর্ণ ।

নাহি চিন্তা বীর-শ্রেষ্ঠ,
শমন সারথি হবে তব ।
এবে নিজ কার্য্য কর সমাধান,
চাল অশ্বগণে ।
হে পার্থ-সারথি !
যদি পার বন্ধা কর রথীয়ে তোমার ।

শল্য ।

রথ-চক্র অকস্মাৎ হেরি গতি-হীন,
বুঝিতে না পারি
কেবা রোধে গতি তার !

কর্ণ ।

আমি জানি, আমি দেখিয়াছি তারে ,
কিন্তু নাহি চিন্তা,
ধরাবন্ধ করি খান খান,-
আমি চিরদিন তবে
গতিরোধ কারিব তাহার ।

শল্য । কর্ণ !

ব্যাপার !

মেদিনী যে ক্রমশঃ রথ-চক্র গ্রাস করছে । এ কি অদ্ভুত
এ তো কখন দেখি নি !

কর্ণ ।

সকলি অদ্ভুত অদৃষ্টে আমার !
কিন্তু তাহে নাহি ক্ষোভ ।
হে অর্জুন !
তিষ্ঠ ক্ষণকাল,
দেখি, কত শক্তি ধরে সে মেদিনী ।
রাহমুক্ত চন্দ্র সম
ধরামুক্ত রথচক্র করিব এখনি ।

রথ হইতে অবতরণ

শ্রীকৃষ্ণ । অর্জুন ! এইবার যুদ্ধিষ্টিবের অপমানের প্রতিশোধ নাও ।

কর্ণ ।

(রথচক্র ধারণ করিয়া)

কোথা শক্তি,

কোথা গুরুদত্ত সিদ্ধ মন্ত্র মোর ।

এস এস, স্মৃতিপটে হও হে উদয়,

প্রাণপণে করি আবাহন,

আজি বিমুখ না কর মোরে ।

বিশ্বতির মেঘে ঢাকা মস্তিষ্ক আমার,

ধূমাচ্ছন্ন নেহারি সংসার ।

শ্রীকৃষ্ণ ।

দাবানল জানিয়াছ,

সপ্তরথী মিলি' বধেছিলে অভিমুখে,

আজি দেখি সেই চিত্র সন্মুখে আমার ।

হে ফাস্তনি,

পুত্রঘাতী তব, জীবিত এখনও ।

কর্ণ ।

রে অর্জুন,

পুনঃ কহি, তিষ্ঠ কর্ণকাল,

এ কি পাপ ।

কত্রকূলে দিয়ে কালি—

হান শর বিরথী অরাতি প্রতি ?

অর্জুন ।

নীচ স্মৃতির নন্দন,

প্রতিজ্ঞা আমার করহ স্মরণ,

পশুসম সংহারিব তোরে,

করেছিহু পণ--

মিথ গানহে সে প্রতিজ্ঞা মোর ।

কর্ণ ।

বটে ! আরে কত্র কুলগানি,

পশু আমি,

আর তুমি ক্ষত্রিয়-পুঙ্গব ?
 থাক থাক ঘুচাই বীরত্ব তোমার !
 রথ—রথ—
 হো হো শল্য !
 যদি পার দেহ মোরে রথ একখান !
 কিম্বা নাহি প্রয়োজন—
 শূন্য নহে তুণ,
 দেখিবে অর্জুন,
 রথোপরি কেমনে রহিস্ স্থির ।

শ্রীকৃষ্ণ ।

যতিমান্ !
 শরবিদ্ধ অঙ্গ তব কবচ বিহীন,
 আর কেন, রণে দেহ ক্ষমা !

কর্ণ ।

দিব ক্ষমা, এ জীবন দিব পুষ্পাঞ্জলি
 যবে চরণে তোমার ।

শল্য । কর্ণ ।

তুমি আহত, চল তোমায় শিবিরে ল'য়ে বাই ।

কর্ণ ।

ভেবেছ কি সত্য এত হীন আমি,
 রণক্ষেত্র ত্যজি'
 শিবিরে করিব পলায়ন ?
 এখনো এ দেহে আছে প্রাণ,
 কর মোর নহেক অবশ,
 দৃষ্টিহীন হই নাই আমি ।
 কে আছ সুহৃদ,
 হয় দেহ রণ-মৃত্যু মোরে,
 নহে—পুনঃ কহি,
 দেহ রথ একখান ।

অর্জুন ।

রণ-মৃত্যু আমি দিই তোমা ।

বাণ ত্যাগ করিলেন।

কর্ণ ।

পূর্ণ বিধিলিপি ।

পড়িয়া গেলেন

বে নিয়তি,

বাণী তব পূর্ণ এত দিনে ।

আমি কর্ণ রাধার নন্দন,

জন্মদিন হ'তে

মহারণ করেছি তোমার মনে,

সহিয়াছি বহু ক্লেশ ,

কিন্তু দেবী, মাফী তুমি--

হই নাই সত্য-ব্রষ্ট কভু ।

স্বহস্তে জীবন দান করিয়াছি আমি;

তাই আজ বিজয়িনী তুমি ।

শ্রীকৃষ্ণ ।

বীর ! নহ তুমি রাধার নন্দন,

কুন্তীপুত্র তুমি,

আমি জানি জন্ম-কথা তব ।

কর্ণ ।

কিবা নাহি জান তুমি,

নিখিলের জ্ঞানের নিধান,

কিন্তু দেব, আমি কভু না কহিব

কুন্তীপুত্র আমি ।

অর্জুন ।

(রথ হইতে নামিয়া) এ কি স্তনি ?

কহ ষড়পতি,

কুন্তীপুত্র কর্ণ মহাবীর ?

শ্রীকৃষ্ণ ।

হাঁ, মহোদর তব ।

অর্জুন ।

তবে করিয়াছি ভ্রাতৃবধ ?

ভাই, ভাই !

কেন হাও নাই পরিচয় ?

এ কি মহাপাপে লিপ্ত করিলে আমারে ?

এ কি অদ্ভুত রহস্য !

তুমি মহোদর মম,

চিরদিন শত্রু বলি,

পরিচয় করেছ প্রধান ?

হায় হায়,

আত্মীয় বিনাশ হেতু জনম আমার ?

কর্ণ ।

নাহি খেদ,

কৃত্রিয়ের পবন আত্মীয় সেই,

যেই করে বণ-মৃত্যু দান ।

বে অর্জুন ! আমি ছোষ্ঠ তব,

করি আশীর্বাদ, হও বণজয়ী তুমি ।

হে মাধব !

দেখিলাম ভাগ্য বলবান ।

কহ আছে কি উপায়,

ধরি' দেহ

নিয়তির হাত হ'তে লভিতে নিষ্কৃতি ?

শ্রীকৃষ্ণ ।

একমাত্র সেই জন পারে বোধিবারে

নিয়তি শাসন,

যেই জন

নারায়ণে কৰ্মফল করে সমর্পণ !

দশম দৃষ্ট

কর্ণাঙ্কন

কর্ণ ।

নাৰায়ণ !

আজি মোৰ কৰ্ম অবসান !

ঐ হেৰি মায়াহু তপন

জনক আমাৰ,

বন্ধমাৰে পাদপদ্ম তব,

আৰু কিবা ভয়—

নিয়তিৰ গতিকহু আজি ।

যত্ন

সূৰ্য্যমণ্ডল হইতে দিব্যজ্যোতিঃ প্রকাশ

যবনিকা

গুৰুদাস চট্টোপাধ্যায় এণ্ড সন্স-এৰ পক্ষে শ্ৰীকুমাৰেণ ভট্টাচাৰ্য্য কৰ্তৃক ২০৩১।১,
বিধান সরণী, কলিকাতা হইতে প্রকাশিত ও শৈলেন প্রেস, ২৩, বুললকিমোৰ
দাস লেন, কলিকাতা হইতে শ্ৰীতীৰ্থপদ শৰ্মা কৰ্তৃক মুদ্রিত

প্রথম অভিনয় রাত্রির কুশীলবগণ

১৫ই আষাঢ় ১৩৩০ সাল

শ্রীকৃষ্ণ	ইন্দুভূষণ মুখোপাধ্যায়
বলরাম	পঞ্চানন রায়
মহাদেব	নরেন্দ্রনাথ সেন
ইন্দ্র (ছদ্মবেশী)	শান্ততোষ ভট্টাচার্য্য
সূর্য্য (ঐ)	বিজয়কৃষ্ণ মুখোপাধ্যায়
শ্রীকৃষ্ণ (ব্রাহ্মণবেশী)	নরেশচন্দ্র মিত্র
পরশুরাম	অপরেশচন্দ্র মুখোপাধ্যায়
ভীষ্ম	সন্তোষকুমার দাস
ধৃতরাষ্ট্র	ব্রজেন্দ্রনাথ দে
দ্রোণাচার্য্য	কালীপ্রসন্ন পাইন (পরে ব্রজেন্দ্রনাথ সরকার)
কৃপাচার্য্য	তুলসীচরণ চক্রবর্তী
বিদুর	শরৎচন্দ্র সুর
যুধিষ্ঠির	হেমেন্দ্রকুমার রায়চৌধুরী (এমেচার)

ଭୀମ	ନନୀଗୋପାଳ ଯଲ୍ଲିକ
ଅର୍ଜୁନ	ଅହୀନ୍ଦ୍ର ଚୌଧୁରୀ
ନକୂଳ	ଆଶୁତୋଷ ଚକ୍ରବର୍ତ୍ତୀ
ମହାଦେବ	ମତୀଶଚନ୍ଦ୍ର ଦତ୍ତ
ହର୍ଷୋଧନ	ପ୍ରଫୁଲ୍ଲକୂମାର ମେନଶୁଖ
ହଃଶାମନ	ତୁଳସୀଚରଣ ବନ୍ଦ୍ୟୋପାଧ୍ୟାୟ
ବିକର୍ମ	ହୃଗାଦାମ ବନ୍ଦ୍ୟୋପାଧ୍ୟାୟ
ଶକୁନି	ନରୈଶଚନ୍ଦ୍ର ମିତ୍ର
କର୍ମ	ତ୍ରିନକଡ଼ି ଚକ୍ରବର୍ତ୍ତୀ
ଶଳ୍ୟା	ନରୈନ୍ଦ୍ରନାଥ ମେନ
ସ୍ଵପ୍ତହାସ	ଅମୂଲ୍ୟାଚରଣ ନାଗଚୌଧୁରୀ (ଏମେଚାର)
ଅଗ୍ନିହୋତ୍ର	ବିଜୟକୃଷ୍ଣ ମୁଖୋପାଧ୍ୟାୟ
ଅଧିରଥ	ବିଶ୍ଵନାଥ ଚକ୍ରବର୍ତ୍ତୀ
ବୃଷକେତୁ	ତାରକବାମ୍ନା
ଶୂଦ୍ର	ତାରକନାଥ ଘୋଷ
କର୍ମେଶ୍ଵରୀ	ସୁରୈଶଚନ୍ଦ୍ର ବନ୍ଦ୍ୟୋପାଧ୍ୟାୟ
ନିଚିତ୍ରମେନ	ରମେଶଚନ୍ଦ୍ର ବିଦ୍ୟାନିଧି (ଏମେଚାର)
ଜନୈକ ଶାସି	ବିଶ୍ଵନାଥ ଚକ୍ରବର୍ତ୍ତୀ
ଭୈରବ	ନନୀଳାଳ ଦାମ
ମନ୍ତ୍ରୀ, ପ୍ରତିହାରୀ	}	..	ବିନୋଦବିହାରୀ ଘୋଷ
ଓ ଦୂତ			

শৌরী	আঙ্গুরবালা
নিয়তি	নৌহারবালা
কুস্তী	মনোরম
শ্রোপদী	নিভাননী
স্বকেশু	গোলাপসুন্দরী
পদ্মাবতী	কুম্ভামিনী
ভৈরবী	ফিরোজবালা

মখীগণ—ফিরোজবালা, রাণীসুন্দরী, আঙ্গুরবালা, সস্তাষকুমারী,
 মতিবালা, বেণুবালা, খেতাজিনী, ননৌবালা, রাধারাণী,
 শূদীবালা, নীলিমা, ভবানী

000000-200000

Books are issued for
14 days only.
Books lost, defaced
or injured in any way
shall have to be re-
placed by the borro-
wers.

Library Form No. 5

—অপরেণচন্দ্র মুখোপাধ্যায় প্রণীত পুস্তকাবলী—

শ্রীগোরাঙ্গ	ভক্তিমূলক নাটক	২
বিজ্ঞোহিনী	নাটক	২
পোষপুত্র	সামাজিক নাটক	২
মা	সামাজিক নাটক	২
শকুন্তলা	পৌরাণিক নাটক	২
মহাশক্তি	সামাজিক নাটক	২
চণ্ডীদাস	শ্রেয়-ভক্তিমূলক নাটক	২
শ্রীকৃষ্ণ	পৌরাণিক নাটক	১'৫০
কর্ণার্জুন	পৌরাণিক নাটক	৩
রজিলা	কৌতুক নাটিকা	৩৭
ছিন্নহাঙ্গ	সামাজিক নাটক	১
বাথীবন্ধন	ঐতিহাসিক নাটক	২
অযোধ্যার বেগম	ঐতিহাসিক নাটক	১'৫০
অঙ্গরা	গীতি-নাটিকা	৩৭
ভদ্রা	গার্হস্থ্য উপন্যাস	২
পুষ্পাদিত্য	গীতিনাট্য	২
সুন্দরী	পৌরাণিক নাটক	২
মুক্তি	কৌতুক-নাটিকা	২৫
সুদামা	পৌরাণিক নাটক	১
শ্রীরাম	পৌরাণিক নাটক	১
ওভর্ট	সামাজিক নাটক	১

গুরুদাস চট্টোপাধ্যায় এণ্ড সন্স

২০৩-১-১ কলিকাতা স্ট্রীট ১১ কলিকাতা-৬